

**SEVENTH LEGISLATIVE ASSEMBLY OF MIZORAM  
( SEVENTH SESSION )**

**LIST OF BUSINESS**

FOR SEVENTH SITTING ON WEDNESDAY, THE 14<sup>th</sup> OCTOBER, 2015  
( Time 10:30 A.M. to 1:00 P.M. and 2:00 P.M. to 4:00 P.M. )

**QUESTIONS**

1. **Questions** entered in separate list to be asked and oral answers given.

**LAYING OF PAPERS**

2. **Pu LAL THANHAWLA**, Hon'ble Chief Minister to lay on the Table of the House a copy each of the following :
  - i) Annual Report 2014-2015 (1<sup>st</sup> April 2014-31<sup>st</sup> March 2015) of Mizoram Information Commission.
  - ii) The Mizoram Right to Public Service Rules, 2015.
3. **Pu R. LALZIRLIANA**, Minister to lay on the Table of the House a copy of the Mizoram Private Security Agencies (First Amendment) Rules, 2013.

**FINANCIAL BUSINESS**

**DISCUSSION AND VOTING ON DEMANDS**

4. **Pu LALSAWTA**, Minister to submit to the Vote of the House various Demands under his charge.
5. **Pu P.C. LALTHANLIANA**, Minister to submit to the Vote of the House various Demands under his charge.
6. **Pu B.D. CHAKMA**, Minister to submit to the Vote of the House various Demands under his charge.

NGURTHANZUALA  
Secretary

....

**SPEAKER** : Chuvangin Lalpa chuan a khawngaih theihna tur che uin a nghak ang a, a lainat theihna tur che uin chawimawiin a awm ang. Lalpa chu rorel felna Pathian a ni si a. Amah nghaktute zawng zawng chu an eng a thawl e. (Isaia 30:13)

Awle, tunah hian Zawhna 91-na kan la ang a, a zawt turin a neitu MLA zahawm tak Pu Lalruatkima i sawm ang.

**Pu LALRUATKIMA** : Pu Speaker, ka lawm e. Ka Starred Question No. 91-na P.W.D. Minister zahawm tak chhan atan –

- (a) NH-44A Lengpui-Mamit-Langkaih kawng hi Tender amount engzatnge ? Tunge Contractor ? Engzat amount in nge Contractor hnenah hian pek a nih?
- (b) Agreement-ah engtik atanga thawh tan tur nge ni a, engtika thawk zo tura rua hman nge a nih?
- (c) Tuna an hnathawh mek chin hi Physical leh Financial achievement enge ?
- (d) Contractor-te hnathawh mek (Work progress)-ah hian Sorkar a lungawi em ?
- (e) Tuna kawng hmanlai mek hi engtikah nge chei that anih dawn ?

**SPEAKER** : A changtu Chief Minister zahawm tak chhang turin ilo sawm ang.

\* Speech not corercted

**Pu LAL THANHAWLA, CHIEF MINSITER** : Pu Speaker, MLA zahawm tak Pu Lalruakima zawhna Starred Question No. 91-na chhanna chu –

(a) NH-44A Lengpui-Mamit-Langkaih kawng tana Department Tender Amount chu ₹ 622.00 crore a ni a, a Contractor hi Gayatri Project Ltd. an ni a, an headquarter chu Hyderabad a ni awm e. A contractor tendered amount hi ₹ 544.75 crore a ni.

(b) Agreement ang chuan, hnathawh tan ni chu 17.3.2011 a ni, thawk zo tura ruahman ni chu 17.3.2014 a ni. Amaherawhchu, hemi chhunga an thawh zawh hman loh avangin, extension of time ni 17.7.2017 thleng pek belh an ni.

(c) Physical = 30.50%  
Financial = ₹ 174.13 crore.

(d) Lungawilo a, a tir atangin sorkar hi chu an lungawilo nghal

(e) Chei that mek zel a ni.

**SPEAKER** : Zawhbelhna, a neitu Pu Lalruatkima.

**Pu LALRUATKIMA** : Pu Speaker, ka lawm e. Kha nia, khulai NH-44 khu tender anih hianin pre-qualification price bid leh technical bid hi Mizoram sorkar PWD khawih a ni a. Chutah chuanin kan sawi duh tak a chu, Formation cutting pawh tun dinhmunah chuan an la zo ta lova. Khati chen pawisa an la tawh a, 174.13 crore lai mai an la tawh a. Tunah khuanin Mamit atanga Tuidam inkarah khuan khawl pakhatmah an dah tawh love anrawn ti a. Mamit leh Lengpui inkarah khawl 2/1 chauh mai a la awm e chu anrawn ti a. Ni 17.7.2017 ah pawh khian an zo hman dawn amaw ni le aw tih tur a ni a, chulai chu sorkar pawhin ngaihven leh zual thain ka hria a.

Tin, Forests Clearance Dapchhuah atanga Mamit inkar hi neih a ni tawh em ? Neih a nih loh chuan tender hun leh hnathawh tan hun nen tun ah a ral tawh a. Engvanga tun thlenga Forest clearance hi Dapchhuah leh Mamit inkarah la neih loh nge tih kha ka'n zawh belh a ni.

\* Speech not corrected.

**SPEAKER** : Awle, zawhbelhna member dang 2 in in siam belh thei e. In awm loh chuan, tunah a changtu Chief Minister chhang turin ilo sawm ang.

**Pu LAL THANHAWLA, CHIEF MINISTER** : Pu Speaker, ka sawi ang khan helai hna chungchangah hian, a tir atangin sorkar hi a lungawilo sa a. Contract hi award an nih khan anrawn thawk lawk duh lova. Tichuan, a neitupa ber hi T.Shubharama Reddy, Hyderabad ami a ni a. Member zahawm tak Pu Zawma chuan a hriat pawh ka ring a, mi hausa tawntaw Party Hopper High Flying MP a ni a. Arawn tan lawk loh avangin ka zuk bia a phone-in. Tichuan a ni chuan, hralh pawh a duh thu a sawi a. Chutiang mai maia tih chi a ni lo a ni tih te ka hrih a. Tichuan, hralh a duh a ni tih an hriatin lei tumte pawh an awm a, mahselangin, a hralh duhna kha a chhan hniam tawh nak alaiin 12% below ala ni leh nghal a. chuvangin leitu a hmu ta lo a ni. Chutiang chu a bul intanna kha a ni a, a bilh a tho lo hrim hrim tan a ni. Tichuan, wawi tam tak kan official ten an nawr hnuin anrawn thawk ta hram a, an thawh hnuah pawh nawr nawr tulna a tam em em a ni. Tin, chutianga harsa a, a tir atanga harsa sa kha a ni a. An innawr nasa a, kan hriat angin a detail engmah sawi a ngaiin ka hre lova. Kan hotute mita hmutute an ni hlawm a. Tin, khu lam an kal avangin kawng pawh a tul ang ang chu repair a ni. Tin, technical leh financial evaluation hi Mizoram sorkar tih a ni lova, Ministry of Transport & National Highways khawih vek zawk a ni. Hei hi kan hriat a tha.

**Pu LALRUATKIMA** : Pu Speaker, khawngaihin kan House leader zahawm tak kha Pre-qualification technical leh price bid kha heta tih a nih thu kha kan zawt fiah a, heta tih a ni ngei si a. Khutah selection turin R.O. ah an thawn thla a Regional Office ah, kha zawk kha a nih hmel.

\*Speech not corrected.

**Pu LAL THANHAWLA, CHIEF MINISTER** : Chu chu a ni lovin ka ring, a hre lo ten an hrilh a ni mai thei kan member zahawm tak kha. Technical leh Financial bid evaluation, heng zawng zawng hi Ministry-ah Central a tih a ni. Chu chu nakinah hriatchian ngai a nih chuan Officer ho hnenah pawh thudik hrilh turin leh chutiang a lo sawitute chu tute nge tih pawh zawnchhuah a ngai mai thei a ni.

Tin, Forest clearance hi 'in principle' a hmuh tawh a ni a. Chutiang chuan engpawhnise, kan sawi tawh angin National Highway a heng hna lianpui pui ho hi, Mizoram Contractorten a an thawh ve a siam pawh hi kan nawrna a rei tawh a, UPA sorkar atang pawhin kan nawr tawh a. Mimal tak pawhin ka tlawh thin a. Mahse, tun thleng hian kan la hlawhtling lova. Tin, a selection process-ah pawh hian kan Engineer-te tel ve se, a topography leh a hmun hretute kan ti a, tun thleng pawhin kan la hlawhtling chiah lova, kan tel ve dan hi a pawnlawi deuh a, chutiang chu a ni, Pu Speaker.

**Pu LAL THANHAWLA, CHIEF MINISTER** : Pu Speaker, a that loh hi pawl ti an awm a nih chuan Mizoram Sorkar anga pawl ti hi an vang hle mai thei a ni.

**SPEAKER** : Contractor te rinawm lohna avang hian kan ram hian a tuar nasa tih kan hre tlang a, hengho hrem theihna dan hi state hian a siam thei angem tih ngaihndan te hi ka rilruah a lo lut a.

Zawhna dang kan la leh ang a Pu K.Sangthuama leh Pu R.L.Pianmawia te intawm zawhna a ni a, a hmasa hi Pu K.Sangthuama a ni a, ani hian zawt ta mai sela.

**Pu K.SANGTHUAMA** : Pu Speaker, ka lawm e. Pu R.L.Pianmawia nen a kan zawh na Starred Question No. 92-na

- (a) Transport Office thar sak mek hi engtikah nge luah a nih ang ?
- (b) Transport Department in kum khatah Revenue engzatnge a chhun luh ?

**Pu JOHN ROTLUANGLIANA MINISTER** : Pu Speaker, ka lawm e. Starred question 92-na Member zahawm tak Pu K.Sangthuama leh Pu R.L.Pianmawia te zawhna intawm chhanna chu-

- (a) PWD in an sak zawh a Office Building hi min hlan hunah luah thuai tum a ni.
- (b) Transport Department-in kum 2014-2015-ah Revenue ₹ 21,48,12,813/- a chhung lut.

**Pu JOHN SIAMKUNGA** : Pu Speaker, ka lawm e. Transport Department hian Bus service lai engzatnge a la neih, a thar leih belh tumna te a awm em ? Tin, Sumo service a tam tawh a, a then te phei chu passenger pahnih khat bak phurh tur pawh hmu

lo an awm a ni. Chutih lai chuan sorkar Bus hi chawi belh a tlan tir reng hi enge a tulna awm tih hi ka zawt duh a ni.

**Pu SANGTHUAMA** : Pu Speaker, Pu Piana kha kan kian deuh hlek a, mahse a tih tak loh ah chuan. Transport building khi mawi hnai takin an sa a, PWD leh Transport Department ten khi khi luah theih thuai a tha khawp mai a. A chhan chu khi lamah Directorate te a awm vek mai a, khilai khi ken thawl vat a helaia lo chhuk thlak a, khilai hmun khi Sumo counter ah pawh a rem khawp mai a, chuvang chuan tunah hian sum chungchang ah hian Revised Estimate 134.2 lakhs hi a awm mek a, chu chu engvangin nge (finance lampang nge ni) sanction theih loh a nih? Chuti anih loh chuan hun rei tak helai building sak zawh deuh tawh hi hman loh in a awm mai dawn a. Hei sorkar hian 134.2 lakhs hi a sanction thei mai lawm ni tih kha kan zawt a. Chuti a nih loh chuan contractor hian sa zo mahsela pawisa hi kan bat tlat thin chuan luah loh hian rei tak min hrek thei a, chuvang chuan sorkar hian pawisa hi vbc 21.48 lai hi revenue te pawh a collect ve a ni a. Helaia 134.2 lakhs chauh pek hi chu a harsa em em dawn em ni tih kha kan zawt a ni e.

**Pu JOHN ROTLUANGLIANA, MINISTER** : Pu Speaker, zawhna neitu Pu K.Sangthuama rawn zawhna kha ni e, finance lam pangin min chhan sak awm tak a nia. PWD ah hian Transport building sakna tur a tan hian 393.3 lakhs kha chhun luh a ni tawh a. Tichuan tunah khian Revised Estimate ah khan 134.20 lakhs kha sorkar ah thehluh leh a ni tawh a, sorkar in approve a sanction a nih chuan sak zawh thuai theih beisei a ni a. Engpawhnisela, kan finance lam khan min hriatsak sela, kan mamawh khawp maia, khitalai Chaltlangah khian kan inbawk ringawt mai a, khitalai khi ISBT tura tih a ni a. Kan insawn thlak hunah Chaltlang lam khi Inter State Bus Terminal tura ruahmanna awmna sa a ni.

Member zahawm tak Pu Siamkunga zawhna kha, ni e, Sumo hi permit pawh kan pe nasa a Bus hi chawi belha tlan tir tawh awm loh tak pawh a ni reng a. Chuti chung chung pawha Bus tlan tir min ngen hi khaw tam tak an awm a, an duh angin kan service tir thei lo va. A chhan chu tunlaiah pawisa te a lo vang a, bus chuan man te a lo tlawm a, bus service hi an duh em em a. Sumo a an kal chuan an ticket man kha a lo to va, bus a an chuan chuan a ticket bakah kal kawngah chaw an la ei thei a ni. Chumi hisap chuan Bus hi an duh em em a, mahse duh angin kan pe thei lo va, tunah hian ka hriat sual loh chuan a service thei chiah chu 45 vel kan neiin ka hria a ni. Bus zat lam kha min zawt lo va, a zat chiah kha ka hre fuh lo mai thei a ni. Bus kan lei belhna tur atan pawh hian pawisa kan nei thei lo va, a hlui kan inthuan tha a, chutiang chuan kan service a ni. Tin, chumi rual rualin keini hi chu mipui lampang tana service kan nih avangin a hlep lampang um lovin mipui tan tiin kan service zawk a ni, Pu Speaker.

**SPEAKER** : Starred Question No. 93-na zat turin Dr. K. Beichhua sawm ang.

**Dr.K.BEICHHUA** : Pu Speaker, ka lawm e. Minister zahawm tak PWD changtu ka zawhna –

- a) 2014 to 2015 leh 2015 to 2016-a PWD Work Schedule-ah Zoram chhung inkalpawhna kawng enkawl nan pawisa dah a ni em ?
- b) Dah ni ta se cheng engzatnge?
- c) Pawisa hman tawh engzatnge ?

**Pu LAL THANHAWLA, CHIEF MINISTER** : Pu Speaker, member zahawm tak Dr.K.Beichhua zawhna chhanna te chu:-

a) 2014 to 2015 leh 2015 to 2016 a PWD Work Schedule-a Zoram chhung inkalpawhna kawng enkawl nan (maintenance) pawisa dah a ni lo. ( hei hi member te hriat sual palh a awm thei a) Maintenance sum hi Work Schedule-ah dah a ni ngai lo. Non Plan fund a dah a nih avangin. A hnung lamah hian hetiang lampang deuh hlek zawhna hi a awmin ka hria a, chu chu kan lo hriat lawk atan.

Tin, dah ni ta se cheng engzatnge? tih chu Works Schedule-ah kawng enkawl na dah a nih loh avangin pawisa dah a awm lo. Pawisa hman tawh engzatnge? Dah a nih loh avangin pawisa hman a awm lo tih a ni a. Chu chu nia tuna ka'n sawi ang khan Works Schedule-ah maintenance fund dah a nih lohna chhan chu Non Plan fund a ni a, Work Schedule a hian Plan Fund a mi chauh dah a ni tih kha kan hriat tlan atan.

**SPEAKER** : Lungawi thlak em? Aw, a neitu.

**DR. K. BEICHHUA** : Pu Speaker, ka zawhna hmasa kha ka rawn keng ta mai lo va. Tah khan in a pawisa amount te pawh kha a in ziak in ka hria a, chu chu ka lo dapchhuak ve ang a. A maintenance tur hian Works Schedule atanga dah lovin Non Plan ani tih kha min hrilh a. Eng pawh nise, eng Plan pawh chu lo ni ta se, tun kan dinhmun ang ah hian kan kawng dinhmun chu kan hre vek a, maintain loh chuan tihngaihna a awm lova, a khawi lam lam atang pawh khan ni ta se PWD atang tho khan a ni dawn a. Chuvang chuan tuna kan dinhmun ngaihtuah hian a bik takin Chhim lama tlan thin kan nia. Sawng Hrangchalkawn atanga Lawngtlai saw ka sawi zing viau tawh a, sawi zing pawh min ti viau maithei a, a changtu pawhin. Mahse a pawimawh em avangin ka rawn sawi leh hret ang a, saw saw resurfacing tih loh na saw a rei viau tawh mai a. Tin, ka hriat dan pheih chuan naktuk hian Commercial Joint Action Committee an ti nge maw ni, chungho chuan total bandh neih leh an tum a tih thawm te pawh ka hria a. Mahse waviin ah hian D C hovin kan en phawt ang a, a chhiatna lai te, chung atang chuan hmalakna dan tur kan thlir ho dawn nia tih a nia. (Interruption)

Pu Speaker, helam kha ka zawt lo. (Speaker : Zawt la) Chuvang chuan ka zawh loh kha chuan min lo chhang lo se a lawmawm ang tih kha Pu Speaker, ka sawi duh e.

Chuti chuan ka question chu, sawlai saw eng Plan atang pawn ni ta se, tunah hian engnge maintain na kalpui a ni em? Sawtianga kawng khwar rep rup mai, damlo te pawh in refer ngam tawh loh khawp a kawng chhe tawh saw a nia. Sawlai saw a engang Plan atang pawh sawn PWD atang hian maintain hna hi thawh a ni em tih kha ka zawhna a ni e.

**SPEAKER** : Zawhna kha, aw, Pu Ruatkima.

**Pu LALRUATKIMA** : Pu Speaker, ka lawm e. Zawhbelhna Kum 2010 – 2011 khan Finance Commission atangin State Road maintain nan Crore 32.56 hmuh a ni em? tih ka zawt a.

Tin, crore 26 a hmuh atang hian, crore 26.79 hi thil dangah pawhpen a ni em? Pawhpen a nih chuan engnge a chhan tih kha ka'n zawhbelh a ni.

\* Speech not corrected.

**SPEAKER** : Awle, a changtu Chief Minister zahawm tak i lo sawm ang.

**Pu LAL THANHAWLA, CHIEF MINISTER** : Pu Speaker, MLA zahawm tak Pu Ruatkima rawn zawhna - maintenance fund chutiang khatieng pawhpen a ni em? tih kha chu National Highway, ka tihpalh, tiang kha chu tunah hian ka chhang mai lo ang a. Sawlai Hrangchalkawn to Lawngtlai kawng saw nia a vanduai thlak khawp mai a. A tir atang khan, hun hmasa hun liam ta atang khan a bilh a tho lo kan tih ang deuh hi a ni a. Kum engemawzat an thawk thei lo va, withdraw tura nawr in an in withdraw duh lo va, helaiah pawh hian wawi duai lo ka sawi tawh he House ah pawh hian chutieng chu a ni a. Tichuan tunah hian vau na avangin an in withdraw a. Fund hi duh hun huna hmuh theih a ni lo va, a thara Central ah Ministry ah te nawr leh te a ngai a Road Project hrang te siam in chutieng chu a ni a, chuvangin helai kawng hi a vanduai thlak hrim hrim a. A tir atang khan a bilh a tho lo a ni.

Tin, tunah hian hei kan hria a fur lai a ni a. Mizoramah hian working period hi a tlem em em a. Kumin phe chu hei fur a rei a, October a ni a hei nitin ruah ala sur a ni. Tiang hun hi a vang khawp a, hetiang hun laia kawng tha tak kan beisei te pawh hi a lawmawmna lai a awm a, a lehlamah chuan kan Sawrkar hi an ring hle a ni mai awm mange aw tih te pawh a ngaihtuah theih a. Amaherawhchu, fur lai hian kawng tha tak neih hi a harsa khawp. Khung Kolkata te, Delhi te pawh khu a lo chhe ve mai a, wawi 2/1 lek an sur hian a lo chhe ve mai zel a. Keini phe hi chu a harsa lehzuah a, chutieng chu a ni a. Engpawhnise, working season a lo kal ang a, a tul ang ang hi chu

sum neih ang ang chuan thawh tan a ni leh ang a. Chutiang chu kan ramah hi chuan a kal dan hrim hrim a ni. Kan working season hi a tlem hrim hrim a, kumin pheih chu a tlem lehzuah, October-ah pawh fur a la ni reng a ni. Chuvangin thal a nih atang chuan a tul anga hnathawh tan a ni ang a fund awm ang ang in. Chu chu kum tina kan kal dan a ni a, hei hi chu tlang hriat a niin ka hria Pu Speaker.

**SPEAKER** : Awle, zawhna 94-naah kal ila. A ngai bawk Dr. K. Beichhua, MLA zahawm tak a nia, a zawt turin amah sawm ang.

**DR. K. BEICHHUA** : Pu Speaker, ka lawm e. Minister zahawm tak Disaster Management & Rehabilitation Department changtu hnena ka zawhna chu –

- a) Kum 2014 atanga vawiin thlenga ruah sur avang leh thildang vanga mihring chenna in chhia Mizoramah sorkarin a hriatpui engzatnge awm?
- b) Sorkar atanga chhawmdawlina pek an ni em tih a ni e.

**SPEAKER** : Awle, a changtu Minister zahawm tak chhang turin i sawm ang.

**Pu C. NGUNLIANCHUNGA, MINISTER** : Pu Speaker, Dr. K. Beichhua, MLA zahawm tak zawhna chhanna chu :-

- a) Kum 2014 atanga vawiin thlenga ruahsur avang leh thildang avanga mihring chenna in chhia Sorkarin a hriatpui zat chu hetiang hi a ni:
  1. Fully damaged - 663
  2. Severely damaged - 417
  3. Partially damaged - 1082
- b) Chhawmdawlina hi DDMA's kaltlangin Sorkarin a pe thin a. SDRF guidelines angin fully damaged-ah Rs 1,01,900/-, severely damaged pawh hi Rs 1,01,900/- hei hi guideline thar a ni, leh partially damaged-ah Rs 5200/- pek thin an ni. Ka lawm e.

**SPEAKER** : Awle, zawhbelhna a awm em? A awm loh chuan zawhna no. 95...

**Pu JOHN SIAMKUNGA** : Pu Speaker, khawngaihin....ka lo hmu lova. Ka zawhbelhna chu kan Minister zahawm tak hi Darzokai, Tuipui 'D' ah sawn hman deuh khan a kal a. Sawlai saw tuitla kan awm thin a, khimi khawchhak lam atanga tuitla an awm te hian sawlai Darzokai ah sawn an lo chang thin a. Khami a nih avang khan tuitla zawna tur te leh a chhanchhuahna tur life saving jacket tih vel te an lo dil a, kan Minister zahawm tak hian pek a tum thu te kha a sawi a, kha kha pek a ni ta em tih kha kan zawt duh a.

Tun tum tuilian ah pheih chuan lawi te, sazuk te a rawn len thla a. Lawi pakhat pheih chu an lo man theih hlah a saw laiah an talh nghe nghe a ani awm e.



Khatianga khawp a tuilian thin leh tuitla tam na a nih avang sawn kan Minister khan min ngaihsak a, kha kha min pe ta reng em? Kan rawt dan kha chuan SDO Civil hnenah dah nise, Tuichang lama an tlak pawn a hman pawlh theih ang a, Tuipui 'D' lam a nih pawn hman pawlh theih tur a ni ang a, chung chu a tha ang e tih te pawh an hnenah kan thlen a. Khang kha pek kan ni ta em tih kha ka'n zawt duh a ni.

**SPEAKER** : Awle, mihring chenna tihchhiat zat kha zawhna bul a ni a. Mahse, a chhan theih chuan chhang tho teh se Minister-in.

**Pu C. NGUNLIANCHUNGA, MINISTER** : Pu Speaker, South Tuipui bialtu zahawm tak Pu John Siamkunga zawhbelhna chu a mimal ang leh khaw mal angin kan pe thei lo va. Khang sawi ang equipment kan neih ang ang hi District-ah kan pe a. Tichuan District hian a tulna ang angin an sem ve mai thin a. Hnahthial lamah pawh Tuipui hnaih an nih avangin SDO (C) Hnahthial-ah pek a nih ka ring.

**Pu C. NGUNLIANCHUNGA, MINISTER** : ..... Chutimai chuan waviinah hian chumi, khami zat kan pe tih mai chu ka sawi thei lo a. District ang chuan Lunglei District-ah eng emaw zat chu kan pe a ni.

**SPEAKER** : Awle, zawhna No.95 na, a neitu MLA zahawm tak Er.Lalrinawma i sawm ang.

**Er.LALRINAWMA** : Pu Speaker, ka lawm e. LAD changtu Minister zahawm tak hnena ka Starred Question No.95 na chu –

- (a) Tun dinhmunah RGPSA Scheme hnuai atangin sum hmuh beisei a ni em?
- (b) Lo ni ta se, cheng engzatnge hmuh beisei anih ?
- (c) Heng sum te hi engtia hman tur nge ?

**SPEAKER** : Awle, a changtu Minister zahawm tak Pu P.C Lalthanliana chhang turin i sawm ang.

**Pu P.C.LALTHANLIANA, MINISTER** : Pu Speaker, member zahawm tak Er.Lalrinawma zawhna chhanna chu –

- (a) Aw, hmuh a ni e.
- (b) 2014-2015-ah hian Government of India in ₹ 552.07 hi min approve sak a. Chuta tang chuan ₹ 248.43 lakh 1<sup>st</sup> Installment atan hmuh a ni a (50%), 2<sup>nd</sup> Installment hi la hmuh beisei a ni.
- (c) Heng sum hmanna tur te chu :
  - (1) Construction and repair of Gram Panchayat Bhavan (Village Council House).
  - (2) Capacity Building & Training (Hei hi SIRD-ah pek an ni ang a).
  - (3) Setting up of State Panchayat Resource Centre (SIRD-ah bawk pek tura ruahman a ni a).

- (4) E-enablement Panchayats.
- (5) Special Support to Panchayat Process and Procedure in Panchayat with inadequate resource base. (Hetah hian V/C te ₹50,000/- theuh kan pek theih zat ang ang pek tum a ni ang)
- (6) Information Education Communication (IEC) Activities. (Hei hi SIRD-ah pek an ni ang)
- (7) Programme Management Unit State level-ah din tum a ni ang.

**SPEAKER** : Zawhbelhna a neitu Pu Rinawma.

**Er.LALRINAWMA** : Pu Speaker, ka zawhna chu tuna kan sum hmuh bak hi RGPSA Scheme kha de- link niin ka hria a, khangte kha beisei a bo ta em tih ni se. Tin, member zahawm tak tak ten Model Village te kan thlang a, kan MP zahawm tak te pawhin an thlang bawk a. Heng atan te hian he scheme hnuai atang hian ruahmanna a awm thei em tih kha ka zawhbelh lehna a ni e.

**S P E A K E R** : Aw, Pu Sangkunga'n zawt nghal se.

**Pu T.SANGKUNGA** : Pu Speaker, ka lawm e. Kha Capacity Building hnuai a pawisa awm ang ang kha SIRD-ah hlan a ni ang tih a ni deuh zel a. Hei, Labour & Employment leh IT te nen Youth Commission hi theih tawp chhuahin Village-ah te skill training kan pe a. Tunah hian mi 1400 chuang bulah kan train tawh. Nimina kan Minister zahawm takin zawhna a chhan bakah khan Village level-ah hian hmun tinah demand a awm a, training chi hrang hrang kan pe thin a. Tunah pawh kan pe leh dawn a, nau awm, awmpui tih thleng khan training pe turin Youth Commission hian Board Meeting-ah kan pass tawh a. Kan budget hi a tlangpuiin a tir atang khan ₹50 lakh hi a ni ngar ngar mai a, nuai 42 te hi kan draw thin a. Kan House Leader zahawm tak hian min han pek belh a nikum kha chuan. Kuminah pheih chuan hei hma kan la zau dawn si a heng atan te hian Village level leh a kil deuh te training pek nan te hian a tih ve theih lawm ni aw. Project SIRD in an siam anih pawhin ni hnih khat lek chhungin Youth Commission pawhin kan siam ve zung zung thei a. Heng atan te hian a tih ve theih em ? Tunah pawh demand nei nasa ber kan ni hial ang em aw kan ti a, hei a kil ber thlengin, "training min rawn pe ve teh u," an rawn ti a. Chutiang dinhmun a kil kan din avang chuan, sipai lak tur pawh a kil thlengin 'training min rawn pe ve teh u,' an ti a. Two Wheeler te a tam tawh a, a repair te, Mobile repairing te min rawn tih sak teh u tiin kil tin atangin demand a awm bawk si a. Heng hi a tih ve theih ang em aw tih kha inthlahrung takin kan zawt a ni.

**SPEAKER** : Awle, chhang turin a changtu Minister i sawm ang.

**Pu P.C.LALTHANLIANA, MINISTER** : Pu Speaker, zawhna neitu zawhbelhna kha hetiang hian han chhang ta ila – hemi RGPSA hi de-link zingah 14<sup>th</sup> Finance Commission recommendation zingah khan a tel a. Ni e, tuna kan Central sorkar kalphung khu hriatthiam a har a. Kemahni hi kan Chiang lo nge, anmahni khu an Chiang lo tih pawh hi ka hrethiam lo va. Minister a

lo kal khan kan lo hmu a, 'RGPSA hi de-link-ah a tel tawh si a. Tin, 14<sup>th</sup> Finance Commission recommendation-ah keini Mizoram leh Meghalaya leh Nagaland hi Local Body tana fund pek kan ni ta lo va. Hemi de-link a nih bawh si chuan kan tan kalpui tur project a awm lo tluk a ni,' kan ti a. 'De-link a ni lo,' a ti a. A 'Minister berin ti ta chu project rawn siam leh rawh u,' min ti ta a. Mahse de-link a nih leh nih loh hi chiang takin anni pawh khan an hre lo nge ka hre lo a, chutiang chu kan dinhmun a ni a.

Engpawhnise, 2015-16 atan hi chuan kan han theh thla ve leh phawt a. Tin, Special Assistant pek che u kan tum dawn nia an ti a. Village Council zawng zawng enkawlna tur atan nuaih vaibelchhe 128 kha chu kan theh thla a keini, Meghalaya leh Nagaland te khan. Chu chu Panchayat Ministry pawhin Finance Ministry-ah a theh lut a, a tak ram engnge tur kan hre lo a ni. Hemi scheme hnuai atang hian kan tum dan chuan Village Council House hi Model Village a MLA zawng zawngin an thlan te kha pek ngei ni se tih te kan han rel a. Amaherawhchu, tuna 1<sup>st</sup> Installment a min pek chin atanga Village Council, a norms ang a per Village Council atana ₹ 4 lakh ang a kan han tih khan Village Council 11 chiah kan sa thei dawn a. Tichuan, hmannah Guwahati-ah meeting a awm a, chutah chuan 2<sup>nd</sup> Installment hmuh leh tura hi chu Capacity Building lamah hman nisela, SIRD lamah pek vek ni se an rawn ti leh bawh si a. Chuvang chuan, tuna kan hmuh ang ang pawh hi keini LAD Department in kan duh thal a member ten hlawk zawk a mahni bial a Village Council a pek tur leh ruahman ang kha chu kan tih theih ka ring chiah ta lo va. Amaherawhchu, tuna 1<sup>st</sup> Installment kan hmuh chinah hian V/C 150 te, an resource mobilize nan ₹50,00/- theuh pek tur te hi chu tunah DLAO tin ten an thlang mek a ni tih kha ka sawiduh a.

Tin, kan member zahawm tak Pu T.Sangkunga zawhna kha – hemi RGPSA hnuai-ah hi chuan Local Body te tana thiltih a ni a. Khalai skill development training pawisa nen kha chuan inkaihnhawihpui vak theih kha a ni lovang a. Local Body a kan thlan te training pekna tur ang chi a ni a. Chumi atan chuan SIRD te leh LAD tangkawp hi a ni a. Kha lamah kha chuan keini RGPSA Scheme hnuai atang hi chuan thiltih theih a nih ka ring lo.

**S P E A K E R** : Awle, zawhna No. 96-na ah kal ila, a neitu Er.Lalrinawma, MLA zahawm tak bawh a ni. Zawt turin i sawm ang.

**Er.LALRINAWMA** : Pu Speaker, ka lawm e. Transport Department Minister zahawm tak hnena ka Starred Question No.96 na chu –

- (a) Vehicle Condemnation Board hian lirtheite a condemn dawn hian eng tehkhawng nge a hman ?
- (b) Vehicle Condemnation Board hian Department ten heng Condemn Vehicles te hi an tihralnaah a enpui leh thin em ?
- (c) The Mizoram Condemnation and Disposal of Government Vehicle Rules, 2011 hi sorkarin Rule No.1(2) & (3) in a sawi angin a kengkawh tha tawh em ?

- (d) Tha tawk nise, Rule No.10 a sub rule (1) & (4) te hi Head of Department ten an zawm tha em ? Zawm lo awm se, zawm lotu lakah tuin nge action la ang ? He Rules kalh a thil tite lakah action lak a awm tawh em ?
- e) Sorkar Motor te hi kum engzat thleng nge chhawr theih? HMV/MMV leh LMV- ah te hian repair nan cheng engzat thleng nge hman ral theih ? tih a ni e, ka lawm e.

**SPEAKER** : Awle, chhang turin a changtu Minister zahawm tak i sawm ang.

**Pu JOHN ROTLUANGLIANA, MINISTER** : Pu Speaker, member zahawm tak Er. Lalrinawma leh Pu Lalruatkima te zawhna intawm Starred Question No. 96-na chhanna chu :-

- a) Vehicle Condemnation Board hian “The Mizoram Condemnation and Disposal of the Government Vehicles Rules, 2011” hmang hian hetiang hian tehkhawng a hmang. Type of vehicle-ah HMV/MMV, Minimum life-ah 10 years, Minimum distance covered-ah 2,00,000 kms. LMV, minimum life-ah 8 years, minimum distance covered-ah 1,50,000 kms. Two wheeler leh three wheeler ah a minimum life 6 years, km 80,000.
- b) Vehicle Condemnation Board hian a condemn fel tawh chu concerned Department kutah dah a nih avangin a enpui tawh ngai lo.
- c) Kengkawh tha tawk e, hemi chungchangah hian sorkarin tun thlengin complaint a la dawng lo, tih a ni.
- d) Rule No. 10 a sub-rule(1)&(4) te hi Head of Department te hian an zawm tha vekin kan hria. Engmah complaint dawn a la awm lo. He dan hi zawm lo an awm a, sorkar-in report a dawn chuan mumal taka chhui hnuah action lak a tul a nih chuan Consitutional Head of State, Governor-in action a la ang. Condemnation Board-in he dan kalh a thil ti an awm a hre lova, chuvangin, action lak a la awm lo.
- (e) Sorkar Motor te hi chhawr theih bituk a awm lova, nimahse, condemned tur chuan minimum life HMV/MMV tan kum 10 a ni a, LMV tan kum 8 a ni. Condemnation Rules-ah chuan repair-na tur bituk a awm lo.

**SPEAKER** : Awle, Pu Lalruatkima khan zawhbelhna a nei em? A neitu ve tho a ni a, a nei hran lo a nih chuan Pu Rinawma.

**Er. LALRINAWMA** : Pu Speaker ka lawm e. Kha kan hriat ang khan LMV- ah 8 years minimum life peroid a ni a, km 150000 tlan tur a ni a. Amaherawhchu, helai in rules i rawn chhiar chhuahah hian eng emaw bikah chuan justification siam a ni ang tih ani

nghe nghe bawk a. Chutih lai chuan in motor auction thenkhatah hian LMV ah 8 years turah 7 years a ni a. MZ01D-2830-ah leh. MZ 01D-2829 ah hian 7 years ni bawk in km 132075 MZ01D 2830 a tlan a, a hmasa zawk hian, a hnuhnung ka rawn sawi khan km 120333 a tlan a. Hengte hi engtin nge helai in rules kalh si a in condemn mai hi eng ang justification nge siam nih tih kha ka zawhbelhna a ni e.

**SPEAKER** : Awle, zawhbelhna dang. A awm loh chuan chhang turin Minister zahawm tak i sawm ang.

**Pu JOHN ROTLUANGLIANA, MINISTER** : Pu Speaker, khati lai kha a particular takin kan lo hre lo va, kan lo en ang e. Chutiang a awm tih kan hre lo a ni e.

**SPEAKER** : Zawhna dang 97-naah kan kal ang a, zawhna neitu member zahawm tak Pi Vanlalawmpuii Chawngthu i sawm ang.

**PI VANLALAWMPUII CHAWNGTHU** : Pu Speaker, ka lawm e. Ka zawhna changtu Chief Minister zahawm tak chhan atan Starred Question No. 97-na Khawlailung - Hmunzawl kawng hi hmalak tumna a awm em? Fur apianga Lei (bridge) mumal loh avanga inkalpawhna thalo thin hi a buaithlak hle mai a. Hei hi changtlung zawka siam dan a awm thei ang em? ka lawm e.

**SPEAKER** : Awle, a changtu Chief Minister zahawm tak i sawm ang.

**Pu LAL THANHAWLA, CHIEF MINISTER** : Pu Speaker, member zahawm tak Pi Vanlalawmpuii Chawngthu, nimin khan I buai deuh a, nula tih tur Pi tih tur? ( Speaker : Kha kha, duh dan dan ko tawh mai ang u, kan la pi dawn tho a lawm) Kan hriat loh hlan hian a thin te kan lo tina palh ang tih a hlauhawm.

Engpawhnise, Starred Question No. 97 zawhna chhanna chu - Khawlailung-Hmunzawl kawng hi laih turin Detail Project Report pawh ni 18.9.2015 ah MORT & H-ah thehluh tawh a ni a. A kawng hi laih zawh a nih hnuah Tuichang Bridge dawh turin hma lak tum a ni. A kawng laih zawh phawt a, a hranpa-a tih tur niawm tak a ni.

**SPEAKER** : Awle, zawhbelhna a awm em? Awle, Pu Lalruatkima.

**Pu LALRUATKIMA** : Pu Speaker, Mizoram chhungah Bailey Bridge PWD hnuaiyah engzat nge awm ? Tun hnaiah heng Bailey Bridge te hi maintain a ni em tih kan zawhbelh a ni e.

\*Speech not corrected.

**SPEAKER** : Khawlailung leh Hmunzawl inkar kawng an zawt a, a chhan theih chuan chhang rawh se Chief Minister zahawm takin.

**Pu LAL THANHAWLA, CHIEF MINISTER** : Pu Speaker, kha lai Khawlailung – Hmunzawl kawngah hian Bailey Bridge a la awm lova. Chuvangin, hmun dang a mi kha chu a hla em mai ka chhang rihlo mai ang e, hun a hek e.

**SPEAKER** : Zawhna danga siam chi a ni. Tin, NI leh pi tih laia a kha Kumari ti tawh mai ila a tha ang em te ka ti a.

Awle, Starred Question No. 98-na a neitu hi pahnih an ni leh a, Pu K. Sangthuama leh Dr. Ngurdingliana, a upa zawk Pu K. Sangthuama zawt turin i sawm ang.

**PU K. SANGTHUAMA** : Pu Speaker, ka lawm e. Dr Ngurdingliana, MLA zahawm tak nena kan zawhna intawm Starred Question 98-na:-

- a) Hunthar veng lei tlahniam leh Rangvamual leimin kawng tam taka mipui tan harsatna siamtu tih kian nan Department-in eng ruahmanna nge a neih?
- b) Hunthar lei tlahniam lai khu Sorkarin engtin nge hma lak a tum tih hi kan zawhna a ni e.

**SPEAKER** : Awle, chhang turin department neitu Chief Minister zahawm tak i sawm ang.

**Pu LAL THANHAWLA, CHIEF MINISTER** : Pu Speaker, MLA zahawm takte, Pu K. Sangthuama leh Dr Ngurdingliana te zawhna Starred Question 98-na chhanna chu, a) Hunthar lei tlahniam siam tha tur hian sorkar chuan a ngaihtuah tur Task Force din in, Geotechnical leh sub-soil investigation hna thawk a, hma lak dan tur rawtna siam turin mithiam, Consultant rawih dan tur ruahman mek a ni.

Rangvamual leimin then leh a siamthat hna hi sorkar hian hmalak zel a tum a. Ni 19.9.2015 pawh khan Shri Pawan Kumar, Regional Officer (R.O.), chuan leimin na hmun hi a rawn tlawh a. Chuta min advise angin Special Repair Fund (SRF) atangin sanction turin Plan and Estimate buaipui mek a ni.

**SPEAKER** : Awle, zawhbelhna siam turin Dr. Ngurdingliana kha chance i pe hmasa ang aw, a zawhna neitu ve a ni a, aman a duh chuan. Awle, Pu K. Sangthuama.

**Pu K. SANGTHUAMA** : Pu Speaker, ka zawhbelhna tur then then chu a rawn chhannaah khan a clear mai a. Mahsela, la clear lo hi kan zawhbelh leh ang e. Hunthar lei tlahniam hi a mawng atang khuan check-dam siamna tur ruahman a ni em? Ruahman loh a nih chuan ruahmanna siam theih a ni ang em? Pakhat leh – Heng kawng chhiat lai pawh a

motor lian tha taka a kal theih nan Ramrikawn atanga PTC kawng khu tha zawka motor lian kal theihna turin siam theih a ni ang em tih kha ka zawhbelhna a ni e.

**S P E A K E R** : Awle, Chief Minister zahawm tak chhang turin i lo sawm ang.

**Pu LAL THANHAWLA, CHIEF MINISTER** : Pu Speaker, tuna kan tih lai mek member zahawm takte hriat atan han sawi hmasa lawk ila. Khu lai kawng khu a pawimawh a, chuvangin, awlai taka kal theih reng a siam hi a tul si a. Hmanni deuh lawk te phei kha chuan Car chu sawi loh Truck tan pawh kal harsa leh hrehawm khawp a ni a, namen lovin an tuar a. Chuvangin, tunah khuan temporary deuh in, in zuk hmu tawh em aw kan hotute hian ka hre lo va, PWD leh Disaster Management & Relief tangrualin khu lai kawng khu, a keh phel rup khu emergency in an siamtha a. DMR department pawisa nuai 30 vel a ni maithei e, hmangin dan in a phal angin buaipui a ni a. Tunah hian boulders te sand bags te stone aggregate te, silpaulin te hmangin siam a ni a. Ruah a sur leh vak a, a cheng nasa viau a nih loh chuan thla ruk, thla riat vel chu tha thei tur niin a rinawm a.

Tin, hei kan member, kan hotu zahawm tak ten an hre tawh maithei a, Reserve Bank of India, Governor hovin, a top tak tak Governor tih han tling phak te leh Executive Director tih angreng te leh India rama settled bank zawng zawng hian Aizawl ah naktuk atang hian State Level Bankers Meet an rawn nei dawn a, chuvangin, khu lai khu a pawimawh takzet a, chungte avang chuan hei kan hotuten an lo bei char char a, tunah khu chuan a ziaawm viau tawh a ni.

Tin, Rangvamual a lo awm leh zel a, khung khu thil pawl tak leh harsatna siamtu a ni a, namen lovin harsatna mipui tan a siam a. Hunthar lei tlahniam leh kawng hek atana tunhnai-a a hnuai a mi ang hian temporary measures lak kha kan sawi tak bakah khan kawng hrang hrangin a awm a. Kawng ulh deuh lai siamthat a ni a, hei pawh hi stone metal phah leh tawh a ni a, kawng tlahniam lai hi two lane a tlan theih turin siamthat leh tawh a ni a. Nichina ka sawi ang khan Disaster Management pawisa te pawh dan in a phal chin en in hman a ni a. Tin, dan pawn lo phal vak lo pawh nisela, Ram leh Hnam tan leh mipui tana tangkai hi chu kal zel a tha e tih ngaihtuahna te pawh a awm hial a ni, a pawimawh em avangin.

Tin, kawng hek lai dawl zauh nan hian gunny bags ringawt pawh 3300 hman a ni a. Tin, stone metal phah tawh niin tunah hian road roller a tih mam thlap tawh a ni. Hei, Hunthar veng lei tlahniam hi kan hre vek a, a paltlang tu National Highway 54 hi Border Roads Organization (BRO) enkawl thin a ni a, April 2010 atang khan Ministry of Road, Transport and Highways thu angin Mizoram PWD hnenah hlan a ni. Brahmaputra Board, Ministry of Water Resources atangin Hunthar, Venghlui leh Bethlehem lei che

dawlina tur nuai 514 hmuh a ni a. Heta tang hian nuai 319 zet hmuh tawh a nia. Hunthar Veng bik atan hian nuai za pakua leh singruk sangnga hmangin a hnuai hna tarlan te hi thawh tawh a ni. Check Dam nichina member zahawm tak Pu K. Sangthuama sawi ang chi kha.

Tin, construction of gabion two-wall below bridge connecting fire services tih te, construction of counter fort, hei hi chu a ni zut mai a, kan hre hmanin ka ring chuang lova. Hetiang hian hna pariat lai, chi hrang hrang thawh a ni a. A chung a hnathawh tarlan bakah check-dam, gabion two wall leh retaining wall, link drain, construction of falls for, raisin horizontal feature siam tum a ni. Kumina lei tlahniam a lo nasat tak em avang hian harsatna sutkian dan tur ngaihtuah a DPR thehluh thuai turin Mizoram sorkar chuan tunah hian hma a la mek a. Task force a hnuai ami ang hian a din nghe nghe a ni, Convener atan Engineer-in-Chief, PWD, member te chu - Director of Geology & Mineral Resources, Director, Disaster Management & Rehabilitation; Deputy Commissioner, Aizawl District, Er. Hrangthanga Zote, E.E., PWD; Dr. Rokima Chenkual, Core Faculty; ATI, Member Secretary atan Chief Engineer, Roads, PWD te an ni a. Hetiang hian kan hotuten nasa takin an lo ngaihtuah in an lo bawhzui mek zel a ni.

Tin, Rangvamual-a lei min khu, Pu Ramthanmawia, Laipuitlang leh Pi Lalhnuni, Saron Veng inhmun laih atanga lo in tan a ni a. Inhmun hi August, 2014 velah an lai tan a, an laih pah a min zeuh zeuh te chu an thian nghal zel thin a. Hun engemaw chen an laih hnuah lei min a nasa ta zel a, chuvangin, ni 30.10.2014 daih tawh khan D.C. Aizawl hova kal in thutlukna siam a ni a. Inhmun lai tu ten two lane National Highway 54 tlang turin thian fai rawh se tiin. Tichuan, inhmun lai tu ten an thenfai hnu pawhin lei chu a lo tawlh thla zel a, chuvangin, Aizawl D.C. ho bawkin 6.11.2014 ah en ho leh a ni a. Thutlukna chu ni thum chhung kawngpui block nise, chumi chhung chuan inhmun lai tu ten two lane bawkin thianfai leh se tiin. Tichuan, inhmun lai tute chuan ni 15-18 Nov., 2014 chhungin hna an thawk leh a, heti chung pawh hian a chung lam atangin lei a lo tawlh leh thin avangin a hnawh ping leh thin a kan hriat theuh angin. Chuvangin, nasa takin mipui tan harsatna a siam thin a ni. Fur pui lo thlen hma pawhin helai Rangvamual hmun hi motor a kal tawk tawk a nih si chuan tiin sorkar chuan en liam mai mai chi a niin hre lova. Tichuan, khatih laia Minister of State, Pu Lal Thanzara Chairman na hnuai h official hovin ni 30.1.2015 ah chuan meeting an nei leh a. Meeting chuan fur laia lei lo tawlh thla thei mai awm chu paih fai nise a ti a, pawisa tul ang chu DM&R in lo bawhzui se, tin, PWD in a thawktu tur Contractor lo ngaihtuah bawk se an ti. He thurel bawhzui hian Tanta Construction Ltd. te chu kawng chhak a lei thawl (loose soil) awm khawm paih hna chu ni 16.2.2015 khan an thawk tan a. Tichuan, ni 16.4.2015 ah a thawk zo thei chiah a, mahse a tuk leh mai ah chuan a ngai ang deuhthaw in a rawn min thla leh tho a ni. Chuvangin, D.C. ho bawkin an ngaihtuah leh a Committee te nen a hmunah te pawh vawi engemawzat an zuk kal a, tichuan rinphak bak lei a lo min leh thin a nih chuan



District Disaster Management Authority in hma la se, mawh lo la se ti in tunah hian thu hnutchhiah a ni. Pu Speaker, kumin hian Mizoramah fur te a na a, lei tla hniam hi khulai ah chauh ni lo hmun tam tak ah a awm a ni. Ngopa ah te, khawi khawi emaw Saiha lam ah te pawh, chuvang chuan nasa takin sawrkar hun a la a, tin, sum pawh nasa takin sen a ni a. Heng hi National Disaster Management Authority ah te thlenin mi thiamte pawh an rawn tir a, tiang chuan a tul ang ang in Disaster Management Minister ho in Official ten hma an la a, mahse chutiang chung pawhin duhthu a sam thei lo hle a. Engpawhnise lang in, hei hian mipui harsatna a siam avangin sawrkar in a tha thei ang ber leh a tul ang ang chu thawk turin a in peih chho a, hma a la chho mek zel a ni. Tin, khu lai lei tlahniam khu a kal zel chuan, he tia han rin chhoh hi chuan Chief Minister Bungalow leh a chhehvel hi a rawn tin zawn ruih nghe nghe a. Nakinah Rail Station te a rawn awm phei chuan khu lai khu a pawimawh leh zual dawn avangin nichina member zahawm tak Pu K.Sangthuama rawn sawi ang khan he mi alternate road pawh hi ngaihthah chi a ni lo tih sawrkar in a hria a ni.

**SPEAKER :** Hei, zawhna hun hi a ral mai dawn a, Pu Lalruatkima.

**Pu LALRUATKIMA :** Pu Speaker, ka lawm e. Ka starred question no. 99-na rang deuh in kan chhiar ang e. Industries Minister changtu zahawm tak chhan atan.

- a) Public Sector Enterprise – ZENICS, ZOHANDCO, ZIDCO, MIFCO te hi thiah tum an ni em? Anih chuan engvanga thiah tur nge an nih ?
- b) PSE-te hian Loan/Leiba an nei em? An neih chuan engzatnge Loan/Leiba an neih ?
- c) PSE-thawktute awm zel dan tur eng angin nge ruahman a nih? tih ka zawt e.

\* Speech not corrected.

**SPEAKER :** Aw le, Minister zahawm tak chhantir hram ang aw.

**PU H.ROHLUNA :** Pu Speaker, member zahawm tak Pu Lalruatkima zawhna Starred Question no. 99 na chhanna chu –

- a) Mizoram Sorkarin Public Sector Enterprise thiah a tum zingah ZENICS & ZOHANDCO te an tel ve. Thiah a tum chhan chu Sorkar sum inremchemna vang a ni a. Hei hi MAMCO chungchang zawhna hmasa ah pawh kan chhang tawh a, Consulting Firm ten a restructuring leh khatianga rawtna an siam angin Sorkarin hma a la ni. ZIDCO erawhchu thiah ve loh tur a ni a, Restructuring kalpui tura tih a ni. MIFCO hi privatize tur a ni.
- b) Nei e. Leiba an neih dan chu hetiang hi a ni :-
  - 1) MIFCO hian leiba Rs 212.50 lakh a nei.
  - 2) ZIDCO - (a) NMDFC Rs 1338.69 lakh as on 26.9.2015  
(b) HUDCO - ₹ 1132.69 lakh as on 26.09.2015
  - 3) ZOHANDCO - NIL
  - 4) ZENICS - NIL

- c) Mizoram Public Sector Enterprise Early Retirement Rules ( ERR ), 2015 hmanga chhuah ( retire ) tir tum an nia a, a chhuak bange chu Special Scheme for Recruitment of Employess of the Closed Public Sector Enterprises Under the Government of Mizoram ang in kalpui tum a ni.

**SPEAKER** : Aw le, question hour a ral ta a, tunah hian laying of papers ah kan kal ang a, Pu Lal Thanhawla, Chief Minister zahawm takin heng a hnuai ami te –

- 1) Annual Report 2014 – 2015 ( 1st April 2014 – 31<sup>st</sup> March 2015 ) of Mizoram Information Commission.
- 2) The Mizoram Right to Public Service Rules, 2015 te hi House dawhkanah lay turin i sawm ang.
- 3)

**Pu LAL THANHAWLA, CHIEF MINISTER** : Pu Speaker, i phalna leh he House zahawm tak remtihpuinain –

- 1) Annual Report 2014 – 2015 ( 1st April 2014 – 31<sup>st</sup> March 2015 ) of Mizoram Information Commission.
- 2) The Mizoram Right to Public Service Rules, 2015 te hi he House zahawm tak ah ka rawn lay e. Ka lawm e .

**SPEAKER** : A copy kha sem ni se. Aw le, kan chankim chuan Pu R.Lalzirliana, Home Minister zahawm takin ‘ The Mizoram Private Security Agencies ( First Amendment ) Rules, 2013 hi House dawhkanah lay sela, i lo sawm ang.

**Pu R.LALZIRLIANA, MINISTER** : Pu Speaker, i remtihna leh House remtihna ‘ The Mizoram Private Security Agencies (First Amendment) Rules, 2013’ hi House ah ka rawn pharh e.

**SPEAKER** : Aw le, a copy kha sem ni se. Copy sem chungin Chair kan inthlak lawk ang e.

**DEPUTY SPEAKER** : A copy kan changkim maw? Aw le, tunah chuan Financial Business-ah kan kal ang a. Vawiin atangin Budget discussion & Voting on Demand ah kan kal dawn a. Vawiin hian Minister pathum te demand Pu Lalsawta, Pu P.C.Lalthanliana leh Pu B.D.Chakma te demand kan la dawn a, Minister pathum te demand hi tumkhatah lakhawm mai ila, tichuan hun kan hmang daihzai zawk in ka ring a, a tha kan ti mai em? Tha kan ti mai maw?

Aw le, tunah chuan Pu Lalsawta, Minister zahawm takin Demand No. 4 - Law & Judicial ₹ 29,87,72,000 Demand No.8 Taxation ₹ 14,64,53,000 Demand No. 9 Finance Department ₹ 10,19,86,00,000 Demand No. 14 Planning & Programme Implementation ₹ 4,04,47,20,000 te hi House ah rawn submit sela, i lo sawm ang.

**Pu LALSAWTA, MINISTER** : Pu Deputy Speaker , on the recommendation of the Governor of Mizoram and with your permission Sir, I move the demands No. 4, 8, 9 & 14 for ₹ 14,68,85,45,000 only for meeting expenses during 2015 – 2016 in respect of the following departments. Demand No. 4 - Law & Judicial ₹ 29,87,72,000, Demand No.8 - Taxation ₹ 14,64,53,000 Demand No. 9 - Finance Department ₹ 10,19,86,00,000, Demand No .14 - Planning & Programme Implementation ₹ 4,04,47,20,000, total ₹ 14,68,85,45,000/-.

Thank you Sir.

**DEPUTY SPEAKER** : Awle, tunah Pu P.C.Lalthanliana, Minister zahawm takin a demand No.19 - Local Administration Department - ₹28,85,08,000 crore, Demand No.29 - Social Welfare Department - ₹1,28,06,03,000 crore, Demand No.32 - Horticulture Department - ₹94,70,51,000 crore te House-ahrawn submit sela, ilo sawm ang.

**Pu P.C. LALTHANLIANA, MINISTER** : Hon'ble Dy.Speaker Sir, on the recommendation of the Governor of Mizoram and with your permission Sir, I move the demand No.19, 29 and 32 for ₹2,51,61,62,000 crore only, for meeting expenses during 2015-2016 in respect of the following departments. Demand No.19 – Local Administration Department - ₹28,85,08,000 crore, Demand No.29 – Social Welfare Department - ₹ 1,28,06,03,000 crore, Demand No.32 – Horticulture Department - ₹ 94,70,51,000 crore, total - ₹2,51,61,62,000 crore, thank you Sir.

**DEPUTY SPEAKER** : Awle, tunah Pu B.D.Chakma, Minister zahawm takin a Demand No.35 – Fisheries department - ₹13,34,43,000 crore, Demand No.41-Sericulture department - ₹16,08,36,000 crore te House-ahrawn submit sela.

**Pu B.D. CHAKMA, MINISTER** : Hon'ble Dy.Speaker Sir, on the recommendation of the Governor of Mizoram and with your permission Sir, I move the demand No.35 and 41 for ₹29,42,79,000 crore only, for meeting the expenses during 2015-2016 in respect of the following departments. Demand No.35 – Fisheries department - ₹13,34,43,000 crore only, Demand No.41 – Sericulture department - ₹16,08,36,000 crore, total - ₹29,42,79,000 crore only, thank you Sir.

**DEPUTY SPEAKER** : Awle, tunah Minister 3-ten an demand anrawn submit ta a, kan sawiho ang a, hei hi vawiina pass ngei tur a ni dawn a ni. Chuvangin, sawi duh nei chuan inkian khawtlai lovin sawi vat vat ila a tha awm e. Member te minute 10 inpe ila tha kan ti mai em? Tha kan ti maw? Le, minute10 kan inpe ang a, tunge sawi hmasa ang le? Sawiduh kan awm loh chuan pass kan dil tir mai dawn em ni? Kan inkian thin a, a tawp lamah kan inchuh leh si a, aw, Er.Lalrinawma ilo sawm ang.

**Er. LALRINAWMA** : Pu Dy.Speaker ka lawm e. Nia, hei vawiin ah demand hrang hrang kan minister zahawm tak tak 3 te chan 1 kan han sawi dawn a ni a. Nimin ah finance

lampang kan sawi tawh a, engpawhnise, sawi kim te pawh a har mai thei a. Mahni ngaihven zawng zawng ti mai ila pawimawh tih zawng zawng te han sawi ta ila.

A hmasa berah chuan kan sawi duh lai chu hei kan minister zahawm tak ten demand an rawn nei a. Chutih rual a hre ve se kan duh lai chu hei nimin a kan sawi ang khan non-tax revenue ah hian kha hmana ni a kan sawi ang deuh khan kum 6 kal ta chhung hian crore 190-in kan budget estimate hi kan pha lova. Chu chu kum6 chhung chuan kumtin crore 3 ang velin kan pha lo tihna ang a ni a, chawhrual chuan. Vawiin nia khami non-tax revenue kan beisei kha finance mithiam ten sum dawn tur lam ah an lo chingfel tawh si a. Kha kha kan hmuh kim leh loh kha chuan engamah hmaa leiba min siamsak tu kha a ni nghal ringawt mai a. Chuvang chuan , kan minister zahawm tak tak te pawn tan la se langin, demand an rawn neih rual chiah hian anni pawhin heng non-tax revenue a kan hmuh tur te, kan hmuh theih ngei tur hian tan la ve selangin anmahni department theuh ah tih kha vawiin niah kan sawi duh a. Chulo ah chuan, anmahnin demand kan pass pui a, chutih rual chuan anmahni lam atanga kan beisei tur kan hmuh kim leh siloh chuan thawk aphit ah leiba kan nei nghal ringawt mai dawn tihna ani tih kha kan sawi nawn duh a. Tin, kan lo hmu kim lo palh a nih pawhin kumtawp ah engvanga hmu kim lo nge kan ni tih kha review committee kan ti dawn nge ni ennawna neih hial chi niin ka hria, tih kha a hmasa ah kan sawi duh a.

Tin, finance hrim hrim bik ah hi chuan Pu Dy.Speaker, kan in sawithaih deuh em maw ni chu aw ka tia, hei ka thiam angin kan ngaihtuah ve mai mai a. Central atanga transfer liantham deuh kan han neih thin a bik takin NCA ah te, SCA ah te, SPA ah te nikum a kan hmuh, kumin ah kan hmuh dawn tak loh a awm nual a. Ama'rawhchu, nikum chhunga NCA ah leh SCA ah leh SPA ah leh devolution of tax ah leh deficit grant-a kan hmuh hi crore 3223 vel bawr a ni a. Ama'rawhchu, kumina devolution of tax ah leh deficit grant-a kan hmuh tur ringawt belhkhawm 2670 crore leh 2139 crore belhkhawm hi 4809 crore a tling phak a. Chuti a nih chuan hemi a chuanna ringawt pawh hi crore 1585 ala chuang liam tihna ang deuh a ni a. Chumai piah lamah nimina kan ngaihtlak tawh ang khan central scheme engemaw zat 100% finance tur a rawn kal leh nghal a, heng zing ah hian PMGSY, MNREGA leh NSAP te pawh kha a rawn tel nghe nghe a. Chuti anih chuan a hma ai hian engvangnge maw kan han zam chiam vak ang le? Mipui hi kan ti hlauthawng lutuk lo maw? tih lai kha ka rilru ah a awm a. Kha kha kan sawi duh a, kha kha finance lam a ka sawi theih ni ta mai ta selangin.

Taxation bik ah hi chuan hei tunlai chu online hi a lar khawp mai a, nikumah pawh kan sawi a, a lehlamah chuan online atangin chhiah kan la thei bawk silo a, marketah bungraw hrang hrang a rawn lut nasa bawk si a, a then te phei chu han thlir ta ila online buaipui in Jabong an ti nge Myntra an tia mi, khatiang hrang hrang a buai char char a, tuipei em em kan awm a ni. Khangte khan thil tam tak chah lutin he ramah hian an chah lut a, chutihrual erawhchuan market ah sumdawng tam tak an thil hralh tur te kha a tibuai ve leh thung si a, heng controlna a awm chuan bawk siloh chuan thil hi a buaithlak viau dawn awm mang e, ka ti a, heng te pawh hi thil har lutuk

turah ka ngai lo a. Heng hian kan market volume tam tak a tih tlak hniam avangin chhiah kan hmuh tur ang kan hmuh theih loh phah a, tax bikah tak hi chuan kan thawk tha phian chuan ka hria a. Amaherawhchu sum a harsa a, kan duh ang tak takin thil a kal thei lo a, chuangchuan heng lamah te hian tan la ilang, hetia kan in sezawl chhuah tawp hi chuanin dawrkai, kan chhiah khawn na te, kan inspector ten hna bera an neihnate, tax lak an hmuh ve tur ang angah hian thil tam takah buaina a thleng a ni tih kha hre ta ila, khalai kha Pu Dy. Speaker ka'n sawi duh a.

Tin, Planning chungchang leh Law & Judicial chungchang hi tlem kan sawi duh a, hmanni lawk khan kha eviction law chungchang kha kan Law Minister zahawm tak min chhanna ah khan 'Central Act a ni a, Mizoram adopt a ngai tawh lo e,' a ti a. Chutihruah chuan Estate Officer kan nei a vawiin hian kan estate officer hian building furnishing hna an thawk a, enchiang ta ila hei eviction law hi, ka kawl nghe nghe a. Heng ente hi chuan thu neihna sang tak mai pek an ni a, chuang chuan Estate Officer ten he eviction law tlawh chhanin an hna te an thawk a nga, sawrkar building dan lo a luah te chinfel a nih theihna tur chuan Estate Officer te thuneihna kan pek a ngai a ni. vawiin ah kan ramah Estate officer ten an nih phung an pha lo a, vawiinah chuan House furnishing ti turin kan dah mai mai a, SDO rank kan pe ve a, chuangin kan Law Minister pawhin ngaihtuahna min lo sen sakin, hei hi chu min lo en nawn sak leh se, he ram hian a mamawh a ni tih lai hi vawiin ni ah hianin kan sawi duh a ni.

Tin, Planning chungchangah chuan Planning a kan chanvo a kha hemi State economy chhut chhuah te pawh a ni a, kan GSDP hmanni a kan sawi anga forty four point something a an kang ngawt mai kha, ram in mipuiin kan hriat loh a thil kang, kha ti taka nasa si kha chu a thatna kan tel ngei ngei tur a ni a, amaherawhchu khati taka GSDP kang si kha chu amak ka ti a. Nikum hmasa te lawkah te 10 %, 15 % akang kan ti a, vawiin ni ah 44 % vel kan ti a nih si chuan Planning lampang hianin helai ah hianin information chu kan pe ni in alang a kan lehkhabu hrang hrang neih ah te hian, information hi kan in pe dik tawk lo em ni, tih lai kha rilru ah a awm a. Chuangchuan statistic dik leh felfai kha ram in a mamawh tak meuh meuh a ni vawiin ah hian. Chulaiah chuan Planning chungchangah pawh chulai chu min lo hriat sak se kan duh a, chumai piah lamah hemi kan ram kan enkawl danah vawiin ni ah Youth Commission te pawh kan ti a, ram dangah kan in thawn chhuak a, hai palh kan nei a ni. Ram khawvela hlu ber Pathian pawhin a siam belh tawh loh ram kan neia Mizoram ah hian, ram tha deuh mai. Hmun dangah thalaite kan in thawn chhuaka, a dik e. Chutihruah chuan he ram ngei hnuchhawn a, hmun danga ei va zawnga a nihna takah chuan kan ram kan hman tangkai hi chuan keimahni ngei kha 'Master' 'neitu nihna' nen kan kal dawn a ni a, mi rama kan in thawn chhuah tam poh leh hlawhfa kan chhuah hnem tihna a ni dawn a ni. Chuangin hlawhfa thinlung pu lo a, he ram hmang tangkai tura man power chungchangah hian tan kan lak a ngai niin ka hria a; chuti a nih loh chuanin kan thalai ten, he an ram mahni buzawl ngeia kan ram tha lutuk hi hman tangkaina chang hre lo in hmun dang kha ram tha zawk emaw ti in, he ram ngaihsak miahlo hian an chhuahsan thei a ni. Chuangchuan helaiah man power kan ti a, hmun danga kan ti chhuak a nih pawh hian he ram hi ching bawla, eitlaka siama theih pa tawpa chhuah turin kan thalai te hnenah hian chi tuh ila a tha lehzualin kan ringa, kal

kawp se ka tih na deuh ber a nih chu. Chuvangchuan helaiah hian kan thalai te pawhin he ramah ngeiah khawvel ram hlu kan pi leh puten min lo sahchhuah sa hi ram zau tak kan nei tih hi I hrihl leh mawlh mawlh ang u, tih hi kan sawi duh a. A chhan chu Vairengte pelah khu lamah hna tha hlir a awm emaw an ti ang tih a hlauhawm a, chuvangin helaiah ngei hian a awm a eisen loh, han hawi vel ila ram enkawl loh kan ngah lutuk. Heng te hi hna kan thawh chuan mi ram a kan thawh anga kan thawh chuan ei a awm a ni tah hian, he ramah ngei hian a awm a ni tih kha Planning lampang pawh hian kan rilru ah awm se, man power pawh hi kan chanvo a nih tho avangin tih kha kan sawi duh a ni. Tin, chu chu kan Finance Minister Demand No.4, No.8, No.9 leh No.14 a ka sawi theih ni mai ta selangin.

Tin, Demand No. 19, No. 29 leh No.32 a kan sawi leh duh chu, Local Administration Department bikah chuan, hei kan tan a ngai hle in ka hria a. 13<sup>th</sup> Finance Commission hi ka sawi lo thei lo a keichuan, LAD atan hian a vaiin 13<sup>th</sup> Finance Commission hian ₹ 131.80 crores, ₹ 1,031,80 lakhs general basic grant ah min rawn recommend a, tichuan performance grant ah hianin ₹ 6979 lakhs min recommend bawk a, tichuanin vawiin ni thlenga min la release loh hi basic grant ah hian ₹ 6275.97 lakhs a awm a, release loh performance grant ah hian ₹ 5095.84 lakhs la awm a ni. Chumai piah lamah kan hman tawh sa UC kan submit loh pawh Dt 1.4.2015 chiah chiah ah khan ₹ 1336.52 lakhs man general basic grant ah a awm a. Kan hmuh loh a hi general basic lamah hian 47.62 % vel kan dawng pha lo a, performance grant ah phei chuanin 73.1% lai kan dawng lo a ni. Chuvangin hetah hian tan kan ngai tak meuh meuh a ni tih kha kan sawi duh a, a chhan chu kan V.C te an hah em em a, Pu Dy Speaker, hun min pe tlem si a, kan sawi bang leh a, a tawpah khan lo dil belh reng kha a nuam bik bawk silova, Pu Dy. Speaker min lo hrethiam lawk. Tichuanin kan VC te an hah em em a, thingtlangah, khual chhia khual tha an thlenga, akal apiangin kan ti buaia. MLA pawh kal ila VC in min lo mikhual a khatiang zel khan, chuvangchuan kan V.C te hi an hah a, hemi kan sawi kai duh nachhan chu ni 100 inhlawhna material component a pawh an mahni kan pe ve mumal lo deuh a, khang thleng te pawh khan in kan VC te dinhmun hi, tunlaia RGPSA scheme te pawh VC tih chaknan kan ti a, amaherawhchu sum leh pai lama tan kan lak pui siloh chuan in kan local body te duh angin kan ti chak lo ang tih kha a hlauhawm khawpin ka hria a, ti chuan tan han la leh deuh ta ila. Anni pawh kan sawi duh chu Non- Tax Revenue ah khan tan la ilangin vawiin ni a Demand kan neih chuan tih kha Pu Deputy Speaker kan sawi duh a.

Tin, Horticulture Department bikah hian han sawi leh thuak thuak ta ila, hei Horti hi vawiin ni ah pawh Unstarred ah kan dawnga thlai chi supply tu ber an ni a, an pawimawh a, ka biala han luh lawk kan duh a. Baktawng tlangnuam ah khian aloevera an ching teuh maia, sahbawn an siama tikhian a theih ang ang in an hralh a. Tin tunah khian a complex a awm angai an tih avangin MLA fund pawhin engemaw zat kawng kan laihsaka khami bakah hmun khatah ram kha theh khawmin an awm khawm a ni a. Chung te chu kawnglaihnate pawh a awm theih chuan min han hriat sak hram hram se kan duh a, engemaw chen kan lai tawh a, tunah khian hmun khatah awm khawm leh in engemaw zat pawh an neih tawh chinah kan thar tawh a, sahbawm siamin ti

khian an buai ve tlak tlak a ni. Khilaia an hnathawhah hlawhtlinna a awm a, min lo hriatsak hram hram se tih kha kan duh a ni.

Tin, Social Welfare bikah hi chuanin tar chawmnate kumin ah hi chuanin cent per cent rawn kal tawh turin lang a ni a, NSA kha, khang ah te pawh khan tun hma zawng aiin kan upa pawl lampang te pawhin an dinhmun te pawh tha deuh turah ngai ta ila. Hmanni ah an pawisa hmuh kimloh dante min rawn hrilh nghe nghe a, khang te pawh kha min lo ensak selangin, State level Committee ah phei chuanin ka sawi tho a, an ni khan anmahni department ah aniang tiin min chhang a, an account bu nen, pay book nen an rawn kala an rawn mangang hle a ni, tih kha kan sawi duh a. ( Deputy Speaker : tih tawp tum dawn tawh la) Pu Deputy Speaker, Demand No.3 na hi kan sawi sak leh loh chuanin a vui ang tih ka hlau si a, kan Minister zahawm tak Pu B.D Chakma hi, minute hnih khat lek, Demand No 35 leh 41 na.

Fisheries Department chungchang bik hi sawi kan duh laia chu, vawiin ni thleng hian Fisheries Department hian kan farmer card emaw, chhinchhiahna kan neilo niin ka hria a, kan thil sem reng reng in subsidy in kan pe a, hei hi ramin a ngeih ber em, a tha ber em tih hi kan ngaihtuah ngaiin ka hria a. Sangha chu a tui si a, a sangha farm nei mang lo, dil nei mang lo pawhin a chi sem dawnah chuanin, kan atan tal pawh dawh a lo itawm ve si a, tikhan a thlawna dawn na na na chu tikhan an lo dawh ve zel lo thei lo a, hei 100 mm lai te phei chu 4 inches lai alo kai tawh a tui tham ve deuh tawh mai a nia. Chuvang chuanin heng a thlawna kan sem a hi kan ngaihtuah let a tha awm mang e, tih ka ngaihtuah deuha. A chhan chu a thlawna kan pek ringawt laiah hian enge maw man nei chuan ti ve ila chuan a sangha chi mamawh lo na na na kha chuan aman nei chuan an dawn duh ka ring lo a, chuvangchuan man tlemte pawh han ti ila chuanin, dawng ringawt kha an tlem ka ringa. Tin, a dawngtute pawhin a thlawna an dawn a nih avangin, no li no ngatur pawh lo nita se no hnih pawh pe se an sawi buai lo ang. A thlawna a nih miau avang khan, chuvangchuan a thlawna kan sem avang khan a supplier hi an hlawk ber mai awm mang e aw, ka ti. No 100 pek turah hian no 70 pawh pe ila, a thlawna an dawn miau avangin no 70 kha a thlawna a nih tawh avangin an sawisel duh kha a rinawm silo a kan beneficiaries ten, henge te pawh hi kan en nawn angai a ni. Thil thlawna pek kan ti a, a that rualin helaiiah tute emaw kan siam lenna mai mai kha a ni ang tih te kha a hlauhawm em em a. Tin, an ni Fisheries te phei chu an sangha supply-ah khatiang khan chanchin bu ah te kan lo hmu a, sum hi an ngaihtuah chian deuh chu a ngai a ni. Rate kha ka hriat sual loh chuanin rampum rate awm laiin, rate pakhat zawk khan an han pe a, cheng nuai 80 chuang dawnlai mai kha an ti buai ang khan chanchinbu ah te khan alo langa, khangte kha a pawl ka ti a. Vawiin ni a Demand an han sawi te pawh hi kan lo enchiang tur a ni, vawiin a kan suppl-na rate te leh khatiang kha rate nilo zawk a thil kan tih chuan thil hi a fello a, chuvangchuan hun lo kal turah fimkhur nan hmang ta ilangin. Vawiin ni ah pawh Demand an sawia , pawisa an mamawh ve leh tho a, pawisa kan mamawh rual chuan kan ren angai a ni. Chuvang chuan fishery te pawh, horticulture te pawh, kan vaiin non-tax revenue lam a sawrkar in min tuk ve kha hmuh kim i tum ang u. Kan hmu lo anih pawhin a review na tal i nei thin ang u, kan hmuh kim loh kha chuan

sawrkar leiba ah a chang nghal zel a ni tih kha ka sawi duh a ni. Pu Deputy Speaker, hun min pek belh avangin ka lawm e.

**DEPUTY SPEAKER** : Minute sawmpanga hun hmang. Department zawng zawng sawi duh phei chuan pakhat a thluai thlum vak khan a dang kha a nekchep tih hriat tur ania. Kan duhtak leh hria se kan tih kha sawi mai ni se, pakhat a kan thluai thlum vak chuan hun kha kan in sem zai a ngai si a member te sawi duh kan tam chuan, sawi vek tir che u kan duh si a. Chuvang chuan hun hmanthiam deuh hlek kha a tha a ni. Tunge han sawi vele ang le? Pu T. Sangkunga.

**Pu T. SANGKUNGA** : Pu Deputy Speaker, ka lawm e. Vawiinah kan Minister pathum lai demand tha tak tak kan sawiho dawn a, hun tha tak kan neih avangin a lawmawm ka ti a.

A hmasa ber a ka sawi duh chu Horticulture Department Demand no.32 a ni a. Horticulture department ah hian college te kan nei dawn a, peih tep a ni tawh a, kan Minister leh kan House Leader te an fakawm hle in ka hria a. Hma tha tak a an lak avangin reilote kan awm ve chhung a a hmun in pawt buai te, a chi hrang hrang kha fel takin an chingfel thei a, chuvangin kan project tan a ni dawn tep ni te in kan lo hria a, lawmawm ka ti a. Tin, thil puitling tak tak Chite ah, Horticulture Centre ah Scion Bank tih te, tin, a chi hrang hrang Centre of Excellence, Thiak, Thingdawl leh Saichho a tih tur te. Tunah Thiak leh Thingdawl phei khu chu peih thawkhat tawh a ni a, Thiak phei chu tha takin loneitu te pawhin an chhawr leh department pawhin thil chi hrang hrang siam nan an hmang a; hei hi tangkai zawk a siam dan a awm em aw tih ka ngaihtuah a. Horticulture Centre, Chite ami phei khu chu Israel material vek hman a ni a, a tha em em mai a, khung ang khu farmer ten tangkai zawk a an hman theih tur hian thil kui tiah na, a chi tha tak tak kan neih ang, thingtlang mi ten an mamawh em em farmer ho ten an chin tur ah hian khu aia tangkai zawk a hman dan a awm em aw tih hirawn ngaihtuah zau leh deuh se ka duh a. Hmun tam tak ka kalna ah hian a chi tha lo, tu tu ten emaw an zawrh kan lei thin hi farmer ho hlawhchham na leh kum nga vel an han enkawl a, a suak alo nih hian, an hlawhchham satliah mai lova, an farm te an tihral phah thin a. Heng ah hian tuna kan mamawh em em leh Zorama tha duh tak tak, entirnan kiwi tih te, dragon fruit han tih te, kuhva te pawh a rawn zuartu ten a kung tuai kui tiah an rawn ken phei chuan, a tuai rah te a tha lo tih a ni si a; ngaihtat thlak thap, theihai te pawh kawlechaw theihai kan tih ah pawh a tuai deuh, a rah no deuh te an kui kha chuan a tha leh thin si lova. Chuvang chuan a rah chang, hmin tha, kung puitling tha ami han tihdan ang chi te a chi tha hi kan farmer ten an mamawh tak zet zet a. Heng atan hian tangkai leh zual zawk in a hman theih em tih kan sawi duh a.

Tin, hmun hrang hrangah ka bial ah pawh a ni a, Tea India tunlai hian an lo lut a, pawisa an ngah si a, British ho in India an tih khawloh na pakhat ania. Assam-ah te pawh thingpui an rawn ching a, Assamese ho in an sik peih tak tak si lova, Tea Tribe kan tih ho, khawi khawi ami emaw mi hnuaihngung tlem te te a chhawr tur an lo lut a. Tu tu te nen emaw an lo inneih pawlh a an lo awm rei kha chuan kan lo in khawngaih a, voter zing ah an lo tel ta a, tihngaih na reng reng a



awm tawh lo. Assam ah khuan. Tea Tribe ho duhloh na lamah an tanrual vaih chuan sawrkar siam thei an awm tawh dawn lo emaw tih tur khawp in Tea Tribe ho khu an lo pawimawh ta a.

Tunhma deuh khan, kum hnih kum thum kal ta lek ah Horticulture ah kan awm ve lai in hetiang hi rawn tihchhuah an tum a, India rama an hotupa ber an chairman a lokal a. Kan Chief Minister zahawm tak hi sawi hona an rawn neihna ah chairman tur in an rawn ti a, kan Minister khatih lai a Pu Liansailova kha kan Chief Minister in a hrilh a, ‘Assam te pawh an chhiat na a ni a, heng ho hi encourage reng reng tur a ni lo. Ka chair dawn lova nang pawh lo chair duh miah suh’ a ti a. Pu Liansailova kha chair turin an ti a, a ni pawhin a hnial a, kan Director kan Secretary tal hi chair sela a ti a, kan Minister in ‘Pu Sangkung nang pawh chair lo rawh, Director ho in lo ti ve mai mai teh se’ a ti a. Tunah hian an rawn vak darh leh ta a, kan bial ah te pawh ram, village council authority in an allot a, kui tiah an tum a an phur nasa mai a. Hmanni Champhai a vigilance and monitoring committee ah pawh khan ka han tel a, engemaw zat tih an lo tum a, Project Director leh Officer zawng zawng hma ah a that loh tur zia leh thingpui sih hi a hlawk miah lo ania, cheng zali man sih a har lutuk, zahnih zathum man sih hi har deuh mai a ni taima tan lo chuan. A khawl awm mah se tih hi a har a, churang chuan nakinah chuan kan sik peih lo ang a, farmer Training ka kal tel reng reng ah pitar leh putar kum upa lam an lokal a, thalai an tel tawh mang lo a ni. Horticulture leh Agriculture chung ah hian kum sawm dawn lai ka awm a, Farmer Meet kan neih hian thalai an tlem em em tawh a ni. Churang in tuna kan senior te mual an liam chuan thingpui sik peih tur thalai hi kan tam hi ka ring thei lova. Kan ram ah inchiah piah lova, ram leh hnam humhalh na pawimawh tak mai chu Tea India hi lo lut lo sela, thingpui chin hi encourage lo ila tih hi vawinah Horticulture demand sawi na ah hian ka sawi duh a ni.

Tin, a dawt leh ah chuan Demand no.19, LAD hi ka sawi leh duh a. LAD ah hian sawi tur tam tak a awm a, ram in kan chhawr tur leh kan Village Council Authority nen a inhne an ni a. Sawi tur tam tak a awm lai in hun a tawi si a pakhat chiah kan sawi ang a. The Mizoram Forest Act, 1955; Mizo District Council in an pass, Section 11; Town Forest Reserve, Section 12, ‘Power to constitute village forest reserve’ tih leh, Town Forest Reserve, Section 11 leh 12 kha ka sawi duh a. He section hi kan hmang mang reng reng lo mai a, LAD ah khan kar khat vel Secretary ka ni ve zawk a. Chutih lai tak chuan Reiek ngawpui khu VC in hman a an lo theh tawh kha a neitu ten an vat a ni. Pu R. Zamawia, Zofate zin kawngah zalenna mei a mit tur a ni lo tih siamtu khuan mi rawn phone a. “Pu Sangkung YMA ho zuk tlan teh u Reiek ngawpui (Ailawng ram a ni deuh ber a), a tamzawk Ailawng ngawpui an thiat a ni ringawt mai,” a ti a. Central YMA President ka nih lai te a lo ni baw a. Forest ho leh Central YMA hruaitute kha an zuk tlan thla a, kan phone kual a, ngaw thiat chu an zuk titawp a, chuta ka rilru a lo lang chu he Act hmang hian (District Council in dan tha tak mai an pass hmang hian) kan Forest Reserve tam tak hi declaration siama Gazette chhuah khan ramngaw reserve ah Village emaw Town Forest Reserve ah a puan theih a. Law Secretary ka bula thu kha, kha Act kha ka keng pheih in “he Act hi kan invoke thei em?” ka ti a, thei e hei hi an hmanglo lutuk a, hmang ulangin ngaw hi reserve ah puan zung zung theih ani a, a sam khai ber, hei hi hmang teh u a ti a, kan LAD Minister zahawm tak tun a mi tho hi a zinlai a bo sia,

Minister on tour tiin Chief Minister-ah File ka direct a. A lo let leh chuan Secretary LAD ka ni dawn tawh tih ka hria a, a lo let leh kha Secretray LAD ka nih loh hnuah ka va zawn tir a, Chief Minster khan a appreciate zia thu te a lo ziaak a ni. Chu chu Forest Department reserve a puan a nih khan V/C te hrilh tur tih ani a. V/C pahnih pathum a concerned chuan khami te kha hrilh vek a, tlangau au tir tur ani tih te ani mai a. Forest in reserve an puan dawn chuan Govt. of India permission etc tih fel a Notification chhuah turin kum 10 chhung a an lak fel a awm mang lo ani. Chuvang a nia kan ram ngaw a chereu zel danna tur hian he Act hi hmang tangkai ila, tih vawiin niah hian kan sawi duh a.

Tin, hei Taxation Department Demand No. 8 pawh a pawimawh em em a, kan tax te an tipung nasa a, a thawktu te pawh an efficient in ka hria a, sawi a chakawm a, ka sawi hman tawh lovang. Duh anga han sawi tura ka ziah zawng zawng te ka sawi hmanlo a. Pakhat chiah pawimawh lutuk kan sawi duh chu tun laiin training na tur Doctor te, Nurse te foreign ah leh India ramah an tam em em ani. Hengte tan hian hna problem a awm lo chho tial tial dawnin ka hria a. Putar ho te pitar ten nakinah chuan Ina min rawn enkawltu tur te hi Private Nurse te hi kan mamawh dawn tan chauh a. Heng atanah hian ka hnenah mi tam tak an lo kal a, State tam takah hian training na an hawng ani. BSc Nursing, Master Degree leh post graduate degree lakna te GNMte, khang training na tur a tam em em ani. Hetah loan lak loh chuan mi rethei tan a kal theih si loh a, 4 lakhs/ 5 lakhs a ngai a. Chungah chuan bank loan la thei kha chu mi awm thei guarantor Sorkar hnathawk chhungkhat nei chauh kha an ni sia. Pa te thi tawh nute thi tawh lo in admit laklawh tawh, bank loan la dawn emaw inti a la leh thei si lo, tap tep hi engemaw zah ka hmu a, hei hi kan Finance Minister zahawm tak hianin, bank loan awlsam zawka tih dan zawng se Reserve Bank of India hotute pawh an lo kal dawn a, tihdan hi ngaihtuah se nakinah hmun tam takah export quality kan tih nei ho hi chu Nurse hi an tam a ni. Dental Surgeon thlengin MBBS zirna turte hi an tam em em a, thil theih loh hi a awm tur a ni lo reng reng a.

Entirnan pakhat chiah kan sawi duh chu Pu Deputy Speaker min ngaithiam la, ding duh an awm mang lo bawka a, a ding chhun pahnih kan awm a ni. Hun a thawl pawhin ka hria a, foreign ah tam tak kan thawncchuah theih tur an ni a, Pitar Putar min enkawl tur te bakah khan. Insurance Company te hian Mizoramah Divisional Office an hawng duh miah lo a, entirna kan sawi duh daih a ni. Divisional Office an hawng duh miah lo a, "A theihloh in te lutuk District ah Branch a awm lo," an ti a, YMA ang khan kan ko khawm vek a Silchar District Hqrs -ah pawh in ti a, in hawn loh chuan in office in khar vek ang," kan ti a, an pute an zuk be sawk sawk a division office an rawn hawngfai leh vek thei a. A hma a Finance Minister te, Chief Secretary, Chief Minister te kan ngen a, an koh khawm a, an duh miah loh kha. "Haw mai rawh u chutilo chu surveyor ten motor an exam chhungte a rei si office khar mai rawh u," kan ti a. Tunah an rawn hawng fai leh vek sia, chutiang chuan Bank te pawh hi Zoramah an hlawk lutuk. Chuvangin hetiangana kan mirethei, nu leh pa nei lo te loan la thei lo a siam ringawt te hi thain ka hre lova, helamah hian kan Finance Minster zahawm tak te hi na deuh a chet a ngai. Loan an rul tha duhlo tih ringawt hi a ni miah lo. Rul tha duh tak tak tur tam tak an awm tawh ani. Hei vang hian kan ram tan hei hi chu thil

tangkai niin ka hria a Pu Deputy Speaker i zahngaihna kan dawng leh a, ka lawm hle mai. Demand hi ka support e.

**DEPUTY SPEAKER** : 15 minutes i sawi a ni. Tunah chuan Pu K.Sangthuama.

**Pu K.SANGTHUAMA** : Pu Deputy Speaker ka lawm e. Hei vawiin kan demand sawitur hi a tam a, a sawi vek sen loh ang a, amaherawhchu tawi te tein han sawi ve dawn ta ila.

A hmasa berah chuan Sericulture lam pang hi a pawimawhin ka hria a, Demand No. 41-na Sericulture hi a pawimawh zia hi kan ram hian kan la hre chiang lo niin ka hria a. Mizoramah hian Sericulture hi uar ila, mirethei deuh zawk pawhin eizawanna, vawikhata hausak thutna phei chu a ni hauh lova, ei khawp hmuh theihna, tin a kum a lo rei phei chuan hausakpui theihna a ni a, A chin tura hi Mizoramah hian a tha duh em em vek a, chuvangin helai hi kan rilruah hian Mizoram Sorkar pawh hian kan tilut zo lo viauin ka hria a.

Ministry hmasa, keini ministry ah pawh khan ka lak ve a ni a. Hma kan sawn viau dawn emaw ka ti a, mahse Sorkar rilruah hian a lut chiahlo nge ni vawiin thleng pawh hian ka zir ve dan leh ka hmuh ve dan ah hian duh thu a la sam thei lova. Hei hi kan Sorkar hian ngaipawimawh sela, mirethei zawkte eizawanna tam tak siam theih sela, kumkhat chhunga tharchhuah a hmuh chhoh theih mai a ni a.( Deputy Speaker : Ngawi rawh aw Chair kan han in thlak lawk ang e) Pu Chairman, Sericulture hi uar hle ila, hman niah zawhnaah chhungkaw engemaw zatin an ching tih a lo lang a, a lawmawm ka ti a, hemi a kan rilru kan pek phawt chuan singli, singnga nuaikhat, nuaihnh, nuaithum thlenga kumkhat a lei theih hi thil har lo tak a ni. Chuvangin theih tawp kan Sericulture Minister hian lo chhuah sela. Tin, kan House Leader te pawh lo ngaihven pui turin vawiin ah hian kan chah duh ani.

Tin, pakhat lehah chuan demand 35 na Fisheries hi kan ramah eizawanna tlak ani a, mi tam takin eizawn nan an hmang tawh a, chutih laiin nichina ka hma lama an rawn sawi tawh ang khan, a chi supply ah hian duhthu a sam thin lova. Ka lo hmuh ve dan chuan hetiang te tak te te chhiar pawh chhiar theih loh a suah mai a a chi supply ai hian, a lian deuh hetiang (kut zungtang) chen vel ang chi a hi ti ila, to deuh zawk pawn tlem deuh zawk kha dah ilang, a chhiar theih vek a, khami kha ti ilang kumkhat chhung hian hetiang (Tawng) chen chen a lo awm ve thin a, hmanlaiin chite ah khuan zimte kan siamve thin a, a chi lian deuh deuh hi kan dah a, kumkhat chhungin tawng chen chen heti chen chen hi a awm thin a. Chu chu Fisheries lam pawh hian ngaihtuahna thar hmang sela, kan hlawkpui zawka rinna ka nei a, pawisa seng teuh si hian nunglo hi a tam em em mai a. Chuvang chuan a lian deuh hlek lamah hian a chi-ah tan la se hlawkpuina kan hmuh theih kan ring bawk ani.

Tin, Demand No. 29 na Social Welfare ah hian han sawi leh ta ila, hei tar chawmna kan tih mai tar pension kan tih kha zawhna kha kan zawt a. Tah khan thla 10 lai pek theihloh ni awmin chhanna kha a awm a, hei hi kan Social Welfare Minister zahawm tak hian Tar ho chawmna hi a pek hma theih dan te lo ngaihtuah ta sela, pawisa awm theih dan erawh chu kan hre pha ve lova. Tar ho hi an khawngaih thlak a theihtawprawn chhuah ta selangin tih kha kan ngen duh bawk a.

LAD a kan sawi duh chu Village lampang hi han sawi kai ta ila, Khua-a pawm meuh loh hi engemaw zat a awmin a lang a, a zat chiah chu ka hre lova. Heng hi ngaihtuahnah hman ni sela a tha khawpin ka ring a. Duh lai laiah In kan sa mai a, duhna lai laiah thil kan zuar mai a kawngdungah, hetiang ang chi hi dan fel fek fawk hi kan neilo nge ni ka hre chiah lova. State dang atanga lokal te leh foreign atanga lokal te min hmuh atan pawh kan ram ti mawilo tu a ni thei a, heng ah hian tan lo la leh deuh hlek turin Social Welfare Minister hi kan ngen duh a.

Tin, Demand No. 32-na Horticulture Department hi a pawimawh a, Mizoram tana hma thar thui tak la theitu a ni a. Amaherawhchu, hei pawh hi kan tihsual ni a ka hriat chu kan thlai chi supply, vawiin mai ka sawi lova hmanlai atangin kum tam tak atang tawh a Horticulture-a kan thlai chi supply, Balhla chi kan han supply a, serthlum chi te, kuhva te, sawisen a ni lovanga heng kan supply ang chi hi phun nun theih loh a tam thin a, hei hian hlawhchhamna tam tak min pe thin niin a lang a. Chuvangin, thil hi a tam lam aiin, quantity aiin quality-ah kal tum ta ila. Horticulture te pawh hi balhla chi nuai sawm supply-a a nun mang loh ai chuan nuai khat lek pawh a nung tha kan supply theih chuan. Chutiang ang zawng chuan ngaihtuahnah awm ta se, a hlep ringawt ni lovin. Supply-tu chuan hlep chu a nei tho ang. contract-ah pawh contractor chuan hlep chu a nei tho a, kan thawh that loh chuan mahni tan, ram tan, mi zawng zawng tan a ni thin ang chiah tho hian thlai chi supply-ah hian tan la se a tha in ka ring a. Supply teuh teuh ringawt a nung manglo a tam thin hi kan hlawhchhamna ni berin ka hria a.

Ka ngaihdan phei chuan a supply hrim hrima hi tih tawp daih te a tha lawm ni ka ti mai mai a, hmannah central atanga pawisa lo kal ang chi hi Pu K.S. Thanga nen kan sawidun a, a pawng tih tawp ngawt theih lova central atanga lokal hi a ni si a, a hmanna tur awmsa vek a tih hi a ni si a, chuvangin hetiang hman hi a ngai si a tih thu te kan sawi dun a. Chutiang anih rual rual chuan a supply lamah hian tan la ta ila, a tha deuh supply ila tichuan Horticulture hi Mizoram tana chhenfakawm, Mizoram tana kan ei leh bar tam tak min siam saktu, min thar chhuah saktu anih avang hian Horticulture-ah hian tan lak a ngai deuh hlek a ni, Minister pawh tan la turin vawiinah hian kan ngen lehzuah duh a ni.

Tin, Demand No. 9-na Finance lam hi chu kan sawi tam tawh bawk a, kan Finance Minister hi Finance Minister tha ber zinga mi kan sorkar tawhah chuan a ni mai awm mange ka ti a, a tha ber erawh chu thlan a har kawp ang a, an fel theuh a tunhma a mite pawh. Chutih rual rual chuan ngaihtuahna hmang mite alo ni a, a lawmawm hle in ka hria a. Chuta kan chah leh duh chu sum renchem hi tam lua awm lovin lo kalpui zel sela, kan hre theuha kan sum hi kan renchem phawt chuan chungkuaah pawh a hriat theih a. ₹ 10 hlawh lo ni ta ila, kan ₹ 10 hlawh kha kan hriat deuh ran a, a hman dan kan hriat phawt chuan tul lova sum kan hman loh phawt chuan a indaih ve theih mai ang chiah hi a ni a. Chuvangin, vawiinah hian kan Finance Minister zahawm tak hian theihtawp chhuah selangin sum renchemna chungchangah hian, kan zavaia tan tlan pawh helaiah hian a ngaiin ka hria a, chu chu kan chah nawn leh duh a ni e.

Tin, Demand No. 8-na Taxation hi an pawimawh em em a, Vat chungchangah te pawh hian strict deuh hlek se tha in ka hria a, tax hi pumpelh mai duh tawh te pawh kan awm thei a, hengah hian theihtawp takmeuh lo chhuah sela, kan harsatna leh sum leh paia kan indaih lohna chu kan hre theuh a chuvangin hetiang atanga uluk taka Taxation te pawhin an hna an kalpui chuan vawiin ai hianin Tax chungchangah te, Vat lak chungchangah te pawh pumpelh lo tum mai te pawh thil awm theih a ni a, hetiang kawngah te pawh theihtawp lo chhuah turin leh taima taka an hna hi thawk turin kan Finance Minister hian Taxation Department te pawh hi lo brief chiang leh selangin. PAC ah hian C&AG atanga lokal te, Audit atanga lokal te, heng kan han thlir neuh neuh pawh hian Taxation atanga chhiah chungchangte leh thil dang dangah hianin fimkhurna tur tam tak a awm a. Chuvangin, hetiang lamah hian kan Department-te theihtawp chhuah turin vawiinah hian kan chah duh bawk a ni e. Awle, chu chu ka sawi theih tawh ni mai se, ka lawm e.

**Pu CHALROSANGA, CHAIRMAN** : Awle, hun i hmang thiam hle mai. Pu Lalrobiaka.

**Pu LALROBIAKA** : Pu Chairman, ka lawm e. Vawiinah Department hrang hrang Demand sawina hun kan han nei a, a lawmawm hle in ka hria a. A hmasa berin ka hma a miten an la sawi lo na chungin han sawi lan ka duh chu Demand No. 4-na Law & Judicial hi tawite in kan sawi duh a. Law & Judicial hi a pawimawh hle mai a, a changtu pawhin a hneh a. Tin, politics-a a awm hma pawh a a lo practiced thin te anih avangin a hrechiang hle pawhin ka hria a. Chanchinbu-ah te pawh kan hmu thin a, ama sawi ngei atang pawhin Law & Judicial atanga hma an lakna hrang hrangte kan hmu tawh a.

Tunah hian Lok Ayukta te pawh ti chho turin chhawp chhuah mek a ni a, helaia ka'n sawi duh chu 'fimkhur a ngai hle mai a' tih hi a ni. Vawiinah Judiciary te dah hranin a lo awm a chutih lai chuan Law lama kan mithiam te, kan ukil te an that em em

rualin kan Magistrate te, kan Judge te. Amaherawhchu, thil a dikna hmuh chhuah lem loh awm a tam hle. Hetiang Institution pawimawh kan lo din chhoh dawnah hian Lok Ayukta kan tih ang chi te a pawimawh dan hi a zual dawn viau mai a ni. Chuvangin, fimkhur zawk leh, nasa zawka tan lak a, kan din dawn pawhin nasa zawka rilru fim taka kan tih hi a ngai dawn a ni tih hi kan sawi duh a. Chutih rual chuan mipuite tan zalenna leh dikna kan haichhuah theih rualin, dikna ni chiahlo pawh dik zawka a chan theih dan a awm avangin, hei hi fimkhur zawka hma la turin kan chah duh a.

Demand No. 8- Taxation-ah hian kan lut leh ang a. Tun dinhmunah hian Taxation-ah hian Mizoram kan inngat nasa em em a, an tithain, vawiina an hmuhchhuah kan han hmuh te pawh hi a tam tham hle a ni. Heng avangte pawh hian a thawktute chungah pawh lawmthu ka sawi duh a. Chutihrual chuan a Minister pawhin a ho thiam hle a ni tih hi a lang chiang reng a. Hei MLPC Act atangtein nasa zawkin kan han la chho dawn a, Excise atangtein. Tin, chumai piah lamah chuan chi hrang hranga kan lak tur tam tak chhawpchhuahin a awm chho mek a ni. Hengah te hian nasa zawka thuamthate pawh an ngai ang tih kan ring lawk a. Tin, staff te pawh tun dinhmunah chuan an indaih loh nasatzia kan hria a, chung thleng pawh chuan nasa zawka thuamthat a, hmalaksak te pawh a tha ang tih hi ka'n sawilang duh hrim hrim a ni.

Demand No. 29-naah kan kal daih ang a, Social Welfare Department hi han sawi leh ka duh a. Hun dangah te pawh kan sawi tawh a. Anni hi Raipuar atanga Tar enkawl an ni a, an department thuamthat hi a ngai hle mai tih hi ka'n sawi duh a. Tin, an enkawl na chi hrang hrang hei Anganwadi atangin a bik takin hei keini bialte chu han sawi ta ila, chhangchhe bial tih a ni a, chungah te chuan heng naute chaw tha kan han tih ang chi anga te pawh hi kan hmuh that viau rualin a hnathawktute kan lo chhangchhia a, chungte pawh chu enzui an ngai hle a ni tih hi he House-ah hian ka'n sawi nawn duh a. Thenkhatah chuan lo la a, thenawm khawvengte nena lo insem ta mai mai te pawh awm changte a awm a ni, chutiangte chu a ni a. Field Staff-te pawhin nasa zawka an enkawlte pawh hi a tul hle a ni. Chutiang nilo a an pek tawp tawp emaw, an biala an hnathawhna hrechiang lova khatiang anga an tih tawp tawp khan harsatna kan tawk fo thin a ni tih kha ka'n sawi duh a. An enkawlte an chhangchhia a. Amaherawhchu, chuti chung chuan fund indaihlo chung chung pawhin hetiang khawp hian an enkawl tha thung a ni tih kha kan sawi rualin nasa zawka tan an lak theihna turin, kang engemaw a tha lo lai te pawh kha ka'n sawi chhuak a ni.

Tin, Horticulture Department hi kan sawi tam khawp mai thin a. Ka'n sawi leh duh chu nichinah khan ka hma-ah khan an rawn sawi tawh a. A bik takin anni hian vawiin thlaithar tha tak tak te kan ramah kan tharchhuah ngei mai min eitir a, a hriselte pawh hi kan hrisel pah ve ta zel ni te pawh hian a hriat a ni. Chutihrual erawh chuan hei, thlai chi sem chungchangah hian harsatna kan la tawk fo mai hi a pawl ka ti a. A

bik takin NLUP Second Phase-ah khan, keini bialah te phei chuan kuhva chi sem kha a chi a chhe lutuk a, beneficiary te pawhin an la duhlo a, engtin nge an tih tak zel, engtin nge kan kal zel tih kha ka hre zui ta lova. A phurtute khan khaw kil dai deuhah khan an nghat ringawt mai a ni. A tawih chhe ta nge tih te pawh kha ka hre ta lova, chu chu ka'n sawi lang duh a.

Tin, thlai a ni a, a hun taka an dah a, an sem theih hi a pawimawh hle a ni tih hi ka sawi duh a ni. Chutih lohah chuan an titha hlein ka hria a. Amaherawhchu, thanna tur leh tih tur tam tak kan nei a ni. Tin, Department-a hetia thil sem reng reng hi a hmu ngai bik ngawr ngawr, hmu hmu mai, a kawtha hmu an sawi ang deuh hlek ang chi hi awm a ni a khawtinah hian. Hetiang ni lo a insem zai deuh leh a titha thei leh duhsak phu hi chu duhsak a, a pangngai hlir, department a thawktena kan hmelhriat pangngai hlir pe zut zut bik lo a, khatiang ang deuha kan semzai te pawh kha a duhawm a ni tih kha kan sawiduh a.

Tin, Demand 41-na Sericulture-ah hian, hei kan bial lamah Kanghmun tlangdungah te, helaiah hian nasa takin Darlung lamah te hma an la a. A bik takin department chungah pawh lawmthu ka'n sawiduh a. Anni hian nasa takin hma min lakpui a, Rearing House tih te, tin, a basket chi hrang hrangte leh a theih ang zawng zawngte hi chuan an tanpui niin ka hria a, a lawmawm hlein ka hria a. Tunah pawh hian a hlawhtling pawl tak bial kan nih ka ring a. Mipui pawh an lawm a. Tunhama a Tlangram lo neih ringawt a sum hmu thin leh harsa tak tak te, an fate thlengin School tha zawkah te admission an tih theih phah a, Sericulture Department hmalakna avangin, an chungah lawmthu ka'n sawi duh a ni.

Tin, a khaikhawmna angrengin helaia Department hrang hrang kan han sawi ah te, kan Demand han en khan engtin nge kan kal ang aw, ka ti a. A bik takin medical re-imburement fund in neih dan han enin Department hrang hrang kha a hniam thla vek mai a. Kha kha kan hrisei ta deuh dawn em ni aw tih te kan ngaihtuah laiin, kan Minister theuhte hian tihdan in hre turah kan ngai a. Helaiah hian nasa zawka tan kan lak te pawh a ngai a.

Tin, M.R. a diklo deuha lak te pawh kha kan sorkarin nasa zawka discipline a kalpui tak avangin a ti thin pawhin thil tha lo zawnga ti tawh lovin a tak tak chauh an la tawh turah ngaiin tiang hian kan siam niin ka'n ngai deuh bawka a ni.

Heng zawng zawng hi a tha ka ti a, sawi hmanlohte pawh ka nei tam hle a. Pu Chairman, kan sawi chhun chhun a te kha kan Department-ten hma min lo laksak se thain ka hria a. Chutihruah chuan, heng Demand hrang hrangte hi karawn support a ni e. Ka lawm e.

**Pu CHALROSANGA RALTE, CHAIRMAN** : Pu John Siamkunga khan a rawn phar hmasa a, Pu John Siamkunga i lo sawm hmasa ang. A dawtah Pu P.C. Zoram Sangliana kan sawm dawn nia.

**Pu JOHN SIAMKUNGA** : Pu Chairman, ka lawm e. Hei tun tum kan Budget hi kan GSDP a sang hle mai a, GSDP hi kan State economy mil a, Central Sorkarin min rawn siamsak a ni a. Chumi awmzia chu, Mizoram hi min hmuh danah chuan kan economy hi a lo sang ve ta hle em ni? An hmuh dan atang hian tehna dik tak an rawn lek a ni ve thovin ka hria a tih kha ka ngaihdan a ni a. Chu chu a hmasa in kan sawi duh a. Sawitur a tam a, Department 9-lai a ni a, tawite te in kan sawi ang a.

A hmasaberah chuan Demand No. 4 - Law & Judicial hi. Helai hi Minister experience nei takin a enkawl a, a enkawl na hnuaiyah hian kal pawh a nuam a. Law Commission te Sorkarin a din a, term hmasa-ah khan Pu Rinawma, tuna kan Deputy Speaker zahawmtak hi a awm thin a. A ni kaihhruaina hnuaiyah khan Law Commission hi tha taka kalin hna pawh an thawk nasa a ni. Chumi hnu ah kei hian ka rawn chhunzawm leh a, an hna lo thawhte kan han chhunzawm chho a ni mai a. Tunah hian Mizorama hmeichhia mak tawk thin te, Kawngkasul a mak thin te, ro pawh nei ve ngai lo, an pasal tena duh hun hun a an hnawhchhuah theih, an nupa a an thawhchhuah ah pawh engmah ro nei lo, ro chanai bithliah fel tak awmlon thin avanga tuar thin te, khang ho zawng zawng kha chhut let in Mizo Marriage, Divorce and Inheritance of Property Act kha he Sorkar hian a rawn siam chhuak chho ta a. He Dan hnuaiyah hian Inthenna tam tak awm thin a kha a rawn titem tawh dawn a. Tin, Dan tha lo tak tak kan lo neihte a rawn repeal chho baw a. Hei hianin hma nasa taka lak mai bak ah nghawng tha tak a neih chhoh kan ring baw a ni. Tawite te a sawi loh chuan a tam em a.

Taxation Department hi tawite sawi ka duh a. Tunah hian chhiah an lak hi kumin ah a sang ve tawh viau a, amaherawhchu, duhthu la sam lo mahse, heng contract works ah te 2% atanga 4% a han nih chhoh tak ah chuan, nasa fe in sum lak luh tur hi pung turah kan ngai a.

Tin, Finance Department hi kan sawi leh duh chu Auditors chungchangah, tlema Auditors te hi enchian an ngai em aw tih kan ngaihtuah a. A chhan chu tunah hian COLFA...Assembly Committee thar a awm a, PAC-ina CAG Report a lo chhuizui ang hian keini Committee hian Local Accounts audit-tute audit chhuah kha kan lo chhui ve a. Chuvangin, Village Council zawng zawngte, Local Council zawng zawngte, Aizawl Municipal Council te bakah Autonomous District Council te, hengho sum hman dana kha auditors-ten an rawn chhui chhuah lo enfela lo thlir zuitu kan ni a. Tuna a kal danah chuan a fel lo nasa hlawm em em mai a ni. Heng VC kan tihah te phei hi chuan an expenditure te chu an rawn ziak ve lawng a, supporting document hi a awm ngai mang lo a ni. Vouchers ten a rawn support lo baw a. Engtin emaw an hmang liam mai



mai a ni. Khatiang kha thil awmdan a ni a. Chuvangin, local self government atanga state sorkar thlenga kan sum hman dana hi awmze awma a kal hi a ngai a. Awmze awma a kal loh chuan khawilai emaw put ru a tam thin a, kha khanin thil nghawng tha lo a siam chhuak thin a. Chuvangin, kan auditors neihte hi tunah chuan an strength hi a chhe em em mai a, lak theih loh leh hnawh khah theih loh Assistant Auditor thlengin kan nei nual a, khang kha tih chak deuh an thain ka ring a.

Tin, VC-ten account an vawn dan hi, helaiah VCP an han ni ringawt a, treasurer te an han ni a, secretary te an han ni a, accounting lampang kha an lo thiam lo a ni. An thiam lo pawh kha a awm reng. Chuvangin, Local Administration Department hian training hi zing deuh zawkin buatsaih ta se la, account vawn dan te, proforma te pein strict deuhin kalpui se la. Chutichuan, local fund chungchangah pawh a kilkhawr bera mi pawhin an sum hman dan fel tak leh tha taka an ziaha a nihna tur dik taka an hman chuan ram thanna hnuk an ni tiha kha an inhriat chuan a pawimawh dawnin ka hria a. Chuvangin, Local Administration Department hian Local Council te, Village Council te hi accounting chungchangah hian nasa fein zirtir se, vawi khat zirtir mai a tawk lo, hall-a koh khawm ringawt kha a tawk reng reng lo. Kan zirtir danah hian awmze awma kan zirtir, kum khatah pawh vawihnih te, vawithum te lai zirtirna hi pe ila. Chumi a nih loh chuan hei tunah an inenkawlna tur emaw eng eng emaw te la pek a ni ang a, chungah te pawh chuan awmze awma a hman theih kha a pawimawh hlein ka hria a, tih kha ka'n sawi duh a.

Tin, Demand No. 32, Horticulture Department hi ka lo ngaih ve dan thinah chuan kan mithiamte an lo chhuak a, kan thiam a sang tual tual a, ramdang thlai leh thil tih dan kan rawn ching chhuak a, experiment ringawt hian kum hi kan hmang tam hlein ka hria. Kiwi te kan tia, dragonfruit te kan tia, an tui, an tha, mahse Pathianin he ram hi min pe a, he ramah hian mihiring kan la cheng dawn a ni tih Pathianin a hria a. Kan pi leh pute lo inchawm nunna leh inenkawlna thlaite kha tam tak hi kan hlamchhiah zawk tlat. Pathianin he rama min dah chhan leh he rama thlai ilo leh eiturte kalsana technology sang zawk kan um nasat luattukna hian kan than a tithuin ka hria. Bazarah han kal ila, wawiina bazara kan hmuhah chuan tunhma kan thlai thar thin tho kawlthei te, sertawh, lakhuihthei, pangkai kan tih te, khangho kha a la ni deuh vek tho. Technology sang fea kan kala kan hriat lai hian a mipui nawlpui hian kan pha si lova. Chuvangin, kan pi pu atanga kan thiam leh kan lo hriat than, khalama kal lova hetiangah kan tih hi chuan kan loneitute hi changkanna tak tak an nei lovang tih hi ka hlau thin a. Israel technology atanga serthlum kan han lak chhuah te, khang te kha wawiin niah hian hman tangkai ai chuan hluihlawn a lo ngai leh zawk dawn tain a lang a, a pawi a ni. Chuvangin, experiment ringawt maia kum tam tak kan hmang thin hi kan mithiamte hian heti lo lam deuh hian tunhma atanga kan rama thil lo awm tha duh em em lam atang hian Pathian malsawmna lo awmsa hi hman thiam tum ta ila a tha lo maw tih kha ka'n sawi duh a.

Fisheries chungchang hi, ka han sawi duh chu RKVY leh NLUP-ah hian supply hi nuai 114 lai sangha chi lei nan khan kan hmang a ni. Chutihlai chuan kan sangha chhuah zawng zawnga hi nuai 80 chuang a ni. Tin, kan pawisa laklulh erawh chu cheng vaibelchhehnih leh

nuaitum leh singkhat sangkua vel a lo ni a. Kan sem nasa a ni, sangha chi hi, kumtin kan sem thin. Kan tharchhuah lampangah hian kan intodelh em tih hi kan ngaihtuah tel tur a ni. Sangha note kha sem teuh teuh mah ila a tharchhuah lampanga kan san chuan loh chuan kan economy engtin nge a san chuan ang? Kan sem chhuah a tam, mahse bazara kan han en chuan vairam atanga sangha lo chhuak a la tam lutuk. Mahni intodelh tawh tur awma kan lan laiin kan la intodelh lo nasa hi a pawia. Hengte pawh hi enchik a tha mang e aw tih ka ngaihtuah deuh a ni.

Tin, Sericulture hi, Demand No. 41-na hi, pangang khawitu hi chhungkua ni lovin mi 5,054 an awm tih a ni a. Kum 2014-2015 ringawtah khan cocoon tharchhuah kha quintal 323 vel niin a lang a ni. Seri-ah chuan hma kan sawn ve hle chuan ka hria. Amaherawhchu, kan tharchhuah hi a pawisaa han chhut chuan nuai 66.6 a la ni. Kha kha mi 5,054 in eizawn nan an hmang a nih chuan an lakluh kha ₹ 1,317 chauh a la ni mi pakhatin. Chuvangin, hei pawh hi kan chhui zui a ngai. Kan thiltih engkim hi a hlawhtlinna lampang kan chhut tel lohva a sem emaw a sum sem lam emaw a nih loh pawhin a chi emaw a note sem lampang ringawt kha a ni lo. Kan tharchhuahah khan nghawng a nei em?tiha kha kan thlirna ni zawk thin se la. Chu chu helaiah hian ka'n sawi tel leh lawk duh a ni e.

A tawp berah chuan Pu Chairman, hun te a tlem si a, ka pel tam lo mai ang a, he Demand hrang hrangte hi ka thlawpin pass ngei turin ka rawn support a ni tih ka sawi duh a ni. Ka lawm e.

**CHAIRMAN** : Pu P.C. Zoram Sangliana.

**Pu P.C. ZORAM SANGLIANA** : Pu Chairman, vawiinah Minister zahawm tak takte pathum Demand sawi tura hun ka nei hi ka lawm hle a. Demand-a kan luh hmian kan Aizawl khawpui nizana Bawngkawna thil thleng kha sawi tur ka ni em chu ka inhre lo naa, pawl pawl, kohhran pawl pawl ti lo pawl tia national level thlenga YMCA ah Vice-President te ka lo nih ve tawhna thin te leh tunah pawh Aizawlah President leh a National level-ah pawh Board of Directors ka la nih vena atangin kha thil thleng kha pawia ka ti em a, sawi hmasak lawk ka duh a.

Vawiina kan Prime Minister zahawm tak, Gujarat Chief Minister a nih lai te pawh khan ka chair-na hnuai ngeiah hian khuallianah te kan hmang a, chung huna ka Kristian puitena photo session kan neih tuma Chief Minister thla an lakpui duhna chhan kha sakhaw firfiakten, keini sakhaw tenaute tihduhdaha kan awm tawh loh nan ..( CHAIRMAN : Kan inthlak lawk ang e.) ama thlalak, ani nena kan thlalak hi kan banglaiah te, kan kawngkharah te, kan thlalakho hi kan lo tar ang a, harsatna min siam thintute hian min tibuai tawh dawn lo a ni. Chuvang chuan, ka pu, thlalakna hun min hawnsak hi kan lawm khawp mai, an ti a. Minute 15 lek thlalakna hun nei tura inngai kha darkar khat chuang thlalakna hun kan neih phah a. Ka Kristian puiten harsatna hmun danga an tawh thin te, hmun hrang hranga kan kalnaa tap chung a an biak in tih chhiatsak an nih thin te, an chenna in tih chhiatsak an nih thin te, kan lo hriat anga kha kan khawpui chung ngei

maiah a titute chu tupawh ni rawh se, Kristian ram Mizoramah hian a thleng hian ka lung a tichhe em a, Zero Hour ni lovin vawiin Demand sawi dawnah hian Pu Deputy Speaker, ka'n sawi hmasa duh a. Hetiang hi thleng lul tawh suh se. Misual ramhuai biaten pulpit an sawisa, biak in an sawisa tih chanchinbuah te kan chhiar thin leh a thlalak te kan lo hmu a, kan lo thlir thin laia kan rama hetiang a han thleng hi pawl ka ti lutuk a. Chuvang chuan hetiang hi thleng lul tawh suh se tih hi ka'n sawi hmasa duh a ni.

Pu Deputy Speaker, vawiina Demand kan han sawi hian Finance Demand No, 4, 8, 9, 14 na teah hian sawi tur awm lo khawpin amah hian min siam a. Consultative meeting vawi tam tak, inhnaih te ten min ko a, chungah chuan kan lo sawi chak zawng zawnga kha leh kan rawtna te officer-te nen kim thlapin darkar nga chuang te, darkar ruk chuang te min neihpui a. Chuvang chuan, hetah hian luh vak ka tum lova. Amaherawhchu, chuta kan rawt thin bakah vawiinah hian a district hawi deuh hlekin pakhat han sawi ve hram ka'n duh chu Law and Judicial Department, Demand No. 4-ah hian keini Kolasib District khuuah khuan Additional District Magistrate(Judicial) nei thin kha kan ni a. Lunglei leh Aizawl Judicial Division then hran an nih atang khan kan han nei ta lova. Tunah khuan CJM leh Judicial Magistrate pakhat dang nen District Court khu function mek a ni a. Hetah hian ram inrelbawl na tha leh dan leh hrai, tha deuha lek kawh a nih theih nan sorkarin min thumtha mek a, lawmthu han sawi pahin tunah pawh Judicial quarters pali sak mek, sak zawh mai tura awm a, lawmawm kan ti a. A quarters te kha tha tak min pe mah se a Judge lama kha kan tlachham si a. Chuvang chuan, Additional District Session Judge hi kan mamawh takzet a. Hei hi min pe leh turin kan ngen duh a.

Vawiina kan kalphungah chuan hei hi keinin pe tur kan ni tawh hleinem, kan pe dawn anih pawhin Gauhati High Court Chief Justice hnenah Port Folio Judge through-in min tihsak theih chuan kan hmu ngei ang tih kha ka ring a. Chuvang chuan hemi chungchangah hian a Demand dangah kha chuan lawmthu sawi vek ni mai sela, hemi bikah hian kan ngen a ni e.

Planning and Programme Implementation Department chungchangah te pawh plan atana kan duhdan leh Project tha tak tak, pawisa hailuhna tur pawh nimahsela mihring leh, kan sum leh paiin a zo dawn em tih te ngaihtuah telin, nangni level-ah te pawh hian a then hi chu lo thliar ula, a thenah pheih chuan Consultancy Firm- te pawh Mizo tlangval ngeite in lo hmang dawn nia aw ti a an hnena kan sawi thin te kha heng atan hian a pawimawhin ka hria a.

A dang tam tak sawi tur awm rualin Demand No. 19, 22 leh 32- a Pu P.C. Lalthanliana demand bikah hian Local Administration Department- ah hian April thla kha a ni maw kan VC leh Local Council kan thlan kha. Khami inthlan naah khan vote chhiar diklo leh tihdik loh te, eng eng emaw sawisel niin State election tribune-ah te pawh, Election Commission-ah te thlenin Election Tribunal- te min dinsak a. Chutianga min dinnaah chuan ka bial Tumpui-ah 2015 August 20 khan vote chhiar that leh vek a ni a, Result puan dawnah chuan candidate agent-te leh candidate zawng zawng ten result lo chhuak ang ang chu kan pawm ang an tih rualin, chumi Result chu State

Election Commission atanga Notification October 8-ah khan a lo chhuak tawh a. Mahse vawiin thlengin Tumpui a VC ding lai te August 20 zan pawh an tling tawh lo a ni tih hre reng chung a la chelh lui ten vawiin thlenga development fund an han khawih tang tang mai te khu chu kan Minister zahawm tak hian DLAO Kolasib hrih in vawiin tlai atang hian an seal te pawh min chhuhsak sak se ka duh khawp mai. Anmahni ngeiin an ziah hnan tawhah Election Tribunal-in vote chhiar that leh vek an pawm vek dawn, an ti chung pawh a, khaw eng pawh zahlo, khami zana RO-in tlinga a puan tawh, heta State Election-in notification pawh chhuah ngai kherlo khan mahni thu khan ban nachang hriat awm tak, diklo taka an la ti zel khu, Election Commission-in notification a chhuah ang ngei khuan hma la turin ka ngen duh a.

A dangah chuan anni Department-ah hian, Horticulture Department-ah te hian lawmthu sawi tur hi kan va ngah em, a ram ang pawh hian. Kan sorkar flagship pui ber mai NLUP pawhin he Department hi inngah nana hmantlaka kan ngaih a ni tawh a. Chuvang chuan, hma an lakna atangte a vawiina Corporation thenkhat kaltlang a loneitute nghahfak lo thleng chho mekte han thlir hian, kan campaigner-ten an thiam si, corporation atanga campaign a ni emaw department atangin a ni emaw NLUP atangin a ni emaw campaigner-in an thiam si. Hun hmasa lam daih tawha tawngkam mawi tak mai kan neih ‘Sapthei’ ti a mawi em em, tui tak ‘Blue Diamond’ tih hming hial lo pu tawh te pawh vawiinah hian Horticulture Department te leh corporation-te tanhona avanga loneituten an thlai thar chhuah man tha a an han dawng tur te hi a lawmawm ka ti a. Chuvang chuan, LAD-ah a ni emaw, Horticulture-ah a ni emaw, Social Welfare Department pawh ni se kan hotute kaltlangin heng Department te hi hun engemawchen ka lo enkawl ve tawh te an ni a, chulai ka dream piahlam ah vawiin ni ah hian an kalpui tawh niin ka hria a.

Kum upa zawkte an ni emaw, hmeichhe chanhaite an ni emaw, hmeithai fahrah ti mai ang chung hrang hrangten Minister ka nihna anga ka hnena an lo sawi thin ang kha chu vawiinah chuan CDPO level atanga tihfel theih khawp ang te hian tam tak a lo awm ta a. Hetiang Minister a ngaihna hria, sorkar a ngaihna hriain an enkawlra rah niin ka hria a, chuvang chuan lawmthu ka sawi duh a ni. Lawmawm ka ti hna an thawh dan hi.

Fisheries Department leh Sericulture Department ni sela, keini kan District chu a hmunpui kan ni mai e, hemi hre rana hma min han laksakna te, pangangkhwai lamah ni sela, sangha dil lamah nisela sangha dil tam tak siam tlak a ni tih an han tilang chho a. Kan bialah chuan tuikhuah lar em em mai kan nei a, Serlui Tuikhuah. A tui chauh nilovin a product, sawtah kan Secretariat thar kawt thlen hma kawtzawlah, kawngzau laiah Inrinni apiang deuhthawin Serlui sangha tui hralh tur a awm a, Aizawl Temple Square-ah hralh tur a awm bawk a. Chumi mai bakah, dil atanga thar chhuah lo pung chho ta te, heng zawng zawngte han en hian lawmawm ka ti a.

Pangang khawi ni se Mizo tha ngeih zawng tak mai, (kei ka hlauh zawng tak mah ni se) sawilo theilo, thar rang hetiang a han tichhova hma an lakna te hi han en hian tumruhna tlat nen, beih hram hramna nen miin an tih chuan Department tereuhte ang a langte hi inngahna tlak a ni tih

a tilang a. Chutihruah erawh chuan Minister-te pahnih tangkawpin nge ka hrelo le, Serlui view te khu kan LAD Minister hian Social Welfare atangin nge ni Lunglei kawnga chawlhbuk tha tak siam ang te khuan Serlui view te khu min han siamsak se, Thingdawl khawdaiah te khuan kan va lawm dawn, a kal zawng zawng in lawm baw si ang a. Chuvang chuan, khungte khu Session zawha an rawn khaikhawmpah te hian Serlui view na na na chu kan rawn tih ang che u te hi han ti thei se chu YMA General Conference lo awm turah te hian lo ti hman nghe nghe pheï se chu a tha tur a ni a. An hmanlo deuh ang a chung te em pheï chu, Serlui thlirna remchang nen. Khang kha ka'n sawi tel duh a. An hnathawh hi lawmawm ka ti, chutihruah chuan beiseina kan neihchhun ang hi chu thil dang awm tawh avanga beisei nachang hre chauh te pawh kan ni ve a. Chuvang chuan, anmahni khaw lam kalkawngah a titha baw a helam kawngah khuan min han tih ve hram se kan han ti ve a ni, Pu Deputy Speaker.

Chuvang chuan, wawiinah kan Minister pathumte Demand hi a bu keu pawh ngai lo hian an thawhna Mizoram-in kan hmuhna atang hian hnial tur hi a awmlo ka ti. Duhtawh ve nalai han sawina chauh leh veng leh district lam mamawh te han sawi pahin an pathum hian lawm taka pass sak hi ka duh a ka rawn support a ni tih hi Pu Deputy Speaker, ka rawn sawi a ni e, ka lawm e.

**DEPUTY SPEAKER** : A lawmawm e, i pel thui lutuk love. Pahnih phar lawk kan awm a, Dr. Ngurdingliana leh Pu Joseph Lalhlimpuia Amaherawhchu, dar 1pm hi kan chawlh hun a ni a, chawhnu lamah hun kan la nei dawn thova, chawhnu lamah in sawi mai thei em? Chumi a nih loh chuan House phalnain kan chawlh hun kha kan nekchep thei a. Chawhnu lama sawi mai a remchang thei maw? Tichuan, dar 1pm minute khat in a la rilova, minute khat chhungin kan sawi zo hman dawn silova chuvang chuan kan chawl rih mai ang a dar 2pm-ah kan thukhawm leh dawn ni a.

**DEPUTY SPEAKER** : Kan sawihona kan chhunzawm leh ang a. Chawhma lam khan member parukin kan sawi hman a, tichuan, mi pahnih an phar lawk a. A hmasain Dr. Ngurdingliana lo sawm ila.

**DR. NGURDINGLIANA** : Pu Deputy Speaker, ka lawm e. Demand no. 4 atangin tlem tlem kan sawi tan ang a. A hmasain Law & Judicial Department hi ngawi reng Department e ti lo chuan dan tha tak tak min siamsaktu an nihnaah hian lawmawm ka ti a. Nichina kan ngaihthlak tawh ang khan Mizoram Marriage, Divorce and Inheritance Act te, chumi phenah dan tam tak, a hmeichhia a mipa tana tangkai zawk tur, kan inhumhalhna tur dan min duansaktu an nihnaah hian lawmawm ka ti a.

Demand no. 8-na Taxation hi tunah central-ah kan sum dawnte leh kan sem rualte a danglam ta vek si a, Finance Minister-in budget a pharh lai a kan sawi uar em em, Taxation Department lo thang chho zel turah hian ka'n ngen ve duh chu, an mawhphurhna a sang tual tual dawn a, hemi kawngah pawh hian Taxation hnuaiia kan officer-te, tin, Grade IV thleng pawh a

niang chu, tun aia nasa zawka lo inbuatsaih lawk a, Mizoram sum leh pai lo lut thei ang ang te felfai taka mipuiin kan chanvo kan chan theih nan lo induang lawk se tih hi kan ngen duh a ni.

Tin, Finance Department demand no. 9-ah khan kan hria a, kuminah Planning Commission thiat a NITI Ayog kan han din hnuah, budget tight tak karah, annin felfai takin sectoral allotment-te pawh an rawn tifel a. An chungah khan lawmthu ka sawi nawn leh ni mai se.

Tin, LAD demand no. 19-ah khan, zawhna ka siam tho a House-ah, amaherawhchu, wawiin hi hun remchangah kan la ang a. Hei LAD hian khawchhungah leh thingtlangah te, khua leh tui hmasawinna turin, hma tam tak an la a, a lawmawm ka ti a. Ka zawhna tur min la chhan loh ah khan ti hian ka rawn siam a, solar street light an han sem hi thingtlangah chuan kan chhawr em em mai a, a lawmawm a, tun aia nasa zawk hian min han pe leh thei se chu khawmpui nikhuaah emaw, eng engah emaw kan hmang tangkai a. Hei ka bialah pawh kan Minister hian min pe nual a, kan hmang tangkai em em a, hei hi tun aia tam zawk min supply theih chuan a lawmawm ngawt ang.

Tin, Social Welfare Department demand no.29-na, Social Welfare Department hi keini thingtlang tan chuan kan inngahna a ni deuh mai a. Ka bial khaw pakhat, Phullen-ah khian tawngtheilo a awm a, a bengchhet bawk si a, a kut hian a ziak mai a, 'Enge a awmzia' ka ti a, SW tihna kha a lo ni a. Social Welfare Department. ka duh tih kha min rawn zawt a, a duh chu bengdar a lo ni a. 'Aw' ka ti a, ka bu nghut a, Department ah ka dil ta a, min han pe a. Khatiang khan tanpuina tam tak thingtlanga in sem leh tar chawmna, hei hi pitar putarin bial han fan nikhua pawha min lo zawh chamchi a ni a. Hemi lam hi khawngaihtaka tun aia nasa zawka min supply theih chuan rampum huapin ka'n ngen leh a ni.

Fisheries Department demand no. 35-na hi. Hei tanpuina, sangha chi min pe thin a, kei pawh a zarzotu ve ka ni a. Amaherawhchu, Lengpui atanga kan han lak hian, darkar 3 lek kal ni chung si hian, a chanve vel hi chu dil kan han thlenpui hi chuan an lo thi der tawh mai thin a. Hei hi a quality hi a tha vak lo nge, khawi atanga kan lak nge, local purchase nge, Assam atangin tih hi hriat ka duh bawk a. Tam tak kan keng thla a, a chanve lai mai an thi hi chu a beidawnthlak angreng a. Tin, a than pawh hi a muang khawpin ka hria a, chu chu kan Minister zahawm tak khan min lo chik sak se.

A tawp berah chuan demand 41-na Sericulture Department hi Department te mah ni se, thingtlang, zokhua tan chuan sumdawna tham a ni a. Hei kan bialah pawh Suangpuilawnah khian Pangang khawi an tam nasa mai a, a thar rang bawk si a. Kar tin deuh thaw hian Aizawl bazar a rawn hralh hi an lo kal ziah mai a, sing hnih sing thum te, a thenin sing nga hial te, hralh a kal bawk si a. A Department lah budget atanga sum kan han pek thin lah hi a beitham bawk si a, amaherawhchu, Department Officer-te an fel a, central atangin direct eng eng emaw scheme siamin an hmu zawk mah a. Hei hi tun aia nasa zawka han thuam that a, Zoram hmun hrang hrang a khaw lum deuh, Pangang khawi theihna, thar chhuah theihna tam hi select bik ni se, anthurium kan tihte

ai chuan sum hmuh pawh a awlsam zawk bawk a, a enkawl pawh a nuam zawk bawk a, chu chu kan sawi duh a ni. Tam ka sawi loving a, kan inrawlh ve hrim hrim duh a, kha kha thahnemngaihna ah, Pu Deputy Speaker, kan sawi a ni e. Tin, vawiina kan Minister zahawm tak tak pathum te demand hi ka rawn thlawp bawk a ni e. Ka lawm e.

**DEPUTY SPEAKER** : A lawmawm khawp mai, hun i ren thiam a. Tunah chuan Pu Joseph Lalhimpuia i lo sawm ang.

**Pu JOSEPH LALHIMPUIA** : Pu Deputy Speaker, ka lawm e. Hei vawiinah Minister zahawm tak tak, pathum te demand kan sawiho dawn a. Sawitur chu ka nei ve nualin ka hria a, amaherawhchu, a Department zawng zawng erawh chu ka sawi lo vang a. Hmanni khan general discussion-ah tawite in ka tarlang tawh a, chuvangin, a bik takin Finance leh Planning chungchang ka han tarlang hmasa ange.

Pu Deputy Speaker, kan Finance Minister-in a budget speech-ah, 'year of consolidation' atan a puang a. Sawrkar insawhnghehna, sum leh pai harsatna insiamremna atana hma a la hi lawmawm ka ti hle a, lawmthu kan han sawi nawn ve leh hrim hrim a. Tin, year of consolidation-ah a puang a, chutih rual erawh chuan kan budget-te kan han en a, a chipchiar erawh chu ka en hman lo chungin, kan budget kalphungah OC(other charges) ah te tunhma a tam tak awm thin, helai House-ah te pawh kan sawisel fo thin kha tih tlem a lo ni a. Chutih laiin sum leh pai harsatna tam tak kan neih rualin, kan work programme-ah, hna tam tak thawhna tur budget-ah dah a ni leh theite kha, financial management tha tak kan Finance Minister-in a nei ani tih vawiinah hian he House-ah hian a lantir niin ka hria a, chuvangin, lawmthu ka han sawi a ni.

Tin, hmanni ah chanchinbu a ka hmuh chu, kan DONER Minister hova Delhi-a meeting-ah North Eastern states, Sikkim telin, chungho zingah chuan 12<sup>th</sup> Plan-ah NEC atangin pawisa kan hailut hnem ber a, project kan zo tam ber a ni tih thu ka chhiar a. Hei hi, Pu Deputy Speaker, a lawmawm tak zetin ka hria a. NEC-te, NLCPR-te sum leh pai pek dan, criteria, mumal tak an nei a, kei aia hre vek zawk in nih ka ring a, kan member zahawm tak takte hi. A ram zau zawng, geographical area-te, mipui tam dan te tehna hrang hrang a awm a. Chuvangin a tehna tlangpuiah hian Mizoram hi tam tak dawng thei tur leh a dawng tam ber chu kan ni hauh lo a ni tih a hriat a. Chuti chungin kan sorkarin theihpataw a chhuah a, hma a la a, a hmu hnem ber leh project zo tam ber kan han ni te hi a lawmawm takzetin ka hria a. Planning Minister leh Department officer's te hnenah lawmthu ka sawi a ni.

Hengah hian ka ngaihtuahnaa awm tam ber chu kan Chief Minister zahawm tak hova Monitoring Committee vaibelchhe 50 chin chunglam enkawl tur an han din te, tin, kan Minister zahawm tak Pu Zodintluanga Chairman-na hnuuia delay project kan tih, rei tak tak NEC project awm thin chhuichhuaka hnathawhna tur atana hma an han la te kha a chhante zing ami a nih ka ring a. Tin, hei hi nakin zel atan pawh kan ram tan a that ka ring a. Delay project chungchangte

pawh hi project 50 a huna zawh loh, kal mumal lote an han haichhuak a, chung zingah chuan engemawzat lai te phe chu project 10 chuang lai te phe chu kalphung pangngaihan an han dah chho veleh ta a. Hengte hi a lawmawm hlein ka hria a, lawmthu kan han sawi a ni.

Tin, kan pawisa kalphung kha kan hotuten an sawi thin a. Finance Commission recommendation ni bawk si, General Discussion a ka sawi ang khan Pu Dy.Speaker, February thlaa Union Budget Speech-ah Union Finance Minister-in CSS-ah te pawh funding pattern, sharing pattern a sawite leh Finance Ministry-ina O.M. a tihchhuah ang te, khatiang ang kha HRD Ministry hian an lo hre miah lo a ni tih te March thlaa Delhi kan zu kal khan kan hria a. Ka sawilang tawh thin a, kan Minister ka tanpuina Departmentah Education Department hnuaihan SSA te, Mid-day meal te 100 percent central funding tur a ni tih a ni a. Central Finance Ministry O.M. te pawh chhuak leh khatiang awm si kha March thlaa ka zu kal chuan MHRD Ministry-ah chuan Secretary te, Joint Secretary te, Officer liante chuan, “Chutiang kan la discuss lo, kan hre lo, a pangngai a ni ang”, an ti tlat mai a ni. Chutiang dinhmun sum leh pai harsatna takah chuan kan awm a.

Chuti chungin Pu Dy.Speaker, lawmawm em em tih vawiinahan hian ka'n sawi tel duh chu kum hmasa te, hun hmasa lamah te NLCPR kan tih te, NEC kan tih te CSS thenkhatah te pawh a ni a. Kan state matching share a huna kan pek theih loh avanga central atanga kan mamawh leh duhthusam pawh pawisa kan hmuhchhuah theih loh thin kha tun Budget-ah chuan khatiang atan khan vaibelchhe 50 a hranpaa dah a ni te hi a lawmawm hlein ka hria a. Thil tamtak ka thiam lova, ka hre lova, amaherawhchu, scheme base leh engkim ruahman saa budget tam tak lo pe thin kha divisible out lay kan tih, duh duha zalen deuha state-in Finance leh Planning Department-ten an lo her danglam ve thin kan State mamawh ang kum danga awm thin kha kuminah hian a awm ta mang lova. Chuti chungah matching share atana vaibelchhe 50 lai mai an han dah te, tin, heng hian kum hmasa lam leh kumin kum kal mekah pawh kan harsatna tam tak, ka sawi tak ang khan Education Department-ah pawh 1<sup>st</sup> Installment-a kan pek tur te pawh min han clear sak vek te hi Pu Dy.Speaker, a lawmawm ka ti a. Chung khaikhawmna atan chuan financial management mumal tak nen min hruai a ni tih a langin ka hria a.

Tin, capital assets siamna tur atana head hrang an han dah hi kan state tan hian thil thar a niin ka hria a, a lawmawm takzetin ka hria a ni. A chhan chu a chak chak leh a hai chak chakin, khawtlang a ni emaw, department a ni emaw nei ringawt lova, kan ram leh hnam tan a tangkai em, nakin zelah hei hi kan mamawh em tih lam atana hetiangah head hrang an han dahte hi a lawmawm ka ti.

Pu Dy.Speaker, ka sawi nawn leh duh chu - General Discussion-ah khan ka sawi tawh a. Khawngaih takin kan Finance Minister-in, min chhihchhiah sak sela ka duh a. Bial chhungah Lunglei khawpuia Electric Vengah ram zau tak mai YMA-in an nei a, hetiang capital assets tha tak siam nan hian sorkarah pawh an pe hreh lo a ni tih karawn sawi tawh a, chu chu he House zahawm takah hian karawn tarlang nawn veleh duh a. Chungah erawh chuan khawtlang



hruaitute nen inberemin veng tana hall lian tak pakhat awm thei sela an duh a, a bak chu niminah te pawh kan ngaithla a. Sorkar office building neih loh avanga luah manah ringawt pawh thlatin nuai tel kan seng a, kum khatah pheih chuan vaibelchhe engemawzat kan seng a ni a. Chung atan te leh thil dang atan pawh a tangkai hlein ka ring a. Khatiang atan khan hma min lo lak sak se, min lo chhinchhiah sak sela ka duh a.

Tin, NLUP-ah civil deposit-ah vaibelchhe 400 dawn lai hman tur kan la nei a. Department-in sorkar kum kalmekah sum hman tur kan la neih teuh laiin tun budget-ah khan nuai 6000 dang dah a ni leh a. Hei hi kan sorkarin miretheite a ngaihsak zia, sum leh pai harsatna tam tak kan sawi a, dawt pawh a ni lo, thudik tak a ni. Keini chauh nilo state tam tak resources nei tha zawkte pawh an mangang a ni. Chutih laia NLUP atana mi hnuaihning zawk te, kuthnathawktute tan nuai 6000 an han dah leh te hi he sorkar hian kuthnathawktute a ngaipawimawh ni tih a takin a rawn lantir leh niin ka hria a. Chuvangin he sorkar hian malsawmna tam takte pawh a la dawng zel ang tih ka ring a, hetiang zawnga a kal zel a nih pheih chuan. Kan hotuten min hruai dan hi waviinah hian kan ram leh hnam tan a lawmawm takzetin ka hria a. Chungte chu ka han sawinawn ve leh duh a ni.

Tin, Pu Dy.Speaker, Horticulture-ah hian thlai tam tak, Agriculture atanga indang mah ni sela kan thlai tam berte hi Horticulture Department hnuai a awm an ni a. Tunah chuan method thar leh changkang tak tak India ram leh India ram pawn amite hmangin thlai chi hrang hrangte pawh kan han nei tan a. Amaherawhchu, hei hi long run atan kan ram sik leh sa nen hian a inmil dawn em Hei hi productivity a awm dawn em? tih hi ngun taka ngaihtuah a ngaiin ka hria a. Hemi lamah hian ngaihtuahna kan Minister-in lo seng nawn leh se ka duh a.

Tin, hmun tam takah serthlum te, sawhthingte leh thlai tam takte pawh a tam, chutiang/khatiang, ran chumi/khamiin a ei zo tih te, natna hrikin a bawm tih te a awm thin a. Hemi chungchangah hian 'research' hi kan la nei tam taw lo niin ka hria a. Hetianga kan loneimite leh kan huanneimiten harsatna an sawi hian Pu Dy.Speaker, a chhanna mumal tak hi kan la inpe tam hleithei lovin ka hria a. Chuvangin hemi kawngah hian kan loneitute tha tichak tur te, an manganna sukian tur hian natna hrik hmuhchhuah zung zung theihna tur te, tin, chung natna hrikte chu a enkawl dan awlsam taka loneimiten an hriatthiamna tur atana kan intanpui theihna turin research-ah hian tan kan lak lehzual a pawimawhin ka hria a. Chu chu ka han sawilang veleh duh a.

Tin, Pu Dy.Speaker, ka hmaa member zahawm tak takte khan an sawi a. Duh vang reng nilo, vanduaina avanga mit-ah te, bengah te, kut leh ke-ah te harsatna neite Social Welfare-in a chhawmdawl thin a. Hei hi a tangkai takzetin ka hria a. Mi mangang te, pianphunga rualbanlote tanpuina a ni a. Hemi kawngah hian awlsam zawka tuna kan kalphungah hian a endiktu/check-tu hi an ngai riau mai a, doctor chi hrang hrang. Hei hi awlsam zawka a taka kan hmuh/ kan hriat, a tul a nih pheih chuan thlalak leh engemaw awlsam deuh zawka verify-a a pawm tlan theihna turte hi awm thei se ka duh khawp mai. Chungte chu ka han sawi nawn veleh duh a.

Tin, Sericulture Department-ah hian Pu Dy.Speaker, Lunglei cluster, Zobawk leh Hnahtial cluster-te saw cluster-ah chuan Mizoramah a ti tha berte zing ami kan ni a. Tunah hian Model Village-ah ka bial chhungah te pawh Rotlang 'E' khua ka thlang a. Kum hmasa atang khan Rotlangah sawn nasa takin hemi kawngah hian hma an la tawh a. Amaherawhchu, electric pek mumal theih lohna avangin cocoon enkawlna tur tunah hian kan la ti hleitheh lova. Hmanni lawkah khan Model Village hawanna kan nei a. Kan officer-te chuan hemi hi kan ti thei ang tih te an rawn sawi a. Hei hi a bikin kan Minister-in min lo chhinchhiah sak sela, tih kha ka han sawi duh a. Pu Dy.Speaker, kha kha demand chungchanga ka sawi duh chu a ni a.

Tin a tawpna atan chuan thilpakhat sawi duh ve ka nei a. Nizanah Bawngkawn a thilthleng kha social media, Face book leh Whatsapp group hrang hrangah kan hmu a, a pawl ka ti khawp mai a, Biak In tihchhiat chungchang hi pawl ka tih thu ka sawi duh a ni.

Pathian khawngaihna in India ram chhungah leh India ram pawnah khawngaih rawngbawl hna hruaitute zuiin kan lo kal ve zeuh zeuh a. Kum 2014 ah khan Jharkhand Jamshedpur ah khuan India ram pumpua Baptist thalai inzawm khawm pawl festival kan nei a, khatih lai khan Treasurer ah min thlang ve in, rawngbawlna min chelh tir ve a. Zannah chuan Christmas dawn ah hian bati kan chhi a Jamshedpur kawngah khan Christmas hla kan sa a, mike nen Pathian thu kan sawi a. India ram hmun hrang hrang atanga thalai lokal khawm te nen Pathian kan fak a, 'hetiangin Jamshedpur ah kan ti ngam ngai lo,' an ti hial a ni. Khulai a mi chengte phei chu an tap a ni. Kan ramah ngei Pathian biakna tihchhiat a ni ta hi a pawl ka ti a, hetiang hi thleng tawh lo sela ka duh a ni. Tunah chuan court thu a ni a keinin sawi theih kan nei lova. Amaherawhchu India ram, democracy ramah sakhaw zalenna hmunah kan awm a, kan kristian pui te India ram hmun dang ah pawh tihduhdahna an tawrh in kan tawngtai a, kan mittui a tla a ni. Chuvangin kan ram chhungah chuan eng sakhua pawh nisela hetiang thil hi thleng tawh lo sela, zalen takin Pathian chibai bukna nei thei ila tih kha ka duh a ni. Nizana social network hrang hrang a kan hmu te kha a rilru nat thlak ka ti a, he House zahawm tak i Chairna hnuaiyah Zoram mipui te ka ngen a ni. Kan ramah mahni sakhua theuh zalenna kan biak theihna tur hian hetiang ang Pathian biak in tihchhiat sak te emaw mahni sakhua be theilo tura indan buai ang chi, kawng hrang hrang a awm thei ang a, hetiang hi thleng tawh lo se la tih kha ka duh a ka han sawi duh a ni e.

A tawp nan chuan, kan Demand pathum te hi ka rawn support a ka rawn thlawp a ni tih kha ka rawn sawi duh a ni, ka lawm e.

**DEPUTY SPEAKER** : Midang kan sawm leh hmain thu puan lawk tur a awm a, Kan House Leader zahawm tak hi a hritlang a khawsik deuh nen, tin, RBI Governor leh a hote lokal te nen programme an nei bawka a chuvangin chawhnu lam chawlh a rawn dil

a, kan phal sak a. Tin, Parliamentary Secretary pahnih Pu K.S.Thanga leh Pu Zothangliana te tul dang thil avangin chhuah lawk an dil a kan phalsak bawk a ni. Tichuan, Pu Vanlalzawma i lo sawm ang.

**Pu VANLALZAWMA** : Pu Deputy Speaker, ka lawm e. Vawiinah kan Demand ka sawi hmain kan ngaihthlak zawh chiah lam kha han sawi ve lawk ka duh a. Tukin zingah kei pawh kha thawm kha ka lo hria a, opposition ho pawh in kan han sawi khawm thuak a. Naktuk lamah zero hour ah kan sawi khawm dawn em ni ang kan tih mek laiin he House zahawm takah Kolasib bialtu leh Lunglei E bialtu in an sawi tak siah chuan kan opposition lam atanga kan thil phut han sawi ve lawk ka duh a.

Nizan lamah Biak in tihchhiat a ni a ka rilru a na khawp mai a, a lehlamah a tuartu tan a nat dan tur leh a titu te pawh khan han ngaihtuah hian khatiang tih kha thil chakawm loh lutuk ni si engvangin, engatinge an tih tih hi, mi hi a shock em em a ni. Session te kan neih mek lai te a ni bawk a, Opposition Leader ka nihna ang a ka sawi duh chu he thil hi House Leader-in emaw remchang hmasaah House-ah hian thil awmzia hi min hrilh ngei se tih kha ka han Demand a.

Nichina kan ngaihthlak tawh ang khan hriat a hrehawm a, India ram hmun dangah te pawh thawm te pawh kan hre thin. Mizoramah ngei mai, kumin te pheih chu kan ngaihthlak angin NLUP sum kan hmanna te pawh kan ngaihthla zel a, Kelkangah Zoram pumpuiin harhna kan tawn chhoh mek laia, khatiang thawm ngaihthlak tur an awm kha a lungchhiat thlak a, a hrehawm a, mi tuemaw kha kan va dem a ni hran chuang lova, ama'rawhchu thil awmzia hi chu he House hian kan hraitfiah a va ngai em tih chu Opposition lam atang hian kan Demand a, chu chu kan Ruling lam te pawhin min pawmpui ka ring a, kan House Leader emaw, Home Minister in emaw naktuk lamah chuan min sawi fiahsak ngei kan beisei a ni tih kha thuhma lamah kan sawi duh a ni, ka lawm e.

Finance lamah khan thil pakhat kan sawi duh chu, nikum lamah pawh khan ka sawi tawh a, Taxation ah hian. Taxation hi a tul lutuk a, vawiinah pawh kan sawi nawn leh duh fo chu chhiah pek dan hi awlsam leh zual a ngaihtuah ni thei se. Tunhnai ah hian enge ka hre thar vak lo va, thil awlsam ta te kan nei em? Nikum lama kan sawi tak atang te hian. Chhiah pek hi ala harsa tlat a ni Mizoramah hian, chu chu Taxation Department ah chauh a ni lova, Bill hrang hrang pekna ah Bill pek hi ala har lutuk a ni. Hei tak hi kan Minister hian Finance Minister a ni bawk a, mipuite tana awlsam a bill te, chhiah te pek dan hi siam a ngai a, chu chu hna pawimawh deuh mai niin ka hria a ni. Tin, Mizo te hi bill pek lam pang hi kan hreh lem lovin ka hria a, lo hreh deuh te chu an awm ang, amaherawhchu, 90% hian bill pek kan hreh lo a ni. Ka sawi tawh em ka hre lova, kan sawi nawn leh lawk ang. German rama chhiah pek awlzia an sawina a ni. Hman deuh tawh khan

a ni a, parawl pakhat hi a thi a an hre chhuak lawk lo a ni an ti. An hriat chhuah meuh chuan kum 3 a vei tawh an ti. An sawi tak bera chu a bill pek tur zawng zawng hi authomatic-a a account atanga in cut turin a ti a, chutih laiin a pawisa lut tur reng reng hi a account a lut zel turin a lo ti bawksi a. Tichuan an hriat chhuah meuh chuan kum 3 a lo ral hman tawh a ni. Chu chu chhiah pek a awlzia sawi nan an hmang thin a ni, chulai te chu kan sawi ri leh duh lawk a ni.

Chhiah pek te, Bill pek te awl se pawisa pawh kan hmu tam ang. Chu chu vawiinah Pu Dy. Speaker, Taxation chungchangah kan sawi duh a, Bill dang dang nei chi te pawh kha a huam a ni.

Tin, Law and Judicial ah khan kan member zahawm tak tak ten an sawi ang khan an ti lawmawm ka ti a, hei dan thar te kan han ti chho mek hi a lawmawm a, tiang hian chak deuh taka kalchhoh zel ni se, kan mamawh tam tak a la awm tih kha kan sawi leh duh a.

Social Welfare Department hi tun hmaa kan hriat Social Welfare Department hi a ang ta lo riau mai a, tun hma kan hriat ve dan maiah chuan miharsa te tanpuitu a ni a, tunah pawh a la ti tha viau in ka hria a. A bik takin tlawmngai pawl te leh Voluntary organization, mipuite tana rawngbawl tan hian belhfak awm tak kha an ni thin a. Kan mamawh tam tak kha kan va dil a min lo pe thin a, vantlang rawngbawl na tur atana kan mamawh heng chhiatni that ni a kan mamawh Bel te, Thuk te, No te leh Parachute te tih ang chi kha hei hi chutiang zawng chuan a lang ta mang miah lo hi tih thar leh a tha lawm ni? Dik tak chuan Mizoramah hian kan vannei a, NGO (Non- Governmental Organisation) hi kan ti a, kei chu ka ti phal chiah lo va. Kan tlawmngai pawl thenkhat hi. VO (Voluntary Organisation) dik tak an ni heng YMA, MUP, MHIP kan tih te hi. Mi rama NGO ang hi chu kan ni miah lo, purely voluntary Organisation a ni, hlawh pakhat mah beisei lovin mipui tan leh pawl te tan leh ram tan an thawk a. Heng ho tihchakna ang chi sum leh pai kan nei ta miah lo mai lai hi vawiin hian a vei awm in ka hria a. Social Welfare Department kan hriat thin ang hi a ni ta lo. Chuvang chuan Pu Deputy Speaker, kan Finance Minister leh kan Minister te pawhin tizawng khan a her leh theih lawm ni tih ka ngaihtuah a.

Tin, kei ka duh dan tak phei chuan heng tlawmngai pawl a bik takin purely Voluntary Organisation ho te chu an khawmpui eng ilo an tih na tur te pawh hi Budget ah hian a dah theih lawm maw ni le aw tih te ka ngaihtuah a. Tunah pawh Bairabi ah Central YMA khawmpui a awm dawn a, tah chuan Department hrang hrang pawisa engtin tin emaw, rem leh rem lo in an pawtkhawm leh a nih ka ring a, chuti bak pawisa a awm si lova. Heng tur te pawh hi a earmark theih deuh lawm ni? Kan in zirtir te lah hi ram tan a tha, he hnam tan a tha vek a ni. Tin, MUP pawh a ni tho, MHIP pawh a ni tho. A

bik takin heng tlawmngai pawl pathum hi, Zoram pum huap lehngal hi. Heng ho khawmpui senso tur ang te pawh hi Budget ah hi chuan dah thei ta ila, khawilai khaw Development tur atan emaw kan lo earmark pawhpen ngai lo hian, heng ho kum tin an inkhawm na tur te hi chu tam pawh hi a ni lo tih kha vawiinah ka'n sawi lang duh a. Chu chu kan ram tan, a chhawr tu chu Mizoram mipui vek tho kan nih na ah hian khati zawng khan ngaihtuahna hman ava tha em. Social Welfare Department hi kan hriat thin ang hian a kal leh thei lawm ni tih kha vawiinah ka'n sawi leh duh a.

Tichuan point khat chauh ka sawi tawh ang a, a dang hi chu thian te pawn anrawn sawi ngaihnaawm a, tha tak tak an sawi a ka sawi vak lo ang a. Nimina ka sawi pakhat bawka sawi duh chu Fisheries ah hian. Fisheries ah hian a sangha no sem vak vak ai mah hian sangha chaw hi tlawm deuh a tih theih dan a awm em aw tih kei ka ngaihtuah dan a awm a. Lo tlawm ta vak se, lo subsidies ta vak ila, a mamawh lo chuan kan lei chuang dawn lo reng reng, a mamawh chiah in an la ang a. Tin, an mamawh bak chu an chhek nghuk miah lo vang, nimina ran chaw kan sawi ang deuh khan. A mamawh tawka te bak hi a tul miah lo. Heng silpauline kan tih te hi chu hman mai loh pawhin kan dah reng thei a, khawilai kil ah emaw mamawh hun atan ti in a chhe mai thei bawka si lo va. Amaherawhchu ran chaw kan han tih ang chi, sangha chaw kan han tih ang chi hi chu kawla reng chi a ni lo va, mamawh chawp zela lei chi a ni a. Tin, a mamawh lo tan chuan va lei hi a tul pawh a tul reng reng lova, min pe pawh ni se lak kher pawh a ngai mang lo a ni. Chuvang chuan helam a chaw supply lamah hian subsidies dan a awm lawm ni? Chu chu sangha khawitute tan hian a tha ber mai awm mang e aw, a no han supply tih lah chu kha nichina kan ngaihtlak tawh ang khan fuh vak lo kha a tam em em mai a, tiang zawng te khan in her hret thei em tih Pu Deputy Speaker, ka'n sawi duh a. Sawi tur tam tak a awm thei ang a, ka duhtawka ang e. Ka lawm e.

**DEPUTY SPEAKER** : Hun i hmang thiam khawp mai.

**Pu R. LALZIRLIANA , MINISTER** : Pu Deputy Speaker, nizan thil thleng kha Opposition Group Leader khan a demand deuh a, sawi a rem em? (Speaker : Deputy House Leader a ni a, han sawi sela)

Aw, nizan thil thleng kha a vanduai thlak tak zet a, a thlen hnu lawka khan minrawn phone a, pawka tih thu te pawh ka lo sawi a. Hetiang hi Police lam atanga an hmuh dan ka'n chhiar chhuak ang e Pu Deputy Speaker, i remtih na in.

October ni 13, 2015 Bawngkawn Brigade ram a thil thleng chungchang tih a ni a. Nizan October ni 13, 2015 dar 7: 20 vel khan mipui thinrim kalkhawm chuan Bawngkawn Brigade ram chhunga ram inchuh meka biak in tur atana building sak chu an tichhia a ni. Building tihchhiat tum an awm tih hriat a nih veleh Bawngkawn Police

Station atanga SDPO leh OC hovin mipui hi lo kal khalhin theihtawpin lo dan an ni a. Mahse, zanthim hnuaiiah mipui chuan lung hmanga building an vawm chu dan sen a nih loh avangin tile bang, tukverh frame leh darthlalang cheng 1,5,170 man hu vel chu a chhia ni a hriat a ni. He thil thleng avang hian Bawngkawn P.S ah case no. 257/15 dated 13.10.2015 under section 143/147/427/506 IPC ziah luh niin uluk taka chhuizui nghal a ni.

Land Revenue & Settlement hotu atanga document a a lan dan chuan Director, Land Revenue & Settlement hian Secretary, Baptist Church of Mizoram, Bawngkawn hnenah ni 6 May 2015 khan Stay Order Letter no. C1306/N-6/13DISP/DTE(REV)106 hmang in a pe tih hriat theih a ni a. Tin, Deputy Director, Land Revenue & Settlement pawhin ni 7 August 2015 khan lehkha no. C1306/N-6/13DISP/DTE(REV)/173 hmang in helaia Biak in sakah hian inkhawmna emaw kut lo thlakna chi engpawh phal a ni lo tih ka han hriattir a che u, tiin hriattirna a pe bawk a ni. Hetia thu a kal mek lai hian ni 6.10.2015 khan Senior Civil Judge, Aizawl chuan helai ramah hian Revenue Department hian kohhran ten ram an neih luah leh hman (possession/occupation and utilizing) dal zawngin a in rawlh tur a ni lo (Restraint from interfering) tiin thu a chhuah bawk a ni. Chu chu thu awmzia chu a ni.

**DEPUTY SPEAKER** : Court te an thleng tawh a. Chuvangin House-ah chuan sawi zui vak tawh lo ila. Subjudice a nihna chin a awm a ni. Le, kan demand-ah khan Dr.K.Beichhua.

**Dr.K.BEICHHUA** : Pu Deputy Speaker, Ka lawm e. Ka sawi nghal zung zung mai ang a. Demand No.8 na Taxation – Taxation hi kan ram, tuna kan context-ah chuan department pawimawh tak a lo ni tawh dawn a. Sum kan lak luhna tur tam tak a nih avangin. Chuvangin, sales turn-over concealment tam tak an lo neih thin te, C&AG Report a kan lo hmuh angte hi tun kan hma lamah hian chuan Minister leh a thawktute hian taima taka an tih a, theih tawp chhuah a assessment-ah hian hma kan lak nasat a ngai in ka hria a. Chumi ti theitu chu an ni tih pawh ka hria a. Chuvang chuan, chumi a chak zawka hma la turin a hmasain ka sawi duh a ni.

Tin, Finance Department Demand No.9 hi sawi leh ta ila. Sawi tawh ang khan good governance nei tur chuan good financial management kha a pawimawh kan ti a. Kumin a kan budget han en hian chuti em a lungchhiat thlak tur niin ka hre lo a. Kan han sawi a 50/50 kan han tih te chuan ro nghal deuh mai turah hian kan in ngai deuhin ka hria a. Chutiang a nih lohna lai kha nimin lamah pawh an lo sawi nasa a. Sawi zau dawn chuan hun ka ren ve deuh bawk si a. Chuvang chuan, hei hi conditionalities neilo a kumina kan kal dan tur leh an thil tih danah hian Zopa rilrem tak a niin ka hria a. Chuvangin, Year of Consolidation kan puang a, helaia kan in manage dan hian a hril nasa dawn in ka hria a. Chutilaia ka rilrua awm chu kan Finance Minister hi a tang nasa bawk a inrenchemnaah hian. Inrenchemna a hma kan lak duh chuan lak theih tak a ni ang a. Chutih rual rual chuan management fel lo a kal hlauh te pawh thil awm thei tur a ni lai hi a ni pawh in a hriatchian ka ring a, khalai kha tan a pawimawh hle in ka hria a.

Tin, thil pakhat pawimawh deuh a ka hriat chu heng sum department lama kan release hian, department zawng zawng hi rualkhai taka tih hleih theih lohna hi a awmin ka hria a. Priority kan pek ngai department pawh hi tam tak an awm in ka hria a. Chutah chuan example-ah Health Department te hi han sawi ta ila. Department dang anga sum hi an mamawh hun taka pek loh chuan thih leh damna inkar thil a ni a. Kan tih loh chuan 'now or never' tih ang deuh kha ani a. Chuvang chuan, heng Health Department, kan hriselna enkawltute, kan natna leh eng eng emaw thil a min enkawltute tan hian chuan relaxation pek te pawh hi a van tha dawn em tih kha ka rilruah a awm a. Chuloah, sorkar hnathawkho zawng zawng tunlaia kan harsatna chu kan GPF kan mamawh huna kan withdraw thei lo hi sorkar hnathawkho manganna tak tak a niin ka hria a. Hei pawh hi damloh nikhua leh eng emaw mangan nikhua a GPF withdraw hi tun ang em a harsa lo hian min siamsak thei se tih kha kan Finance Minister hnenah hian ka sawiduh bawka ni.

Tin, Demand No.32 – Horticulture kha kan lo sawi theuh a. Horticulture hi kan Zoram khawvelah hian hmasawna a kan kal chhoh zelna a rahbi pawimawh tak a ni a. Chutihlai chuan, a point te te in ka lo sawi mai ang a, sawi vak hman kha anih loh avangin. Kan budget a ka lo enah khan Medicinal Plant tur khan ka rilrua ka lo ngaihtuah ai chuan sum kha a tlem deuh in ka hria a. Kan ram hi India ramah chuan Horticulture hmalakna atan Mizoram ang tluk hi a awm a ngem aw tih theih hi a ni a. Chutihlai chuan, Medicinal Plant te hi nasa tak hian beihpui thlak in ti ta ila, Pharmaceutical Company hmundang dang a mite pawh hi kan rama hma lo la tur te pawh hian chah ta ila, sum hi nasa taka kan lak luh theih ka ring a ni. Chu chu kan Minister zahawm tak pawh khan min hriatsak se ka ti a. Tichuan, thlai chi supply chungchangah hian khawlai tawngkam te pawh a ni mai mai thei bawka, tin, AMFU lam hotute tawngkam pawh ka hre ve zauh zauh a. Heng thlai chi supply-ah hian keini AMFU member taima tak leh kuthnathawktu dik tak te hi thlai chi te hi min supply tir thei se. Tuna kan dinhmun angah hian chuan department a kan hotute hian anmahni huan a mi hi an supply mai a ni lo maw, tih tawngkam te hi ka hre ve thin a ni. Chu chu tak tak nge tak tak lo tih pheih chu ka hre lo a. Hengte pawh hi min enchian sak tha hle in ka hria a. Chutiang chuan Horti-ah hian scope lianpui Mizoram hian kan nei a ni tih ka sawiduh a.

Demand No.4 – Law & Judicial-ah khan Mizoram hi crime detection-ah hi chuan India State dangte nen han in compare hian a tha pawl kan niin ka hria a ni. Chutih rual rual chuan, keini ang blind man, dan leh dun hre lo tan chuan a hremna lampang hi kan hniam deuh emaw chu aw tih turin, hetia blind man in misual taka kan ngaih ang chi te hrem mang lo a kan awm hi misual kan in vulh lian a nilo maw tih kha rilruah lian takin ka nei a. Chulai chu kan Law Minister zahawm tak khan min hriatsak ka duh bawka.

Fisheries hi vawiin chu a lar khawp mai a. Demand No35 – Fisheries Department kha han sawi leh hlek ila. Fisheries Department hi kan sawi tawh ang khan ka hmalama rawn sawitute chuan Secretariat tualah te sangha tui tak tak, heng Temple tualah te tih kha kan rawn sawi a. Hei hi kan han hriat meuh chuan lei tur hi a lo awm tawh mang thin lo a, a lo zo hman zel a. Chuloah tuna kan sangha ei hi a tlangpuiin phai lama kan lak deuh vek hi a la ni a, hma thar

lak hi a ngai tak zetin ka hria a, bul tan that hi a ngai ka ti a ni. A chhan chu, hmanni lawka Sangha chi kan supply ang chi te kha han ngaihtuah ta ang ila, a rate dik tak anga han lei dawn chuan nuai 32.79 a lei theih tur kha nuai 121.52 in kan lei a ni. A difference chu 88.71 a ni ta a. Chu chu ka ngaihtuah a Serlui 'B' atanga nuai 88 hmuh chhuah leh chu a van har dawn em tih kha ka rilruah a awm a ni. Chuvangin, Fisheries lam hian theih tawp chhuahin hma la ta se, tin, Sangha dil siamna tur te pawh hi hmun tha leh productivity that deuhna hmun tur pawh hi thahnemngai zawkin tun ai hian hma min lak sak se tih hi a chakawm hlein ka hria a. Chhim lamah te pawh sawn hma min lo lak sak zel se. Palak dil te pawh saw dil zau deuh mai a ni a, sawtah pawh sawn gage culture te ti ta ila, tam tak kan thar chhuak ve thei ang tih kha ka sawi duh a.

Demand No. 41-na Sericulture hi ka ngaihtuah thin a, thusawitu te pawh khan an lo sawi tawh a. Kumin kan budget-ah khan crore 16 leh tih vel kha kan budget-ah khan Sericulture tan dah a ni. Chutilai chuan nikum lama Cocoon atanga kan thil zawrh chhuah kan han chhut khan nuai 60 vel lek a ni ta a. Chu pawh chu ZOHANCO in a lei sak kha a ni a, ZOHANCO thiah a ni ta mai bawk nen engtin nge product hi kan siam chhuah ang? ZOHANCO siam chhuah a nih chuan Sericulture chu thiat mai ang u ti dawn ila han thiah theih chi a ni si lova. Engpawhnise, heng lai hi a concerned Minister khan chak leh zuala hma thar lak dan tur leh hma thlir min neih sak se a tha hlein ka hria a ni.

Demand No. 19-na LAD hi question ka siam fo va, Recreational Park hi vawi hnih lai ka siam a, a chhuak lo ve ve a, chhuak se sawi vak ka chak tehreng nen. Governor kal ta A.R.Kohli khan, "Mizoram chu recreational activity engmah in nei lo va, Park pawh in nei lo va, Restaurant pawh in nei lo va, nula leh tlangval an in date chuanin thil thalo hi a chhuak thin alawm," a tih kha ka rilruah a awm a. Chuvangin, vawiih hian Recreational Park hi kan ram hian a mamawh tak zetin ka hria a. State dangte rual aw h a na thin a ni. Tun laia Kohhran Thianghlimin Coronation Day an hman Solomon Temple-te pawh kan hlut zia chu mipui hriat a ni a. Tuna LAD a Recreational Park kan neih te te tepawh hi tun aia changtlung zawka mipui tan pawha rilru leh taksa hah dam ve hi kan mamawh a mihring chuan, thawh tlut tlut hi a ni lova, recreational activity hi mamawhlo kan awmlo a ni. Chuvangin, Recreational Park hi tun aia tam zawk, anih loh pawn tuna kan neih sa hi mipuiina kan hlut em em leh kan tuihalna hi tihchangtlun ni bawk se tih hi ka sawi duh bawk a.

Social Welfare, Demand No. 29-na kha sawi leh ta ila. Social Welfare hi a pawimawh hle a. Ram hmasawna rahbi tam tak hi anmahni kutah a inngat kan ti lo thei lova. Ministry of Tribal Affairs-a an official-te khu vawi hnih vawi thum ka kawm ve tawh a Delhi-ah khuan. In state atang hian DPR tam deuh zawk hi rawn thehlut ula, inthehlut tlem deuh hlek a ni tih hi vawi hnih vawi thum min hrilh tawh a ni. Chu chu a concerned Minister pawh khan rilruin min lo hriat sak se kan tan a ngai hlein ka hria a.



Chulovah chuan disable person kan tih, job reservation kan tih ang chi hi a department chuan dan leh dun tha pawh lo nei ila, puanzar leh mite awareness pekah hian kan hniam deuhin ka hria a. Chuvangchuan, hengah hian awareness pek that a, heng kan disable te pawh hi job reservation-ah te pawh hian ke rawn penchhuak deuh tur te pawhin kan hrilh a ngaiin ka hria a ni.

Tin, disable leh multiple disable kan tihte ang chi, tun hmaa hearing aid kan tih ang chi te kha tunah hian pek theih an ni lovin ka hria a. Hengte pawh hi mi khawngaihthlak ka bialah te pawh khian an tam viau va. Hengte hi pek leh theih ngei ni thei se tih kha ka sawi duh bawk a.

Demand No. 14, Planning-ah khan Mizoram 1952-a kan plan out laid hmasa ber chu nuai 23.02 lakhs a ni. U.T. kan nih tirh atanga a hmasa ber plan out lay chu nuai 275 a ni a. Chungte ngaihtuah chuan tuna kan plan out lay chu khitah khitah a ni tawh a. Chutih rual rual chuan kan kal chhoh zel na turah sector te leh approved out lay leh report proposed outlay atanga 12<sup>th</sup> Five year plan kan siamah te hian department priority kan pek dan atang hian rilru kan insiam tam a ngaiin ka hria a. Tun hmaa department revenue generate thil ang deuha kan ngaih ang te kha tunlai khawvel angah te chuan a lo ni tawh lo mai thei a. Tun hmaa thalo kan tih ang chi te kha tun khawvel angah te hi chuan a tha te pawh a lo ni thei a. Helaiiah hian flexibility kan nei deuh a, Plan kan siam chung changah te pawh hian. Tuna kan siam te pawh hi a tha thawkhat viau a. Hei aia changtlung zawka kan siam theih te pawh hi a van tul dawn em tih kha ka sawi duh bawk a.

Tin, Pu Deputy Speaker, nichina Social Welfare nichina kan sawi kha thil pakhat ka sawi hmai a, Social Welfare a kan hmalakna leh Health Department atanga hmalakna tam tak hi a kal dun emawni tih tur hi a nihna lai a awmin ka hria a. He Department pahnihte hi thukhawm ta se, example-ah, raipuar tana nutrition supplement kan pek ang chi heng Calcium Social Welfare Department-in in lo sem ang chi hi Health Department hian an lo sem ve tho bawk si a. Chuvangchuan, in sem thuah te kha year of consuludation kan puan kumah te kha chuan a ni lo viauvin ka hria a. En dun a, sawi dun a thil tha zawk tih chhuah a van tha dawn em tih kha Pu Deputy Speaker, he House-a ka rawn sawi chhuah theihte chu a ni e. Ka lawm e.

**DEPUTY SPEAKER** : Tunge han sawi ve leh ang le. Pu R. Vanlalvena a phar hmasa tlat mai. A dang pahnihin an phar bawk a. Awle, Pu R. Vanlalvena i lo sawm ang.

**Pu R. VANLALVENA** : Pu Dy. Speaker, ka lawm e. Vawiina kan sawi tur hi Department a tam viau a. Amaherawhchu, member zahawm tak takten an sawi tawh a, an

sawi hnu kha chu sawi ka tum lutuk lo. Tin, nimin lamah Budget, pawisa lampang kha chu kan sawi tawh bawk a, luhchilh ka tum vak tawh lo bawk.

Department hrang hrang sawi lovin, ka ngaih mawh zual tlem leh rawtna eng eng emaw ka siam duh deuh, department li bawr vel chauh rawn sawi ka duh a, hun rei lo deuh turin.

Pakhatnaah chuan Sericulture hi a pawimawhin ka hria. Sericulture Department kan hriat dan lar berah chuan, pangang khawi a, silk tichhuak tu tiin kan hre larin ka hria a, a pawimawh khawp mai. Nichin khan kut hnathawktu te an hlawk loh dan an sawi tawh a, a pawmawm khawpin ka hria. Amaherawhchu, kan ram hian kut hnathawktute Sericulture a ni emaw Fisheries a ni emaw Horticulture te kan promote hi kan ram leh kan hnam zahawmna tur niin ka hria a, hetiang zawng hian kan kal zel hi a tha ka ti a. Hmun danga hnathawk tura in thawn chhuah, a pawimawh rual rualin, chu aia pawimawh zawka ka ngaih chu keimahni ramchhunga kan tih theih tur ang hlawk zawka an tih theih tura inzirtir leh department leh sorkar pawhin hma kan lak a tul ka ti.

Sericulture hian pangang an khawi thin a, nimin piahah pawh khan kan House Leader zahawm tak pawh khan a rawn sawi zawk a. Kan pangang khawi hi chi hrang hrang a awm a, a khawi dan ki te pawh a in ang lova, Thingtheihmu kan tih leh Mutih kan tih ang chi te a awm a. Chung zinga pakhat chu Muga hi a ni. Muga hi Assam hovin an chin thin, hlawk nan pawh a an hman a ni a. Boruak a lum chak em avangin Assam ramah a tha thei tawh lova, khaw vawt lampang hi an rawn pan tawh a. Mizoram te, Arunachal te, Manipur tlang ram thenkhat te, Nagaland tih bawr vel hi a that duh na hmun a ni a. A hma-a a that duh na hmun hi a rawn in sawn chho tawh a ni. Chuvang chuanin, kan department te pawh hian helam zawng hi nasa leh zual hian bawh ta ila, Muga pangang khawi hi in zirtir ta ila, a hlawk zawk ka ring a. A chaw atana kan ram in a kan neih sa thing Bul leh Nauthak hi a tha a, an ei duh ber te zinga mi a ni a. Chu chu kan ram thing pangngai a ni a, hei hi a tha hle a ni.

Tin, a chi dang mutih, thingtheihmu te ai pawh hian a hlawk daih zawk lehngal a, a awlsam bawk nen. Thingtheihmu te an chin hi chuan, a pangang chi leh a Thingtheihmu hnah te kha Thlangra-ah te an dah khawm a, hnah han dah chuan lum a siam a, chu lum chuanin Pangang te kha a tithi thin a, an khawi sa hi a thi duh em em a. Hemi Muga an tihah hi chuanin Bul leh Nauthak thing hi tha takin an phun a, a kungah zawk khanin Pangang kha an chhuah mai a. Sava ten a rawn ei loh na turin an veng thung a, Bul leh Nauthak hnah a han ei puar khan a lo chhuk thla leh mai thin a. An lo chhuk kha an lo man thin a ni. A lo chhuk kha lo ven tur a ni a, leiah a chhuk tlang zel lohna turin thingkung kha sarang ten an tuam a, chu chu Pangang khan a zawh tlang thei lova. Chuvangin a awlsam bik em em mai bakah a Ril a rawn thar chhuah hi a

hlawk a, a man a to em em bawk a. A ril hi Thingtheihmu atanga an thar chhuah te ai hian a let fe in a man a to zawk bakah, khawvel ram lum zel, global warming kan tih veng tur atan pawh a tha em em mai a. Chu chu kan department lam pawh hian uar ta zawk ila kan ram tan a tha anga. A chingtute pawh an hlawk theih zawk a rinawm mang e ka ti a. Amaherawhchu, kan Budget han en hian duhthusam chu an thawk thei miah lovang tih ka ring a, kan Budget te nimir lamah te, nimirpiah lamah te kan sawi tawh angin kan duhthusam a nilo em mai a, duhthusam a siam thei pawh kan ni lo va. Chuvangin, kan neih chhun ang angah pawh hian kan department leh kan Minister zahawm tak takte hian hma la ta se kan hlawkpui zawk awm mang e tih kha rawtna tawi te ka'n siam duh a.

A dawt lehah chuan Demand No. 35-na – Fisheries Department ah hian, nichinah kan member pui zahawm tak tak ten an sawi tam tawh a. Point pakhat chauh han rawt ve ka duh chu – Sangha hi area deuh hian thlang ila a tha awm mang e aw ka ti a. Sangha khawi chu Zo, tlangsang lamah chuan Sangha dil neih hi a rem lo em em mai a. Tlang zum tak tak te, kawr han khuah a Dil zau thei si lo, fur ah ruahtui a lo tam a, Dil a sah leh thul, khatiang kha a nih avangin zotlangsang lama a chi sem a hmalak ai chuan, tlem a a hlawhtlinna tur ram area deuh, Sangha Dil han siamna tur atana hmun rem zawk, a bik takin Kolasib District te, Mamit District te angah hian in sawrbing ta deuh ila. He lamah hian kan Sangha chi neih ang ang te, tanpuina kan pek theih ang ang te pawh hi pe tam ta zawk ila kan ram hian a hlawkpui zawkin ka ring a. Chutiang tur chuan a kal theih lawm ni tiin rawtna ka'n siam duh a. Pawisa pheih chu Sericulture kan sawi ang tho khan department hian an ngah miah lo a ni tih an Budget atang hian a lang reng a. Amaherawhchu, an neih ang ang ah hian kan ram leh hnam hian a hlawkna a tel zawk awm mang e ka tia ni.

A dawt lehah chuan Demand No. 32-na Pu Dy. Speaker. Horticulture hi kan hria a, hma an sawn em em a, an hmasawna hi a takin ram tin, tlang tin ah hmuh theih in a awm a. Chumi an hmasawn em em kar ah chuan thil pahnih chauh. Kan member zahawm tak Pu Sangkunga rawn sawi zawk, thingpui chin chungchang kha, kum rei tak ka ngaihtuahna leh ka inhnia na thin a ni a. Thingpui chin hi a hlawk har khawp mai a, amaherawhchu kan ramah kuthnathawktute tan a hlawk tur thil kawhmmuh tur a vang bawk si a, thingpui hi Mizoramah hmun thumah china lian deuh deuh chu a awm in ka hria a, Biate, Ngopa leh Kawnpuih Pangang khawitute kan sawi ang tho khan an hlawk hlei thei lo a ni. Tunah hian thingpui hnah hring an sih thlak hlim hlawl hi Kg khat ₹ 15 in an leisak thin a, chu pawh chu leitu tur an hre meuh lo. Biate ah khian kar khatah ni hnih (2) te an leisak thin a, a leitu lam hi an indaih lo em em a ni. Sih hlim hlawl hi Kg khatah ₹ 15 in lei ta zar zar se chuan Thingpui chingtute tan pawh hian a hlawk ve deuh hlekin ka ring a, eizawna tlingve tak pawh hi a nih ka beisei a ni.

Chutihlai chuan, a theih em aw ka hre lo va, hei Horticulure Department nen a in kaihnhawih chiah chu a ni lo na in, kan Industry Minister zahawm tak tak te leh kan Finance

Minister lo hriat atana ka duh chu Thingpui herna khawl hi an mamawh a ni Mizoram hian. Thingpui herna khawl tha hi nei ila chuan vairama an tih ang tak tak a tha te hi nei thei ilang chuan Kg-ah ₹15 a la zar zar duh hi chu awm seng chuan kan kut hnathawktu te hi an hlawk ve khawp ka ring. Biate ah khian khawl lian vaklo hi a awm a, Kg-ah ₹15 in kar khatah vawihnih te an lei a, a lei seng lo a ni, lei tur khi a tam lutuk a. An lei khat deuh chuan in thingpui kha a lo thang zel a, sih a tam a nia, hralhna an hriat loh chuan a lo thang zel a, an sih loh na na na chuan a tlem ve tulh tulh thin a, hralhna chu hria se chuan a tam khawp ang. Eizawna tling pawh ni theiin a lang a ni. (Pu Deputy Speaker)

Chuvangin, khawl tha zawk te hi neih theih a ni ang em aw tih kha ka ngaihtuahnaah a tel a. Vanduaithlak takin tunah hian Mizorama thingpui hi a eng tan a, a hnah hi natna in a bawm tan tlat mai a, kan Horticulture Minister zawhawm tak te, kan Officer te hian a tihdan hi an hria in ka ring a. Demonstration kan ti dawn nge, enkawl na an siam theih chuan tunah hian a la dan theih ka ring a. Chutihrual chuan, Serthlum tam kan tireh hlei thei lo tlat mai hi enge ni a chhan ni ang aw? ka ti a. Fiamthu ti takin, miin Atom Bomb pawh an siam thei tawh a, Serthlum tamna chhan kan la hrehleithei lo tlat hi chu kan tan zual deuh chu a ngai a ni.

A tawp berah chuan, Pu Deputy Speaker, taxation hi kan inngahna tur a ni. Kan member zahawm tak tak ten an sawi tawh a, thahnemngaih thu ah kan sawi leh talh duh chu, kan tan leh zual hi a ngai. A.G. report a an chhan dan hi a tha lo khawp mai a, hei hian tanna pe se, kan chhiah te a pun ve theihna turin Tax lakna tur item-ah te hian dik tak a chhiah chawi tuten an chawi theihna turin tan han la leh zual teh se. Chu chu hun cheptak kar ah ka sawi duh a. A tawpnaah chuan, kut hnathawktu te kan chawikan theihna tur thil- Sericulture te, Fisheries te, Horticulture te, a thatna kan hmuh mai theih tur thil leh kan ram leilung hausakna kan hman tangkai theihna tur hi theihtawp a kan ram hian, kan sawrkar hian, department hrang hrangte hian mahni tih tur theuh rinawm taka ti a tan kan lak hian kan ram hi a zahawm ang tih hi ka ring a ni. Pu Deputy Speaker, wawiina kan Minister pathum te demand rawn chhawpchuah hi pawm ngei a nih theihna turin ka rawn support e. Ka lawm e.

**DEPUTY SPEAKER** : A lawmawm e, midang te ai chuan i pel thui vak lo e. Pu K.Lalrinthanga leh Pu T.T.Zothansanga te an phar lawk tawh a, Pu K.Lalrinthang kan ko hmasa ang.

**Pu K.LALRINTHANGA** : Pu Deputy Speaker, ka lawm e. Wawiin demand kan sawi tur department hrang hrang hi sawi vek ka tum lem lo a, Pawimawh ka tih deuh deuh atang hian tawi te te a ka ngaihpawimawh te han tarlan ve thain ka hria a. A hmasa berin Demand No. 8 na Taxation Department a ka ngaihpawimawh chu Tax tihpun leh khawn thawm a lo awm reng reng hian Mizo mipuite hi kan phun hma lutuk a. He mi kawngah hian awareness siam te pawh a tha in ka hria a, department lam atang hian engtin emaw ngaihtuahna rawn siam se la. Tlema Tax a lo san deuh hlek

chuan chutiang khatiangin a sang leh tawh tih kha a ni thin a. Mipuite thinlungah Tax pek chak lohna a lo awm thin a, hei hi tih reh a ngai in ka hria.

Chutih rual chuan Special Category State hote pawisa hmuhna ang chi hote Central sawrkarin han tihtawp sak hian thinlunga lo awm let ve leh chu, Special Category State ho in Tax an lakna ang chi thenkhatah hian Mizoram sawrkar hian Tax kan la la lovin ka hria a. Chuvang chuan khang State-te kha tlukpui tura ruahmanna kan insiam dawn chuan leh an lak ang kha kan lak ve loh chuan in kan hma hi a thim hle in ka hria, chu chu ka han sawi duh a.

Demand No. 9 ah khan thil pakhat chauh ka sawi duh chu , hei 6<sup>th</sup> Pay Commission a zo dawn a, 7<sup>th</sup> Pay Commission in Pay recommendation a rawn siam leh ang a. Ka hriat dan in tuna basic pay let thum vel hian recommend a ni e a, ti a. Chumi chu tuna Mizoram sorkar hnathawk kan population atanga tam em em te hian an rawn demand leh chuan mipui tan sorkar in hnathawhna tur an nei dawn lo tih hi a chiang reng a ni. Chuvang chuan, kan Finance minister hian mipui te hmakhua tur hi hrereng in he 7<sup>th</sup> Pay Commission-in a recommendation a rawn siam tur a hi lo dawn sawn dan hi thiam ta sela a tha in ka hria a. Chutiang anih loh chuan tun hun a sum dinhmun siamthat na tur atana kumin a han inpuahchahna pawh hi engmah lo ah a chang leh dawn tih kha a chiang reng a, hei hi kan ngaih pawimawh a tha in ka hria.

Demand No.19 - Local Administration department ah hian tawite ka sawi duh chu tun hma in LAD hi department lar tak a ni a. Hna te pawh mipui te tan an thawk ve thin a, works te pawh anei ve thin a. Nimahse, UD&PA he department atanga lakchhuah a khawpui inenkawl na atan sum leh pai dah a nih tak hnu ah hian LAD ah hian pawisa dah hi a tlem ta em em a. Thingtlang ah, step emaw tuikhur emaw an mamawh han siamna tur pawh hi pakhatmah a awm ta lova. Kumin 2015-ah phei chuan kan ro der hi a ni mai a. Chuvang chuan, thingtlanga kan mipui te enkawl na tur, an mamawh te phuhruk na tur hi Finance minister hian allocation hi hun kal leh tur ah chuan tihsan sak deuh hlek sela, chuti lo chuan kan thingtlang mipui te hi an vui nasa lutuk ang tih hi a hlauhawm a, chu chu ka han tarlang duh a ni.

Demand No.28-na Social Welfare department hi department pawimawh tak a ni a. Nichina kan hotute sawi ang khan voluntary organization ho te tan pawh department tangkai tak a ni thin in a hriat a. Hei tar te, nu naupai te, voluntary organization te, naupang te, pianphunga rualban lo te, mi tam tak enkawl tu an ni a. Chuvang chuan, a pawimawh em em a ni. Department in a mamawh em em chu finance department atangin nge ni DP&AR atangin nge ni post fill-up khapna hi a nasa hle a. He department in a ICDS kan tih ah te, Directorate ah te, District Social Welfare office ah te, staff an mamawhna hi a nasa hle a. Thingtlang ah hmun hrang hrang ah aganwadi centre te an nei a. Chung fang turte chuan mihring an neilo a ni. An harsatna te an manganna te va en turin mihring an nei mumal lova, chuvang chuan department in a mamawh hi post fill-up khap tute hian min hriatsak sela a tha in ka hria a. Tin, chutih rual chuan Mizo te hi tunhma atangin tanpuina dawng thin a awm kan ni a. Chuvang chuan tanpuina lampang hi kan nun

ah hian a khat deuh niin ka hria. Social welfare department ngenchhan a NGO indin rikngawt thin hi chu a fel lovin ka ring a. YMA te phe chu 'tanpui ngai te tanpui' tih an motto a ni a. NGO tam tak te pawh mahni hamthatna tur atana indin hi an ni deuh tlangpui thin a. Mipui te tana an thawh tur te hi chu tawktarh ah an hmang thin. Nimahse, a tlangpui thu in association hrang hrang te hi han thlir chiang ila anmahni kaihhnawih a member ni thei te tana malsawmna awm theih na tur atana indin hi an ni tlangpui thin a ni. Chutiang te a nih avang chuan sorkar lampang ngenchhan tum luattuk te pawh hi a fel ber lem lovin ka hria a. Chu chu ka han tarlang a ni.

Horticulture department hi department naupang te a ni a. Agriculture department atangin a indang a ni a. Tun ah chuan Mizoram ah department lar ber ah kan chhuah tawhin ka hria. NLUP ah phe chuan beneficiary hi ngah ber dawttu kan niin ka ring a. Industry hian beneficiary an ngah ber ang a, amaherawhchu, ka tawng an huatthu suhah Aizawl khawpui chung a an beneficiary te hian an hna hi an thawk teh chiam loin ka hria a. Horticulture department a beneficiary kan neih te hi chuan an trade neih ang hi an theihtawp in an thawk a. Department officer te pawh hian an vil uluk in, an enkawl tha hle a ni. tih hi ka tarlang duh a. Thingtlang mipui ten horticulture crop tunah chuan an ching nasa ta a. Shifting cultivation kan neih ang thin tun hma a kumtin a lo kan vat a, ei kan han zawng thin a te kha tam takin a lo ti tawp ta a. Kan eizawmna te pawh horticulture department hian min tih danglam sak ta a. Chuvang chuan, a lawmawm tak zet zet a ni. Vanneih thlak takin central atangin farmers tour programme neihna turin sum leh pai te pawh a rawn kal thin a. Chung ah chuan kan officer ten foreign ah te farmers te an hruai a. Chung a an thil hmuh atang chuan Mizoram ah introduce tur eng eng emaw te an rawn chawlut chhuak ta a. Tun hma a thil awm ngai reng reng lo thlai hi Mizoram a chin ngai reng reng loh a awm tih pawh kan hriat reng reng loh te hi tun hun ah hian department hian Mizoram a chin atan an rawn chawlut teuh tawh a ni. Chungte chu tun hun ah hian Mizoram ah introduce a lo ni tan ta a, a lawmawm tak zet zet a ni. A hming pawh kan hriat ngai reng reng loh te khatiang kha an rawn chawlut a, department officers te chungah hian a bik takin lawmthu ka sawi duh a. Chutih ruala ka sawitel duh chu nichina kan member te thusawi atang khan department officer te hi itsik awm ang deuh hlek te hian thu in sawiin ka hria a, a dik lo hle in ka hria. Health department-a thawktu doctor te chuan non-practising allowance la reng chungin clinic te an hawng a, mi hospital ah te an thawk a ni. PHE-a hnathawk tute chuan tui harsat lai chuan an hnianghnar deuh thin a ni tih te hi hriatpui ve deuh a tha in ka hria. Horticulture officer ten an hnathawh na an thlai te an lo tui a, mipui te entawn tur an lo ching ve a, entawn tlak taka huan an han nei te hi chu ti awm hliah hliah a ni. Education Department ah te pawh hian zirtirtu thiam deuh chuan coaching class te pawh an ti ve a ni lawm ni. Khatiang deuh zawng khan ngaihsak ta ila, tichuan department officer entawntlak mipui ten a thlai chin dan tur an entawn theihna tur atan a lo tui kha an ni tih hi hriat sak ila, a tha in ka hria.

Fisheries Department ah hian ka sawi ve leh lawk duh a chu sangha dil siam theihna zawng zawng hi siam vek ila, chutih rual chuan tui kan khuah lian deuh zawng zawng ah hian eng department khuah pawh nise, Irrigation department te pawhin an khuap a, khang zawng zawng ah khan sangha chi hi dah vek ila chuan kan sangha thar hi a pung thei deuhin ka ring a. Chutih rual

chuan mipui kan zirtir tur atana tha a ka hriat a chu, kan sangha dil neih ah hian a chaw pek hi an thatchhia a, an vil tha peih lo a. A chi an dah ringawt a, chutichuan kum tawpah a lo thang lian kha an seng leh ringawt thin a. Hetiang hian chuan a thar tam tak tak theih loh tih hi inhria ila, ( Deputy Speaker: I hun i hmang zo a nia.)

Pakhat chauh, Sericulture Department ah hian ka han sawi leh duh chu Sericulture Department a hemi cocoon atanga ei kan zawng hi eizawna tlak a ni tih kan hria a. Nimahsela large scale a tih tum hi kan awmlo in ka hria a. Tlem te te hian an ti hlawm a. Department te hian large scale a ti turin beneficiary te hi nasa takin zirtir sela, han fak sela, tuna an tih ang hian chuanin a hahdam angreng em mai a. Hei aia, entirnan, tiang hian sawi ta ila, mi pakhat ni tin (daily) in a in hlawh a, nitin ₹ 300 te a hlawh ta a, chutichuan thla khata a hlawh chu ni 24 vel lo in hlawh thei ta se, a hlawh kha chhut ta ila. Large scale in ti ta ang sela, chutiang a an hlawh let chu Sericulture a cocoon khawi atang hian an hlawh theih ka ring.

Sawrkar term hmasa khan Subject Committee ah kan awm ve a. He department in an hnathawh hi hmun hrang hrang ah kan en kual a. Chuta tanga ka thil hmuh chu, kan farmer te hian large scale deuh hlek, tuna an tih aia tam deuh hlek, a let te hian ti ta sela an la thawk zo tho in ka hria. Chutianga an tih chuan tun ai hian an hlawk deuhin ka ring, Pu Deputy Speaker, ka lawm e.

**DEPUTY SPEAKER** : Awle, tunah chuan Pu T.T Zothansanga aw, a dawtah Pu R.L Pianmawia'n a phar a.

**Pu T.T. ZOTHANSANGA** : Pu Deputy Speaker, ka lawm e, Demand No. 35 na Fisheries ah kan tan anga, hei Champhaiah Fish Feed Mill Plant min rawn pe ve dawn a, a lian chi lehngal ka lawm hle a ni tih kha kan sawi hmasa duh a. Hmanni ah Secretary level in meeting ah estimate an siam a, khami kha kan minister zahawm tak khan , engtikah nge min rawn sak sak theih ang? Engtikah nge khawl min rawn bun theih ang, tih kha nakin ah min rawn sawi sak sela. Hei RKVY-ah ₹ 795 lakhs zet a awm a, min rawn tih hma sak theih chuan ka lawm hle ang tih kha kan sawi hmasa a ni.

Tin, Pu Deputy Speaker, ka rilru a thil awm chu sangha chi ah hian kan in seng nasa khawp maia, hei ai hian mi thiamte training in zirtir a, district tin ah hian mithiam te in siam chhuah hi a hun tawh lo maw? Vai ho in min rawn pe a, kalkawng a hla si a, a thi teuh teuh zel mai si a. Tin, a kimlo nasa thin bawk si a, chuvangin a man power development, hemi a chi siam thiam mihring hi kan insiam hi a hun tawhin ka hria. China ho chuan, 'Sangha An duh chuan sangha pe suh u, a man dan zirtir rawh u,' an ti a, chuvangin a chi siam dan hi kan in zirtir a tha in ka hria.

Tin, Demand No.41-na Sericulture ah, hei kan sakhi ram fan deuh zar zar loh chuan kan hman dawn lo a nia. Sericulture ah khan in sawi deuh teuh kan duh na a, hei tukin zingah Director in vanneihthlak takin Champhai lama kan project kha min rawn pe a, a copy ; chuvangin

ka sawi thui lo ang a ka lawm khawp mai a. Chubaka kan sawi duh chu Champhaiah khianin Sasua, Sasaw thing hi kan ngah a, oak Tsar an tih ang chi hetiang ang develop nan remchang tak mai kan nei a, khimi atan khian project a la siam zel theih a. Kan minister zahawm takin min lo hriatsak sela kan duh bawka a ni.

Demand No.4 na, Law & Judicial ah kan kai ang a. Champhai Zote hmunah khian Champhai Zote khawtlangin court hmun tur tha deuh mai min pe a, zau tak mai. Tunah revenue lamah khian kan buaipui mek a, kumthar lamah chuan kan Law Minister zahawm tak khan bul kan tan theihna tura hma min laksak thei turin kan lo inpeih fel ve ang, tih kha ka'n sawi duh a. Tin, chutih ruala ka sawi duh chu Pu Deputy Speaker, Champhai khi Mizoram a case tam na a ni a, tun hma deuh khan Session case pawh hi kan khawih vek mai a ni. Amaherawhchu, tunah hian kan khawih thei ta lo a, case lian tak tak hi a tam si a, kan hotute lamah ka enquire a, Aizawl ah hian District-ah Session Judge bakah hian Additional Session Judge hi pathum zet an awm a. Khilai ah a routine ang deuh hlekin min han thutsak theih chuan ka lawm khawp ang tih kha ka sawi duh a. A chhan chu case lian ah hian khilai ah harsa tak tak in witness te helai rawn kal a ngai thin a, an lo kal hleih theih loh avang in witness te kan han in paih kan han in paih a, thil tisial si kha hrem hleih theih loh hian a tam si a. Chuvang chuan khilai hmun ah an han thut ve theih a, evidence te pawh khilai hmun ah an lak ve theih hun hi kan hmathlir a ni tih kha ka sawi duh a. Chutih rual in DC office ah pawh a hmun leh a staff te pawh kan pe thei a ni tih kha kan Minister in min lo hriatsak sela ka lawm khawp ang.

Tin, demand no.14, Planning ah, hei District Development Fund kan nei ta lo hi a lunglenthlak khawp mai a. Keini ang ah chuan mi zawng zawng in min hriatpui leh khawtlang in kan ngaih pawimawh kan tih na hmun a ni a, tun tuma a tel ta lo hian lung a tileng a, chuvang chuan hei hi chu pawh ka ti khawp mai a, kumthar ah chuan rawn nei leh ngei turin, chu pawh a crore deuh hlek tal a min tihsak kha ka duh bawka a ni tih kha ka sawi duh a.

Hemi ka sawi nachhan chu hei NEC-te kan ti a, NLCPR-ah te, plan leh project te kan han thelut ve a, Aizawlah deuh chauh hian kan hlawhtling emaw ni chu aw tih mai tur hian District ho hian kan chang ve thei lo a ni. Chuvang chuan district in plan leh project kan neih theih loh karah hemi kan district development fund kan neihsa leh zel chhuhsak kan han ni hi chu a dik chiah in ka hre lova, hei chu kan hotuten an rilru ah min lo khung sak sela a tha awm e. Chubakah development a kan sum hman that ber MLA Fund pawh hi state dang ah chuan nuai 100 aia tlem hi an awm mang tawh lo a ni, nuai 100 atanga 150,200 an ni deuh nawk tawh mai a. Chuvang chuan kumthar atang chuan 100 vel bawr a kan chho hi chu dingdihlip in kan thlir a ni, tiraw Pu Pian?

Tin, demand no.8-na, Pu Deputy Speaker Taxation chungchang ah khan, kan pi leh pu te kha tax lo pe thin an ni a. Kan pi leh pu te hun lai khan pawisa ala awm lova, amaherawhchu an thil tharchhuah kha buh a ni deuh mai a, Buhchhun tih te, Fathang tih te kha an lo chung thin a, kha kha phurrit ah an ngai ngai reng reng lo a ni. Phurrit ah an ngailo ni lovin an tih turah an ngai a,



tin sa an kah in sa chhiah an pe bawk thin a, chuvang chuan tax hi Mizo te hian kan pe hreh lo a ni tih kha ka sawi tel duh a.

Tunah hian Income Tax hi I la ve tawh ang u tiin kan sawi a, thenkhat khan min lo en rang palh ang tih chu ka hlau khawp mai a, kan officer lian te hi a nghawng deuh hlek dawn hian ka hre thin a. Income Tax hi a pawimawh khawp mai a, bul kan tan a ngai in ka hria. India ram ah hian Direct Tax hi Mumbai khuan a pe nasa khawp mai a, Maharashtra, Delhi, Karnataka leh Tamil Nadu te hian India ramah hian an chhung nasa ber a ni. Anni hi chuan India ram Plan vel atang hian an pawt nasa a, “kan pek luh hisap em em kan pawtchhuak hleinem” an tih in an duh duh khu an pe chhuak zung zung mai a ni, a chhan chu an chhun luh tam vang a ni. Khalai te kha ka sawi duh a, an chhung hnem a, Planning Commission kaltlang hian an duh duh hi an la chhuak a; Mizoram erawh chu kan thawh ve ngai loh avang in khatiang pawtchhuak tur khan huaisen pawh a harsa a ni. Indirect Tax kan tih Central Excise leh Custom duty ah hian engmah Mizoram in chhun luh kan nei ve thei si lova, chuvang chuan direct tax revenue Income Tax ah hian bul kan tan a ngai in ka hria.

Income Tax kan lak a tul nachhan a point in tawi te te in ka rawn sawi a, kan sawi zawk ang a. Pakhat na ah chuan; Central in kan budget min pe tlem kan duh ang a ni lo, kan beisei ang a pha lo kan tih fo min rawn pek dawn hian Central ah kan chhun luh khu an lo en ve kar mai a. A diktak chuan kohhran upa senior in ama bial chhung a hrechiang ang mai hian khulai atang chuan Mizoram hi an rawn en a, a chiang em em si a, Tax kan chhung thei ni a an hriat lai in kan chhung si lova, chumi avang chuan kan budget alo pun ve theih nan hian kan pek ve a ngai a ni tih kha ka sawi duh a. Budget hi a tlem phah em em a ni Mizoram ah hian.

Tin, a pahnihnaah chuan Income Tax kan pek a tul na chhan chu Finance and Accounts lam ah hian Mizo te hi kan bengngawng lutuk a, kan literate lo em em a ni. Hei hi kan chiang in ka hria, chhiah chawi ngai lo kan nih avang hian state dang te nen a kan han inhmuh nikhua pawh hian a dik tak chuan sawi ila kan ti ti te pawh hi an ti ti hi kan man pha mang lo a ni, tax chungchang han sawi phei chuan. Subsidy te kan han dil ve thin a, chutiang nikhuaah te pawh chuan harsatna kan tawk thin a, eng eng emaw file telh tur te a lo awm a, kan tih than a lo ni si loh avang khan harsat na kan tawk mai thin a. Chhiah chawi thin ten nunphung pangngai an neih ang chi kha keini tan chuan kan hlawhchham na hi a ni fo mai a, kan buai fo mai a ni. Project funding dil kawng ah te pawh hian kan khawr vek thin a ni. Chuvang chuan harsatna hi kan nei nasa a, income tax hi chawi ila chuan a diktak chuan Mizoram a kan buai luh luh na chi Chiahpuam tih te, bank lem tam tak kan tih ang chi te hi a awm thei lo hrim hrim a ni. Khang te kha kan hriat a ngai in ka hria a.

Tin, a pathumnaah chuan, Income Tax awm na ramah chuan hausak na hi pholan a rem tehchiam tawh lo. Tenawm tak a hausak na han ti mai ila, thil dik lo tak tak a hausakna Mizoram ah hian a tam a, hausa thut kan tam a, kan endawng hle lova, tichuan mi ang tak in an leng a, an zak lem hlei lova. Khatiang chi kha Mizoramah hian kan tam em em a ni. An zak chuang

miah lova, tin, corruption te pawh a ti tawmim a ni tih kha ka sawi duh a. Tin, chu bakah chuan, Income Tax kan chawi chuan Charter Accountant te, tax leh account lama mithiam te kan neih a tul dawn a, Tax Consultant te leh Adviser thleng in kan mamawh teuh dawn a, Court and Tribunal a vir vel tur Ukil te nen. Eizawn na thar a piang teuh dawn a ni tih kha ka sawi duh a ni. Sawi tur a tam khawp mai a, tin, mi rethei te leh hausa te in kar hi a ti zim ang tih pawh ka ring a, a chhan chu mi hausa ten sum an pek luh khan hetah mi rethei te kan tanpui ve tawh dawn tih na kha a ni mai a. Tin, chu bakah mi hausa ten tunah hi chuan ram duh zat zat kan rek a kan va nei a, chhiah pek lamah te kan la in nawr nasa bawk si lova. Income tax kan pek hunah kha chuan hemi Benami Transaction kan han tih ang chi zawng zawng te pawh kha a bo deuh duak ang a, mimalin ram tam tak a neih ang chi hi a tih bo theih ka ring. Dik tak chuan sawi ila tunah hian Mizoramah mahni ram ni si, “hei hi ka ram ani” ti a luchhum huama tang tam takte hian ram an nei lova, In leh lo pawh an nei lova, mi inhnuaiah an riak ringawt mai a ni. Hetiang hunte hi hei kan dinchhuah hun nghakhlel tak tak te an ni tih kha kan hriat a ngai a ni.

Tin, chubakah Pu Deputy Speaker, Professional Tax te pawh hi kan han ti a, C.S leh Peon thlengin ₹ 2500/- theuh mai kan han chawi ang chi te pawh hi “Dan lamah harsatna a awm a, chutiang khatiang” kan han ti thin a, harsatna hi chu a awm zel ang. Amaherawhchu harsatna hi chu kan sut tlang ve hi a ngai a ni ka ti a, politics ah chuanin thil tihtheihloh hi a awm em ni? tih hi ka ngaihtuahna a ni a, kan ti thei tur ani. Chuvangin, thil tam taka a ngaihtuahtu tur Committee kan siam ang khanin hemi thilah pawh khan Professional Tax chungchangah pawh hian kan C.S. kaihhruaina nge ni ang a, Commissioner tunge niang, chumi te kaihhruaina chuan a zir bing te pawh hi inruat ila, a tha in ka hria. ( Deputy Speaker : Hun i hmang zo der tawh a nia) chu chu Tualvungi ko thiam kan mamawh tihna a nih chu.

Ka zo tep a pakhat chauh kan lut leh hram ang e. Pu Deputy Speaker, Horticulture chungchangah khanin Champhai lam hi Kanan ram kan ang deuh a, mahse Israel te Kanan kha chu kan phalo deuhin ka hria. Anni ah kha chuan grep rah bawr te kha mi pahnihin an han zawn te kha a ni a, keini ramah chuan kan zawn chiahlo naa kan eizawna khi a ni nasa a, Hnahlanah leh Champhaiah te khian nasa takin grep hi kan lo hlawkpui tawh thin a. Hnahlan khua mipui an taima kan tihna thin pawh kha, grep avanga eizawna a hlawk tak tak hun lai te kha a lo ni. Amaherawhchu, tunah hian MLCP Act kan han tih takah hian kan eizawna hi a tichhe hneh khawp mai a. Sorkar angin hei chu enpui kan ngai dawn a ni. Kan hralh theih thin kha kan hralh thei ta lova, kan production te pawh hi tih danglam a ngai dawn niin kan hria a, helaiah hian Horticulture lam hotute pawh khan enganginngge rahbi thar min tuk sak ang tih kha ngun takin min lo ngaihtuah sak ula. Khilalah eizawna tha thin lo hlawk ve thin, mahse kan thatchhiat thut vang ni lem lova eizawna han chhe ta thut hi a kal kawng dang min kawhmmuh a ngai a. Chulalah chuan thahnem ngai takin department khan min puih kan duh a. Zawlaidi ni lo thil dangte pawh kha han produce ila tihdan kawng dang kha a awm ang tih kha kan ring tlat a ni.

Tin, NLUP kan han tih bik angah te pawh Horticulture bik angah chuan Link Road hi kan mamawh hnem khawp mai a, hetiang Link Road kan mamawh ang chi te pawh hi department atang hian min tihsak theih na in nei thei hram em tih kha kan sawi duh a ni.

Pu Deputy Speaker, sawi tur a tam khawp mai a, amaerawhchu kha kha kan sawi theih ni mai sela, vawiina kan demand rawn tarlan te hi lawm takin ka pawmpui e.

**DEPUTY SPEAKER** : Pu Piana a phar a, kan sawm hmian Parliamentary Secretary te hi Minister ang chiah a file engkim khawih ve an ni a, a thente ngaihdan phei chuan MOS ang hiala Minister te an puihna a ni a. Heng Budget discussion-ah hian an sawi vak hi a rem em ni tih ngaihdan te a awm nawk a. Amaherawhchu ka kaihhraina hnuaiah chuan anmahni department concerned ni lo kha chu sawi han in khap em em a kha a nuam lova. Member zalenna an bial chhung chungchang te an sawi duh. Amaherawhchu an mahni department demand an sawi erawh kha chu insum thei deuh sela duhthusam a ni. Minister ang deuh tho a function an nih avangin. Tichuan tunah Pu R.L.Pianmawia i lo sawm ang.

**Pu R.L.PIANMAWIA** : Pu Deputy Speaker, ka lawm e. Kan Minister te chanvo kan sawi turah hian Demand No. 4 na Law an Judicialah hian kan sawi duh chu hei tun hma atang khan hun hmasa term hmasa lamah pawh khan kan sawi tawh a, thingtlang miten thubuai kan neih a relfel ve na mai tur awlsam taka ruahman theihna tur kha Gram Nyayalaya, vai tawng a nia chhiar thiam pawh a har a, kha kha tun thleng hian kan la nei lo mai a. Hei hi min ngaihtuah ran sak thei sela a thain ka hria a. Ka bial hi a bik takin thawhlawm mi thawh lohna lama thawh thin te kan nia, loh theih loh thil ah, khami avang khan case nei Aizawl a thubuai neia lo kal fo thinte kan ni a. Chuvang chuan thubuai an neih a an lo kal kan buaipui hrep hnuah Court turin lo kal a ngai zing si a, Court tura an lo kal na sum sen a hautak si. Entirnan Sakawrdaiah SDO Civil a awm a, Darlawnah BDO a awm a, Magistrate Power pek an ni tho a, hengah hian in report ve tawh mai sela, in report hi chu hetah an lo kal a, hming an lo sign a, Court leh hun tur an lo hrilh leh mai a, BDO leh Civil SDO ah tihsak theih dan min ngaihtuah sak thei sela. Chu chuan sum leh pai tam taka harsatna kan tawn thin hi a tih reh phah ka ring a. Bial dangah te kha chuan a pawimawh lo mai thei a, ka bialah khan a pawimawh hle ani tih kha kan Law Minister khan min lo hriat sak se tha in ka hria a.

Tin Demand 8 Taxation-ah chhiah lak hi tun aia pekna awlsam hi, veng tinah pek theih dan kawng hi ngaihtuah theih ni se thain a rinawm a. A bik takin Vairengte-ah khuan chawpchilh a pek theihna hi hun hawn law law mai a tha in ka hria a, chutichuan tun aia kan hmuh that ka ring bawka. Online a an tih hi Taxation Department hian a tireh theih lo a nih chuan a la mangan thlak dawn khawpin ka hria a. Tunah hian online-in damdawi te pawh, an chah thei tawh a. Hei vang hian tuna dawr nei tam tak hian In luah man nen damdawi thiam an rawihna te nen sum an hmuh theih loh avangin damdawi ruihtheih zuar tam tak an awm phah tawh a ni. Hei hi kan tihtawp loh chuan kan la ti pungzel dawn a, nghawng leh hi a thalo lutuk a ni. Chuvangin hei hi

ngun taka ngaihtuah a online a, ti ho hi chhiah laksak theih dan kan dap theih a pawimawh a ni ber maiin ka hria. Chutilo chuan thiamna a sang tawh si a, nakinah te phei chuan nula hmel tha tak tak foreign ami te pawh hi online in an la chah thleng mai ang tih a hlauhawm khawp hian ka hria a. Kan hmasawn chak dan atang hian hei hi ngaihtuah ngun a ngai hlein ka hria a.

Tin, Planning Demand No. 15-naah khan nichina kan member puin a sawi tawh ang khan District Development Fund awm leh tura kan beisei awm silo hi chu a hrehawm hle mai a. A chhan chu, BADDP in min cover ve si loh avangin kan bialte tan kawng dapna tur hi a vang em em mai a, heng ang kan han neih khan chuan kan hawi mar ve deuh a ni. Kan bial tan pawh hmasawna a thlen chak phah a, hna tha takin kan thawh theih phah a.

Tin, Planning hian min lo hriat sak ve hrim hrim se ka duh chu, hei, hmasawn lam kan ni a, SHDC nei bial kan ni a, kan plan sum te pawh hi hmasawn ve zel tur a ni lawm ni. Lunglei High Power Committee atan heti lai lehkhawbua chuang han hmuh hi chuan, E, a van lunglenthlak ve maw le, sawlamah pem phei vek tur emaw ni dawn le, tih tur khawpin a tlar pet put mai a ni. Keini erawh kha chu, han chhiar thla ula, a tamlo hle mai a, a amount pawh kha, nuai 15 chauh kha a ni renrawn a ni. Chuvang chuan hengte pawh hi a leh pek zel turah chuan miin hma an sawn chuan Hmar lam pawhin hma an sawn ve tur a ni tih kha chhinchhiah atan a tha khawpin ka hria.

Tin, kan bial hmasawna tur hian ruahmanna kan siam a, Composite Tuivawl Water Supply Scheme kan siam a, term hmasaah kan House Leader-in “a huphurhawm hle na a ka lo buaipui ang che, rawn tih tir rawh” a ti a, kan buaipui ve a, DoNER-ah khan a tlang hman si lo va, tunah hian a thara kalpui leh a ngai a, kha pawh kha planning atanga engkim kal tur a nih avangin an nin min vei a ni tih an lantir nan kha kha lo hre ta bawk se a tha in ka hria a.

Tin, Demand No. 19-na L.A.D. ah hian - Tun tum L.A.D. chanvo han sawiah hian a zia lamah phei chuan lawmna tur hi a vang khawp mai a, amaherawhchu a sawia sawiah khan V/C House sakna tur tih te kha a awm a, kha kha chuan rilru a ti hlim deuh hlek a. A bak step siamna tur tih te, EWS han tih ang chi te kha a awm reng reng si lova, thingtlangpa tan chuan V/C lawmman lakna tur chauh a Department ding emaw ni le tih tur khawpin kan dah ta mai niin a lang a, hei hi a pawh hlein ka hria a. Thingtlangin hma kan sawn loh a kan dinhmun a chhiat chuan khawpuiah sum leh pai tam tak awm mahsela kan hlim rual dawn lo a ni tih hre reng ila a tha in ka hria a.

Tin, Demand No. 29-na Social Welfare-ah hian han kal leh ila. Ni danga kan neih thin ang, kan hmuh theih thin ang thinglang bialtuten No te, P.A. Set te, Bengdar te kan han tih theih thin ang a kha tunah chuan a rehin a reh ta vawng vawng mai a. Tunhma deuh a fiamthua miin Ran Doctor chu va kal ila a awmlo an lo ti a, chuvang

chuan mitin hi Ran Doctor-ah kan tang thei an tih ang deuh khan Social Welfare Department pawh hi thingtlang NGO te tan chuan, tunhma a Ran Doctor an sawi ang deuh kha a va ni mai awm ve tih kha rilruah a awm a. Chuvang chuan keini Hmar thim pui zangkawh bung but hnan tih a awm kan ni bawk a, Bengdar te hi kan han mamawh nasa khawp mai a, tunah chuan kan han sawi a “a theih tawh loh” tih kha a ni mai a. No-te pawh min han dil thin a tih ngaihna a awm lova, vanneihthlak takin hmannah Agriculture Minister kan bialah Lo zawh-naah a lokal a chu chuan Darlawn leh E.Phaileng-ah No a rawn ken min han pek sak hlauh mai a, chu chu vanneihna kan dawn chu a ni ta mai a. A lokal leh hun tur kha nghak ringawt dawn ila khaw tin tan khan a hautak hmel hle in ka hria a, a pek khua kha khaw hnih chauh ala ni leh ta nghal a, khaw 24 kan awm a khaw 22 kha la pek loh an awm leh ta nghal a ni. Chuvang chuan a huphurhawm khawp mai a, heng ang chite hi chu thingtlang bialtute tan hian a bik tak pawh a ruahmanna hi siam theih sela a tha in ka hria a.

Tin, wheel chair kan tih ang chite pawh hi a hma a kawng hre lo ber in a kawng hria ni a kan in ngaihna Education Department-ah SSA hnuaiah te kan lo han dil thin a an lo nei tawh bawk si lova, keini tan chuan hetiang lampanga ke min pen sak deuh loh chuan, Social Welfare Department hian, a hrilhai thlak hle dawnin ka hria.

Chubakah, kan CDPO motor min auction sak a, motor a nei tawh bawk si lova, kan bialfang tur chuan a ngaihna hi a awmlo reng reng a. Hengte pawh hi a lei mai theih loh anih pawhin Department-ah khian a tu emaw ber khian min han thehchhuah thei mai lawm ni, “Office kal nan Taxi pawh ka lo hmang mai ang e” ti thei te kan awm mai lawm ni, chutiang chuan ngaihtuahna min lo hman sak teh u, kan mangang anih hi.

Horticulture-ah hian han kal leh lawk ila - Horticulture hian kan bialah hma an rawn la tan ve a, vung an chhuah tan ve a, a hlimawm viau tawh a. Amaherawhchu, tuna Central nena thawhlawm tur kha zaah za anih atang hian an sawi tawp ta riau mai a, chuvang chuan kan hmasawna kal ve tur a bik deuh a bial dang te hnutchhiah deuh a in rawn kalpui loh chuan, engemaw paipawn tur kha in rawn zawn deuh loh chuan a nawlpui angah kha chuan kan thleng pha dawnin ka hre lo. Chuvang chuanin, hmasawna zel tur a in hmalakna kha rawn ti chho zel ula a tha in ka hria a.

Tin, Pangpar kan ramah Horticulture hmalakna in sumdawna lianpui kan chherchhuak tawh a, chu chu a teltu tutenge kan tih chuan khawpuaia milian nuho an ni deuh maiin ka hria a, ka tawngsual loh chuan. Kan bialah te pawh MHIP kaltlangin emaw, khaw hrang hrangah a zirtirna, Pangpar khawi dan mai ni lovin, a chin dan te pawh, a tiak te pawh hi pe thei ta ula, bial khawmpuia takngial pawh khawpui lama Pangpar khawitute emaw, Pangpar emaw kan chah chhuah zel ngailo hian mahni kan lo in todelh

theihna tur tawk vel hi chu Department hian in ngaihtuah theih mai ka ring deuh hlek a, tiang zawng chuan ngaihtuahna min lo hman sak ula.

Tin, Pu B.D.Chakma-a chan Demand No. 35-na Fisheries Department-ah hian Tinghmun-ah te, Sunhluchhip-ah te, Ratu-ah te khian Sangha Dil lianpui pui nei kan awm a, khing khi enkawl puitlin anih chuan a tlangdung a chawm theih mai bakah hmun dang pawh chawm thei tura ruahman theih a ni a. Chuvang chuan, a khat tawka a chi in sem, daih mang lova in pek ringawt kha a tawk lo a ni tih min lo hriatsak ka duh a. A thenin an chang a, “a awm tawh lo” ti a a bur ruak nena kir leh ta mai te pawh kha an awm a ni. Chuvang chuan, sa tahchhuak pek mai ni lovin, a sa ti tha lai deuh te pawh kha min han pe ve teh u tih ka’n sawi duh a ni.

Tin, Sericulture Department-ah hian tunhma in Darlawn-ah khian hma in la vak thin a, tunah hian in la ta lova M.R. pakhat-in tunah khian hmun a luah ve a, khi khian kan tlangdung tan hian hmasawna enge a thlen theih ang aw M.R. pakhat enkawlnaah khian tih hi ka ngaihtuah a. Khitianga a lo awm tak nachhan khi ngun takin kan Minister pawhin a chhut a tulin ka hria a, thawktute atanga intan a ni, a hma zawngin Darlawn-ah Farm zau tak an nei, engkim kalpui a ni, thawktute building tur te pawh engkim sak a ni. Tunhnu-a khitiang a a awm tak nachhan hi engatinge? Chuvang chuan ram nei si a, mipuite tana thawktute hmuh hmaih bika a awm reng mai khi, hmuh hmaih ni tawhlo sela ka duh a, chu chu kan ngen duh baw k a.

Demand kan sawihona ah hian Finance kha ka sawi lem lova. Nimin lamah General Discussion ah khan ka sawi tawh a. Chuvang chuan tuna kan sawi tak zawng zawngah department in pawisa an neih daih lohna ah te khan thleng phak sela a tha in ka ring a. Chutilo chuan helaia kan sawia kha a riral leh mai dawn a, department hrang hrang tan pawh khan a uihawm ve hlein ka ring a ni. Heng hi kan Finance Department pawh khan lo thlir zau deuh sela, duh duh a hman theih tur lo pawh theih tur niawm tak a ni ka lo thlir ve dan chuan, a department dangte pawh a ni thei e, khangte pawh sawi kep ta ila. Khang ang sum bawm lian deuha in dah kha, midangte sawh thlak theih dan kawng dap nisela, chutiang chuan a kal rual deuh in ka ring a ni.

Chuvangin performance budget pawh an rawn tih ngamlohna chhan kha a nih ka ring a. Maimitchhing chungin passed pui min dil emaw tih mai tur khawp in tunah hian thil a awm a. A pass puitu tur te tan pawh hian a bangbo thlak khawp mai a. Amaherawhchu, pass loh chuanin a kal theih tawh baw k si lova. Tin, pawisa thenkhat chuan in nei viau mai thei a ni. Hei kum a tawi tawh a, nakum March thla thleng chauh a ni a, in hmangzo hman lovang, pawisa kha a tam a nia. A tlem zawnga sawi kha ka duh vak lova, a tam a nia, kan hmangzo hman kher in ka ringlo a ni. Chu chu Pu

Speaker, ka rawn sawi theih tawk ni mai sela. Heng kan Minister 3-te Demand hi ka thlawp a ni. Ka lawm e.

**SPEAKER** : Pu Lalthanliana.

**Pu LALTHANLIANA** : Pu Speaker, hun min pek avangin lawmthu ka hrilh a che. Kan hawi kan hawi a, midang kan kian a, hun a lo kal viau tawh mai a. Amaherawhchu, sawitur tam tak ka nei lova. Ka hma a miten ka sawi duh tam tak an sawi tawh a. Amaherawhchu, khata an sawi kai lem loh a figure ang zawng deuh hlek khan tlem tlem han sawi ve ka duh a.

Tun tum a kan Minister 3-te Demand hrang hrang kan en hian, Medical Treatment chungchangte kan thlir a, insum kan tum tlang viau niin a hriat a, kan damlo dawn nge kan dam dawn tih kha a hriat lem loh na in, Medical Treatment a kan dah hi kum hmasa aiin a tlem deuh vek a, hei hi hmasawn tumna tha ni turah ka ngai a.

Tin, kan sawi fo thin Office Expenses tih te, Other Charges han tih te, tunah pawh khan kan han ngaithla a. Helai a kan dah hi a mumal lo ang reng ka ti a, a thenah hian a tam viau a, a thenah hian tlem te a awm a. Entirnan, Planning & Programme Implementation ah te chuan nikum lamah nuai 22245.80 a awm laiin tun kumah hian nuai 135.98 chauh a ni a. Hei hi hmasawanna nge a nih a, a in thlahna hi nuai 22109.82 a ni a, a tha lam nge ni dawn ni? Ka hrethiam chiah lova.

Tin, Finance ah pawh hian a ni tho mai a. Tin, Pensionary Charges tih hi Finance-ah chauh khan a awm a, Department dangah ka hmu lova. Nikum ah nuai 37962 a awm a, tun kum atan hian in Estimates ah hian nuai 56000 dah a ni a. Nuai 18038 in a pung a ni. Kha kha Department dangah hian a awm ta lova, helai chungchang hi hriatfiah a chakawm ka ti a.

Tin, Other Charges ah khan nikum lamah nuai 5895.02 a awm laiin, tun kumah hian nuai 2267.82 a awm a, hengte hi chu va hman pen theih chi tur nge, a tul ang ang a hman tur nge a nih a, hei hi kan inhrilhiah chiah lo deuh a, kan Chiang tawk lo deuh niin ka hria a. Hemi Other Charges tih te, Office Expenses hi chu rinthu deuh hlek in a hriat theih a. Nikum lampangah te pawh khan kan sawi a, Other Charges hmanna an han sawifiah thenkhatah hi chuan in a lo tangkai fu mai a. A thenah hi chuan kan sawi fumfe chiah lo a, a then chuan in hengte hi a tam lutuk a, hetia dah ringawt hi chu MLA fund a tan te pawh hian hmang then ila a tha lawm ni te kan ti a. Khangte pawh kha eng engemaw tangkai a tan chuan dah chu a ni ngei ang a. Amaherawhchu, hriatfiah deuh chu a chakawm ang reng ka ti a.

Hmanhmawh deuh a kan sawi leh duh chu, LAD-ah hei Budget hi kan han en a, ka han thlir ka han thlir ve a. Ziak ka hmuh pakhat chu V/C Renumeration tih hi a ni a, mahse a zawnah hian a blank a. Tin, a dangah hian Salaries tih zawnah khan chuanin staff-ho hlawh tur chi te, wages tur te kha a nih a rinawm a. Mahse, VC renumeration te hi Head-ah hian engtin nge an dah thin aw tih te kha ka ngaihtuah a, ka'n sawi kai mai mai a.

Tin, Social Welfare-a scholarship/stipend an tih hi nikum lamah khan nuai 13.28 a awm a, tunkumah hian nuai 48 dah a ni a, nuai 34.7 in tunkumah hian a tam zawk a. Hei hi puanthui an zirtirhote leh neuh neuh hoah khanin scholarship an pek atan nge ni a, nikum aiin zirtir kha a tam tawh dawn nge ni, scholarship pun dan tura kha, hei a pung dawn ngei mai a. Hei hi a pung a, ruahmanna tha zawk a awm a nih kha chuan a pawl chuang lova. Kha kha a pung dawn tihna tlukah ka ngai a, a dik emaw.

Tin, Fisheries hi ka'n sawi leh duh chu ka rilrua awmdan chuanin kan ramah hianin kan intodelhna tur atana department tha tak mai niin ka hre thar deuh a. Hmanni khan Kerala-ah te kan kal a, miin sangha an khawi dan te, kaikuang an khawi dan te kan en a. Min tiphur khawp mai a. Kan ramah hianin Mizote hian sangha hi kan ei nasa tawh khawp mai a, kan lak luh pawh hi a tam em em mai a ni. Kan ramah hian a tam viau emaw kan tih lai pawh hian kan indaih lo a. Fisheries Department-ah scheme hrang hrang RKVY te, NLUP atangte in hemi dil thar siamna tur te pawh hi a awm a. Tuna mi awmsa bakah hian hei aia tam hi budget-ah te pawh dah thinin, tih takzet zet hian ti ta ila, lianpui hian Fisheries Department hi chhuah ila kan ram tan hian a va tha awm em aw. Tin, vawksa te, sa mawm tak tak kan ei duh tawh vak lova sangha lamah hian kan tuan nasa khawp mai a, kan finna, kan changkanna ni turah ka'n ngai mai a. Kan ei nasa em em mai a, chi hrang hrang, kaikuangte lah kan duh em em mai a, Kolkata kal te hian hawn talh kan tum a, rem leh rem lovin, a to ropui si a. Hengte hi kan ramah hian kan thar thei reng mai tih kha ka ngaihtuahnaah a awm a. Hemi lamah hian nasa zawkin tan la ta ila a van tha dawn em aw ka ti a.

Tin, sangha hi keima experience ah chuanin te reuh te te dah teuh ai chuanin a lian, thi thei tawh vak lo hi an tha, a te chu an inei tawn kual emaw tih mai turin an awm thin, singkhat kan dah sangha chi kan tia kan hlim em em a. Kan han man tak tak chuanin sangkhat pawh hi a lo awm tak tak lo a. Pu Chawngphira'n ka dil atangin sangha ka man a ka chhiar vek a, zasarih leh tih chauh a awm a mahse quintal thum chuang daih a ni a ti a. A mal khan a chi kha thi lo se a liana hi uar tawh zawk ila. Te reuh te te kan dah a, a thi lo thei lo, a chi tha deuh pawh ni se a thi tho. Kan transport-naah te hian, vaiho chuan Kolabel-ah te hian an dah a, nilengin an kutin tihian an tia ni. A che reng kha a ngai a, che lo kha chuanin a thi mai a ni. Chutiang chuan motor-in kan phur a nih pawhin khatianga khawl engemaw deuh a chhunga engemaw khami a thih lohna tur atana ruahmanna engemaw tak kan siam a nih loh chuan kan hlawhtling tak tak dawn hian a hriat lohva. Tin, kutzungchal chen chen te hi han sem ila kan ti thei rau rau a nih chuanin, heta mi pakhat singkhat kan pek ai chuan zali lek pawh dilah va dah ila. Tin, sangha te pawh hi a thiamte ka'n rawn chuanin sangha chi hrang hrang hianin chettlatna hmun hi an hrang vek a ni. A then chu tui



mawng lama chetla pawl an awm a, a then chu a laia chaw zawng, a then chu boruaka chaw zawng deuh, hetia rawn ti thin, a pawnlawng deuh hleka chaw zawng te an awm a. Chuvang chuanin sangha a variety leh a chi kan khawi pawh hi kan thliar thiam a tul a ni an ti a, a dik ka ring a. Hisap nei takin kan ti ang a, kan hlawkpui dawn a. Zir nawn leh deuh hlek ila a that ka ring a. Ka'n thupui deuha chu he Department-hi i ti lian deuh ila kan ram tan hian a tangkai dawnin ka hria a, chu chu ka'n sawi uar deuh a ni.

Thil tam tak kan sawi a, a tawpah chuan nichin khan kan sawi a, nimin lama kan sawi kai loh chu nichin khan kan sawi tho a, a rem tho turah ka'n ngai a. NLUP-ah hianin vaibelchhe 430 a lo la awm a. Tichuanin, Budget-ah khan vaibelchhe 60 kan hmu leh ta a. Kan sorkar hian miretheite lam a hawi, a duhsakna a tilang hle mai kan tia, a lawmawm a. Amaherawhchu, chumi a nih rau rau chuan a daihzai zawng leh a la dawng ve lo te, party mi kher lo te pawh kan pe tho an tia, an pe lo ka ti lova, amaherawhchu, pek tam deuh deuh te pawh hi a tha lawm ni tih kha ka'n sawi duh a ni e.

Tichuanin, kan Minister-te Demand ho hi ka pawmpui e, ka thlawp e tih kha ka han sawi duh a ni. Ka lawm e.

**SPEAKER** : Pu Lalrinliana Sailo. A ban a phar hmasa e.

**Pu LALRINLIANA SAILO** : Pu Speaker, tlem te ka sawi ang, khi dar li a ri dawn a, ka hmang zo tawk lek mai awm mang e aw ka ti a, kan chawlh leh hma. Hei, helai hmunah hian member-ten duhdan te, ngaihdan te kan han sawi khawm thin a. Pathian leh kan bialte zarah kan term thum thutna a ni a. Amaherawhchu, hmasawna tak tak ang, mipui hmasawna ang hi kan hmu mawh mang e aw ka ti a. Planning leh Finance ah hian han lut hmasa ta ila.

A hmasain kan Minister leh a thawktute an fakawm ka ti a. Tuna Plan Outlay hi vaibelchhe 3097 leh nuai 78 kha kan Plan Outlay a ni a. Tin, Non-Plan ah hianin vaibelchhia 4519.96 a ni a. A hmasain ka'n fak duhna chu hemi Year of Consolidation, insawhngheh kan han ti pawp mai hi a hun bawk a, a tul bawk a. Hetianga ngaihtuahna a rawn hmanga hi a lawmawm ka ti a. Hemi insawhnghehna kan neih hi a pawimawh tak meuh meuhin ka hria a, chumi tur chuan Planning-ah hian Skill Development kha a awmin ka hria a. Kan hria a Central khuan UPA sorkar-ah khan Skill Development kha an ngaipawimawh em em a, khawvel economy lo thatna tur chuan skilled-man power, skill thate an ngai a ni tih hriain 2022-ah hianin mi maktaduai 5 skill develop a, man power tha nei turin a'n ruahman kha a ni a. Chumi chu Planning Commission Vice Chairman kha board-ah te pawh khan a'n awm lawp lawp a, Prime Minister nen. An ngai pawimawh em em a, Labour & Employment-ah hian engemawchen kha rawn dah a ni a mahse, tuna Mizorama khawih tur hianin Planning-ah khan dah a niin ka hria a, helai hi kan chiang chiah lova, a lo nilo a nih pawhin min hrethiam se. Skill Development lai tak hi heng ang insawhnghehna kan neih dawn hian a pawimawhin ka hria a. Hemi hian ATI- te pawh a khawihhtelin ka hria a. Vawiih hian sawi

hrehawm tak amaherawhchu kan hmuh ve dan ni si a awm a. Kan officer-te hi officer tha tak tak ni si hi dik tak chuan mitha leh taima, zankhawtairek thleng a hnathawk an awmlai hian a then hi chu an inthlahdah deuh emaw chu aw tih tur hian a hmuh theihin ka hria a. Chuvang chuan, insawhnghehna kum kan Minister-in huai taka a puanah hian chumi atana pawimawh chu Skill Development hi a niin ka hria a. Chu chu a te ber atanga a lian ber thleng hian intuaithar leh hi a tulin ka hria a.

Tunah pawh tan a ngai tlang hlein ka ring a. Kan Revenue Surplus leh Fiscal Deficit-ah pawh hian hemi Fourteenth Finance Commission hian a rawn zawmah chuanin 2015-2016 atanga 2019-2020 a kan fiscal deficit, GSDP pawh hi 3% aia sanglo min beisei kha a ni a. Amaherawhchu, heng zawng zawng a tak han ni tur hian vawiinah hian vai tan a ngaiin ka hria a, chumi tur chuan ka sawi ang khan Skill Development hi a pawimawh tak meuh meuhin ka hria a ni.

**SPEAKER** : Ngawi rawh aw, House ngaihndan i la phawt ang. I kal zel ang aw, zawh kan tum ang em? Kal zel kan remti em? Aw le, kan kal zel ang.

**Pu LALRINLIANA SAILO** : Pu Speaker, tuna thusawi laklawh laia chawlh pawh a theih a, tlang leh pawh kha a theih a. A khawi zawk nge kan tih dawn? Sawitur kan la tam em? ( Speaker : Dar 4 pm hi kan ban hun a ni a, dar 4 kan pelh dawn chuan House ngaihndan kha lak a ngai thin a).

**Pu JOHN ROTLUANGLIANA, MINISTER** : Dar 4-ah khan kan chawl a, thingpuite kan in thin a mahse tuntumah hi chuan thingpui in tur kha kan buatsaih lem lova. Chawlh hrim hrim kan duh a nih chuan dar 4-ah khan a chawhlhlawk lawk theih a, a nih lemloh chuan a kaltlang zel theih thova. Thingpui kha tunhma chuan kan ti thin a tuntumah chuan kan ti lemlo a ni. ( Speaker : A nih leh i kal zel ang aw).

**Pu LALRINLIANA SAILO** : Pu Speaker, chaw te kan ei thin a, a pawisain min sem mai ang chu kan department pathumte hian. Nia, fiscal parameter hrang hrangte a rawn duang a, chungchu zawt tur pawn min beisei a. Amaherawchu, thu tak tak a ni a Pu Speaker, vawiinah hian kan Finance Department-te leh Minister-te thiamloh pawh a nilova, thudik tak zawkah chuan kan GSDP- te hi Central-in min rawn siamsaka min rawn pek a ni a, a dikchiah a ni. Amaherawchu, kan sorkar hnathawkte hi kan industry liante an ni mai a, a kut hnathawk leh a thawh chhuah tur nei tak tak ho zawk hi a dik tak chuan kan GSDP leh per-capita hi a sanglo hlein ka ring a ni. Chu chu vawiinah hian, hei Central-ah kan sorkar tharin Transforming Govt. siam an tum a, chutiang tiat tho chuan kan Planning leh kan Finance hian an siam dawn niin ka hria a, a lawmawm pawhin ka hria a. Ka'n sawi leh pakhat chu, Skill Development- ah khan, hei, tunah kan dinglai kan han ti a, tuna kan thalai tam tak hi dik tak chuan hnathawh nachang hrelo, hnathawh tumlo hi tam tak an awm a ni. Thawk taima leh mifel tak an awm rualin, kohhrana inhmangte an awm rualin a dik tak chuan a tam zawk hi chhungte pawisa ring an ni chhova. Chumite kawng dika hruai tur chuan Skill

Development hi a pawimawh a. Tunah hian eng ang zawk hian nge ka hrelova amaherawchu, Skill Development, Central lam atanga sum lo kal te kha Planning-ah a lut ta a, chu chu ka hriatdan a ni a ka'n sawi mai a ni.

Tile phah te kan han ti a, tile phah hian nikhatah Rs 4000-5000 an rate thei tlat mai a ni. Chu chuan pawisa hi min rutchhuak heuh heuh mai a, chu chu tuh tan tumin tile phah kha Labour & Employment khan kan ti a. A first batch a mite phe chu cutting machine kan lei ang che u kan ti a, Rs 3500/- man kan lei theuh a ni.

Khatiang khan, darkar bi te hian siam ta ila, kan thalaite hi, vawiinah hian college kalte, zirlaite hian an nu leh pa, pi leh pu, chhungte pawisa, pocket money atan tibuai lovin 'darkar khat i va inhlawh ve teh ang u aw, thian hovin darkar 2 i va inhlawh teh ang u aw.' tiin, chutiang chuan kawng dikah kan thalaite hi kan hruai thei dawn a ni, tihte kha kan ngaihda a ni a. Kan tipuitling hman lova, chu chu tuna Planning hianin a khawih niin ka hria a, chu chu rawn hrut tel ngei se thain ka hria a ni. Chu chuan kan ram hi, tunah hian, insawhnghehna hi a bul a rawn tan ngei ngei ang.

Vawiinah chuan khatiang ang tih tur kha a awm lova, a zah pawh kan la zak zawk lehngal deuhte pawh ni hian ka hria a, sawitur a tam mai. Chuvangin, a tak taka kan per capita leh kan GSDP ang chi pawh hi, a tak taka kut hnathawktute thawhchhuah ve tur ang chiah hi chuan a hniam hle a ni. Vawiinah hian kan sawrkar hnathawkte hi kan inngahna a ni ringawt mai a ni, chu chu a ni lo zawk tur ang a niin ka hria a.

Tin, chutiang chuan, Pu Speaker, tunah hian Skill Development pawimawh zia chu, China pawh hian a economy khi a hlauthawng ta a; fa pakhat nei thin kha, fa pahnih neih an remti ta a ni. Reilote ah hian kut hnathawktu tur hi an bang dawn a, an tawp dawn a, kut hnathawktu tur hi an awm tawh dawn lo tih an inhmu a ni. Chuvangin, central-ina policy lian tak a rawn nei hi tah hian na lehzuat a kan confine deuh hlek, kan stress deuh hlek hi a tha lawm ni tih kan sawi a ni.

Tin, hei Horticulture-hi sawi ila, Horticulture hi hna an thawk a, hma an sawn a, amaherawchu, hmasawn lehna deuh tur a awm in ka hria a, thui tak ka sawi lovanga, hun a tlem tawh a. Quality tha hi min la pe tak tak lo, min la ei tir lo, thei a ni emaw, hetiang ang hi. Chuvang chuan, kei chuan tha a ka hriat chu, Pu Speaker, Horticulture-a kan mithiamte hi foreign-ah train rawh se; thla hnih, thla thum train rawh se. Chutiang chuan, tunah hian a dik takin Mizo thei ang chi te hi chu ei chi hi a ni vak lo a ni, Mizorama a pangaia tun anga kan nihna ang ngau ngau chuan. Chuvang chuan, thiamna pur chaw turin a sawm rual pawh hi kal rawh se, tah hian pawisa hi phalrai tam ila. Tunah apple kan han ei a, dik tak chuan Mizoram leh India ai hi chuan foreign ami ang khi a tha a ni. Chu chu ngatinge kan tih ve theih lohvang, Mizoramah hian. Eng thlai mai pawh kha quality tha min barh tur chuan an thiamna hi India ram a mi, India ram a train chhuak chauh hi a tawkin ka hre lova, chuvang chuan, khawi ramah nge tha ang tih chu ka hre ber lo.

Chuvangin, anmahni hi train tir se, chuta tan chuan pawisa hi tam tak pawh hi phalrai ila a that kan ring deuh a ni.

Tin, Sericulture kan sawi a, Sericulture hi kan ram intun nunna tur pawh niin ka hria. Hei silk thatzia chu, hmanni ah Mukesh Ambani nupui sari kha vaibelchhe 14 leh tih man a nih kha, kha kha eng silk tak ni ang maw. Hei foreigner-te an lo kal thin a, thil present tur hi kan nei tha lo reng reng; khumbeu te kan lo pe a, ipite cheite kan lo pe a. Mahse, han kal ve ila, India ram chhungah ngei pawh hian, shawl tha deuh mai, silk-a siamte min lo pe a. Kan hnung khan khumi central-a kan Minister, Chennai-ah khuan a awm a, ka zu tlawh ve a, anmahni inah, hemi Shipping Minister hi, shawl min lo pe a, 27,000 man vel a ni an ti a. A tha khawp mai. Tunah hian Mizoram an rawn lut ve a, thil present tur tha pawh kan nei lo. Kan neih that tur ang, chutiang ang zangkhai si, paih leh mai mai tur ni lo ang chi te hia tha in ka ring a. Chuvang chuan, quality nei turin, an ni pawh hi dik tak chuan tuna India ram ami ngau ngau lo hi a ngai in ka hria a. Kan hnung khan, ka hriatsual loh chuan, Manipur-ah Sericulture-ah Japan-in an han pui a, crore 500 chuang an han pui a ni. Vawiinah kan kut hnathawktuten hei hi a hlawk zia pawh an hria, tha tak a ni ringawt mai a ni. Chuvang chuan, hetiang ang lo deuh hlek hi ni se tha in kan ring a.

Tin, Fisheries kan sawi leh thin a, a tak takah chuan hman leh tuna kan sawi hi a ngai zel ala ni. Thu tak takah chuan kum 10 hma lama sawi leh vawiina sawi hi sawitu kan danglam a ni mai. Chuvang chuan, heti lo hian, Pu Speaker, kei tha a ka hriat chu, public participation hi a pawimawh in ka hria a. Kan hnungah an sawi tawh a, silpaulin pawh cheng 100 an tih hnu hian an roh tlat mai a ni. Fisheries-te pawh hi sangha an sem a, a thlawnin an sem a; tak takah chuan kan hnungah khan, keini ngei pawn saw lai kan awm laia kan sawi chu, suah khat nuai khat an ti mai a ni, khang lai khan, bill leh nan chuan chu chu ni mai; luiah an chhuah thin a, khatiang khan. A zat ang hi chawi ve se, engpawh hi a thlawn ngawt hian ti lo ila, chawi ve ta ang se, tichuan, an roh anga, a quality tha an thlang thei tawh dawn a ni. Chuvangin, tuna kan tih dan ngawt hi chuan a ngai leh ngai ah kan in keuh a. Hetah hian thu kan sawi a, chuti bawh chuan a kum lehah chuti bawh chuan a ni ringawt mai in ka hria a, hmasawna ang chi hi hmuh tur a tam lovin ka hria. Chutih laiin pawisa erawh hi chu, budget erawh hi chu, ti hian a trend pangai, a increase pangai hi chu a awm reng a. A chhiat chang in 8% te maw in budget a increase a, a that chang in 12%, 13%, 10% ah hian a chho tlangpui. Ti chung chuan hetah a farmer-ah emaw, a produce tak taktu, a thawktu ah te hian sum hi a nihna ang tur hian a lut leh si lo deuh te hian kan hria a. Chuvangin, (SPEAKER : Minute 15 i hmang tawh a nia aw)

Pu Speaker, ka sawi rei lo ang e. Chuvang chuan, quality tak tak kan neih a, kan rilru tak tak a kan in consolidate tak tak hi a ngai in ka hria a. Consolidation Year kan han puan hi a ropui ka ti a, kan thinlung tak tak pawn kan tih a ngai in ka hria a. Keini MLA pawh hian, dik tak chuan, hlei leh zual ila, hei Assembly-ah Committee hrang hrangah kan awm a, tunah hian an ti tha khawpin ka hria a, an taima a, heta tang pawn kan veng thei a ni. Hei ai hian leh kha chhiar tam ila,

spot leh sight visit pawh hi nei tam ila, tiang chuan kan thawhho na hi a tha chho ang a. Kan vai hian i in consolidate ang u tih kha sawiin, budget hi karawn pui a ni e. Ka lawm e.

\*Speech not corrected

**SPEAKER** : Hei sawi leh tur pawh kan la awm a, kal zel ila. Pu Nihar Chakma, sawi rawh le.

**Pu NIHAR KANTI CHAKMA** : Pu Speaker, ka hming chu Nihar Kanti Chakma a ni e. Ka lawm e. (SPEAKER : Kan koh dan thin ang khan ka lo ti palh) A pawilo chu. Pu Speaker, waviina Minister zahawm tak 3 lai demand kan sawiho mek a. Sawi tur em em erawh chu chutiang lutukin ka nei lem lova. Amaherawhchu, support pahin tawite ka lo sawi lawk ang e.

A hmasain Demand No.4-na Law & Judicial chungchanga sawi ka duh chu Pu Speaker, Ignorance of Law hi a buaithlak thin a nih hi. Ka bialah phei chuan thingtlang mi an ni a, helam pang erawh chu chutiang lutukin an hre lem lova. Pawisa puk lovin legal notice hi dawn fo thin a ni a. Chuvangin thingtlangah te hian legal awareness uar nise a tha khawp ang. Tunah ngei pawh hian ka bial chhungah VCP thenkhatten pawisa puk miah lovin legal notice hi dawn fo thin a ni a. Chuvangin misual deuh tan hlawh hi hmansual palh theih a ni. Tunah pawisa sengin dollar engemawzat legal notice kan siam sak a ni a. Chuvangin Law & Judicial Department-in Dan tha takin an pass a, a lawmawm rualin a tam thei ang ber hi bial tinah a bikin thingtlangah legal awareness nei se a tha khawp ang, tih hi ngaihkan ka nei a ni.

Demand No.9-na Finance Department chungchang sawi lawk ka duh chu - term hmasa khan Finance Minister zahawm takin ropui deuhin Lunglei District-ah Joint Director Office a hawng a ni a, Accounts & Treasuries, Joint Director Office an hawng a. Hmanniah ka bial thilah ka va lut zawk a, ka hmuh dan phei chuan work load nasa khawp mai a. A chhan chu khulam Chhimtuipui, Lunglei District pumpui huap a ni a, ka hriatsual loh chuan Assistant Director hi 3 lai an nei a. Ka hriatsual loh chuan Assistant Director pakhatan hian Auditor 5 hi an awm ve thin a ni a, tunah hian Auditor pawh an nei tam vak lo a ni. A work-load hi a sang lutuk a ni. Ka hriatsual loh chuan Auditor hi, 3 lai hi Assistant an nei ve thin a ni a, chuvangin Minister zahawm tak hi work load tihhnam nan hian a bikin Lunglei District lam chu min en sak thei se, ka lawm khawp ang.

Demand No.14-naa ka sawilan duh chu - Registration of Birth & Death chungchang hi a ni a. A bikin ka bialah hian problem a awm nasa khawp mai a, a tlangpuiin zirtirtu hi an ban nual a ni, birth & death register-ah. Thenkhat zirtirtu hian lehkha an thiam vak lova, sawi ta ila, Non-permanent Teacher-te an ban nual thin a ni a. Thenkhat phei chu thawh that loh avangin anmahni rectify nan hmun dangah hian kan sawn ve thin a ni. Hmun dangah hla deuha sawn hian a lungawi lo thin a, engemaw chenah birth certificate te a delay thin a ni a, a problem hi a nasa a nia. Tun thlengin thlak tur hi min la thlak sak lo a ni a. Hetiang thil hi a pawilo khawp mai. A chhan chu

birth certificate hi a pawimawh khawp mai. A bikin ka bialah a ni a, tunlai khawvel dinhmunah kan sawi zel a, birth certificate tel lo chuan engmah hi kan ti thei lo a ni a, document pawimawh tak a ni. Hetiang a nih chuan Planning Department hi fimkhur se, thlak vat se. A chhan chu a sawn a ni, sawn vangin thlak a ngai hrim hrim a ni a. Thenkhat pheih chu a diklo anih chuan an pe chuang lova, thenkhat pheih chu example-te kan nei nual a, non-formal teacher a ni a Birth & Death Register hi, an register-ah Chiang deuh in an ziaik ngai lova chubakah Lunglei an Head Office-ah an thawn ngailo anmahni issue pawh ni se, an register-ah dik taka an neih loh chuan Lunglei-ah hian an pawm duh tlat lova, kan bialah hetiang problem hi tam tak kan nei a ni Pu Speaker, a remchan laiin he harsatna ka bial chhung ami hi kan tarlang a ni.

Demand No.19-na a Minister pawh a fel khawp mai a Department enkawlnaah pawh a hneh a ni ka hria. Amaherawhchu, ka bialchhungah problem pakhat kan neih chu Lungrang Village Council huamchhung Sub-Village pahnih Sadailui leh Thanzamasora MLA-te hi min block ve thin a ni. V/C Inthlan lai a ni a tunah chuan development zawng zawng V/C kaltlangin a lo kal thin a. Chuvangin V/C thar hi min pek theih dan hi a awm lo maw? Min pek theih loh chuan Lunglei South-ah bet law law ila a tha lo maw. Chuti lo chuan min vote ve thin a, development hi a kal tlang thei thin lo a ni. Entirnan sawi ta ila, Lunglei South bialah Lungrang chu a awm a ni a, amaherawhchu, ka bial a awm a limitation an ti sual a chuvangin Minister zahawm tak khan min enfiah sak thei se ka lawm khawp ang. Ka support pahin tawite in ka'n sawi a ni e. Pu Speaker ka lawm e.

**SPEAKER** : Hetiang ema kan tlai hi kan lo rin loh avangin thingpui lam kan lo inbuatsaih lo va, member te hraitthiamna kan mamawh a ni. Pu Ruatkima i sawm ang.

**Pu LALRUATKIMA** : Pu Speaker, ka lawm e. Kan Opposition group Leader kha a dam sam vak loh avangin a chhuak a min lo phatsak dawn nia a ti a, ka'n sawi hmasa a ni.

Wawiin atangin Demand kan sawi tan a, ka lawm a Pu Speaker hun min pek avangin. Demand No.4-na Law & Judicial -ah khanin ka starred question 48 na ah khan kan Law Minister zahawm tak khan Lok Auyukta din tum anih thu a sawi a, sum pawh 432 lakh dah a nih thu kha a sawi a, mahse kan Demand-ah khan a lang lova, tul lo kan ti a nih te pawh ka ring a, kan sawi hmasa ni sela.

Demand No.8-naah khan, kan inngahna ber mai Taxation hi a ni a. VAT atangin sum tam tak a rawn contribute a thawktu tak tak te pawh an ni bawk a, helaiah hianin a thawktu erawh chu an tlem a ni. Chuvang chuan thanhnemngaih a na khawp mai a, chutih lai chuan in Inspector te an thahnem lo kan tih laiin Inspector hi Gazetted Officer te an nih laiin Department te pawn contract inspector a an rawih te thenkhat an lo ti nghet leh bawk a, helai hi enge a chhan tih te pawh ka ngaihtuahna ah chuan a awm a.

Tin, Demand No.9-na nimin lamah pawh kan sawi tawh kha, year of consolidation a kha kan sawi uar viau a chul rih kum ka tih a kha, a nalh zawkin ka la hre cheu mai a, thar hlawk loh kum, mizopa hriat thiam dan zawng tak ni tur te pawhin kan hria a. Chulaiah chuan Demand No.9-naah hian Lottery chungchangah ni 9.3.2011 khan tender kan chhuah a, mi 13 lain an chhang a, pakhat erawh kha chu invalid a. Chutah chuan kum hnih han nih chhungin kan han extend leh a, tun hnaiah ni 29.5.2015 atanga election dawn ni 28.5.2018 thleng mai khan kan han extend ta dawrh mai kha a fuh lo in ka hria a, chulai chu kan Revenue kawngah thahnem kan ngaih tehlu nen a hmasaa chhangtute khanin an chhanna ang khan kalpui ta ila, kum khatah crore 50, 60 kan hmuh theihna tur a nih lai khan 2012-2013 ah crore 3.85 kan hmu a 2012-2013 ah khan crore 9.30 kan hmu a, 2013-2014 te kan hmuh zawng zawng belh khawm khan crore 24 vel chauh kan hmu ni khan a lang a ni. Chulaiah chuan Lottery-ah khan scam lian tak mai a awm ni pawn hriat a ni a. Helaiah hi chuan kan Finance Minister-in thahnem a ngai viauin ka hria a kan lawm a. Helaiah hian kan hlawkna tur zawk anga kalpui a ni lo kha a fello deuh chuan ka hria a.

Tin, Pension-in sorkar hnathawkte an han chhuak a, an pension sum leh paite an hmu har em em mai thin a, chu chuan harsatna a siam a. GPF ah te kan han dah sak a, chung withdraw leh chu a harsa em em mai a ni. Keini takngial pawh min lo ziah sak ve rawh an han ti a, kan han ziak sak ve nawk nawk a, mahse an hmuh leh hmuh loh chu kan hre chiah lova. A thenin nuai 10 te an dil lain singnga te an lo dawng bawk a, chutiang vel chuan sorkar hnathawkte an chep a. Damlohna avangte, in sa tur te leh thildang chi hrang hrang an mamawh ang hi chu an dil ang pui a nih loh pawn an harsatna zualpui te chu phurhruk sak chu kan tih awm tak a ni. A thawktute tak tak an ni a, tih kha kan sawi tel duh a.

Tin, Demand 14-naah nichina kan ngaihtlak tak ang khan Delay in the Register of births and death chungchangah khanin, tunhnaiah khan notification thar a rawn chhuak a, chutah chuanin kan thi emaw kan piang emaw pawh ni se, a hun taka an lak loh chuan ₹ 1210 chawi a ngai a ni. A tam hmain ₹ 10 kan chawi thin a, Pu Speaker, amaherawhchu, helai notification-ah hian a chhan hrang hrang a rawn ziak a, late fee te, 1<sup>st</sup> Magistrate a pek tur cheng sangkhat tih te. Tin, in registered-na a thih tawh avang hrim hrim khanin chawi te kha a ngai bawk a. Khatiang khan ₹ 10/- atanga ₹ 1210/- kan thih tawh a chung a khami la lak leh ngai kha chu a dik chiah lo a ni. A piang a te pawh kha dik ka la ti chuang lova. Mi tam tak hi mahni in leh lovah kan piang a, chung ang piang te tana an lak hun taka an lak loh avanga kha zozai mai chawi te kha chu ngaihtuahna kan Finance Minister zahawm tak hian min neih sak leh se a thain ka hria a.

Tin, kan sawi tawh angin Planning Department hi restructuring tih te pawh a ngai khawpin ka hria a. Kan sum leh pai NLCPR leh NEC, DoNER atang zawng zawnga

lo monitor-tute an ni a, an indaih lo a ni. An mawhphurhna ang hlen chhuak tur hi chuan helai hi restructuring te pawh an ngaiin ka hria a.

Tin, Demand no. 14-naah vek hian hei kan Finance Minister zahawm tak hian nimin lamah pawh a sawi tawh a, MLA Fund min rawn tihpun sak a kan lawm khawp mai a. Tun hnaiah kan Parliamentary Affairs Minister leh kan Deputy Chief Whip te pawh All India Whip Conference ah khan an zuk kal a. MLA Fund te, Area Development Fund ang chi zawng zawng kha rualkhai tlingin uniformity a kal te pawh kha an rawn sawi lang a, a lawmawm khawp mai a. Chutih lai chuan kan han tipung zo chauh nangin heng MLA Fund hi a tute tan pawh Bial chhung develop-na a ni a, a endiktute chu mipui kan ni. Kan thawhthat loh chuan a tuartu chu MLA te kan ni dawn a, churang chuan kan ACR a ni takmeuh meuh a. Kum thar lamah hi chuan nuai 100 ah te hi chuan min tihpun sak thei lawm ni.

Hmanniah khan Jharkhand atangin PAC an lokal a, chumite chuan MLA Fund hi nuai 300 an neih theuh thu kha an sawi a. Keini chu 30 kan nei thin a, tunah hian 50 ah kan Finance Minister-in min tihpunsak a kan lawm khawp mai a. Kum tharah chuan beng thar in ngaihtuahna min neih sak se. All India Whip Conference pawhin a lo sawi tawh ang khan ka'n ti a.

Tin, Demand no. 19-na, LAD-ah khan VC te election kan neih theih lohna, Law & Order avanga harsatna, inthlanna kan neih theih loh khua 31 ni tain ka hria. Khang te kha inthlanna hi buatsaih a ni thei tawh lawm ni? Law & Order kengkawhtute lam pawn tan rawn la sela, helai hi chu mipuiten an duh thlan roreltu kan neih ve hi a hun lawm ni ka ti a.

Tin, nichinah khan Member zahawm tak Kolasib bialtu khan a sawi a, VC election-ah recount te a ni a. Chutah chuan election tribunal ten hma an han la a, an report a kha an theh lut a ni. Tun thleng mai hian khaw thenkhat, a bik takin Bilkhawthlir North ah pawh khami a tling zawk a pawh kha VC sitting ah pawh koh a ni bik chuang lo a ni, khatiang ang kha a ni nuai mai a. Tumpui-ah pawh khan sorkarna inthlak hlawk tur a nih laia ala inthlak lo tih te pawh kan hre baw a, Kolasib ah khan. Khatiang te kha a ni a, churang chuan relfel a tul khawp mai a.

Tin, LAD hrim hrim a hi kan ngaihsak ta lo emaw ni chu aw tih theih a ni a. Ministry zuk nek tur a hi Panchayati Raj Ministry lian tak mai kan nei a. Tun tum kan Budget-ah hian V/C te hamthatna tur pakhat mah an nei thei baw si loh a nih avangin helai hi LAD kalphung a pawh hi kan en that a siam that a tul ang ang te pawh siam that a, kan tih nun tha leh te pawh hi a tulin ka hria a.



Tin, Demand No. 29-na. Hei hi Social and Service Sector an ni a, Social Welfare. Anni hi mihring enkawltu Department a ni a, Anganwadi atanga tar pension thlengin an enkawl a, thahnem ngaih a na khawp mai a. Chutah chuan tar pension pek chungchangah a hun takah kan pe thei lo zeuh zeuh a, hengte pawh hi tan han la leh zual sela. Tin, a tihpun chungchangah rawtna te pawh an thlen ni te pawhin a lang a, hengte pawh hi tan lak a ngai khawp mai a.

Tin, kan hriat angin kan ramah zu kan zuar a, a chhanchhuahna leh a tihamna lam te pawh hi kan ngaihtuah tel a ngai a ni. Chung chu Social Welfare hmalakna after care ang chi Sethawn-ah te, MSD&RB lam atang te pawn tan kan lak a tul hlein ka hria a. Tin, hei naupang te, child labour te an dikna leh an zalenna zuk enpui a Juvenile Justice Act kan han tih thin angah te, Aizawl-ah leh Lunglei-ah pawh Observation Home te pawh kan nei a. Heng ang te pawh hian thuam that an mamawh a ni. Chuvang chuan hengah te hian kan Minister zahawm tak hian tan rawn la leh zual sela. Tin, Child Labour hi hnamdang te pawh thil zuar naupang te kum tling lo bazaar ah te hmuh tur an awm thin a ni. Chung ang zawng zawng chhawr luihna ang chite, tunhnai National Chanchinbuah khan Meghalaya-ah ringawt pawh child labour an tam thu an rawn sawi a ni. Mizoramah pawh kan awm teuh mai, hengte hi enfiah a ngai khawp mai a.

Tin, nimin maiah The Mizoram PWD equal opportunities rights and full participation te kan Minister zahawm tak khan he House-ah hian a rawn lay a. Pian phunga rualbanloten hamthatna an neihna tur hi kan ngaihtuah a ngai khawp mai. Vawiinah pawh an hna chanvo reservation danina a phal ang chi hi chu kan ngaihtuahnaah awm zel sela.

Tin, CSS ang chite, RVS, GEAG kan tih tleirawlte enkawl na ang chite, ICDS hmalakna kan han tih ang chite leh tribal welfare atanga kan hmuh article 275 ang chi-ah te pawh khan a insem zai theih deuh dan awm chuan a lang a, project kan siamah te pawh khan. Chutiang chuan mihring tleirawlten eitur tha leh nundan tha leh kaihruiatu tha an neih theihna tura hmalatu chu Social Welfare an ni. Engkim maiah hian Social Welfare hi a ni ta ringawt mai a. Chuvang chuan heng Grand-in-aid chungchanga NGO te kan ngaihtlak tawh ang khan YMA te, MUP te leh MHIP te hamthatna tur te pawh hi han ngaihtuah a, an meeting, conference an neihna tur te pawh hi Budget Head-ah te pawh hian dah mai ila a fuh zawk mai lawm ni tih te pawh kha ngaihtuahnaah chuan a la awm a ni.

Pu Speaker, a hnuhnung ber tur ka ni tawhin ka hria a, Horticulture Demand No.32-naah khan kan lut zawk ang a. Hei kan Minister zahawm tak hi Chanchinbu lamah kan lo hmu a, Official te nena an meeting naah eptu MLA te pawh in lo ngaihven ve dawn a nia, thlauhthlak hi rem ka ti lo, a ti a, ka lawm khawp mai a. He House zahawm takah hian ka sawi tawh thin a. Midangin min thlauhthla tihna a ni hauh lo a. Amaherawhchu, khatianga Minister inhawng tak kan nei kha a lawmawmin ka hria a. Chulaiah chuan Nodal Department Official te aiaV LMC an ring

zawk tlat erawh kha chu a ngaihdan thlak se a tha awm mange aw kan ti deuh a. Chu chu kan ngen tel duh bawk a. Thawktute pawh an phur leh zual ngei ang.

Tin, Horticulture hian CSS- ah 5, MIDH te, RKVY te, OFWM te, NMNP te leh NLUP te an han nei a. Kan ramah Green Revolution an thlen tir pawh ka beisei a ni. Chulaiah chuan thlai chi supply te kha kan han sawi a. Parliamentary Secretary zahawm tak khan a rawn khaikhawm deuh a. Hei, an requirement an han thehluhah hian Secretary tih hmingte ka hmu nawlh mai a. Chuvang chuan inenlet chu kan ngai tlang a ni tih chu a chiang mai a. Tilaiiah hian ka kawh hlauh mai a, chungte chu ka sawi tel duh a. Tin, Pu Speaker, kuthnathawktute hi mi za a sawmsarih (70%) Mizoramah hian kan ni a. Kan GSDP in nghahna chu Horticulture Sector hrang hrangte hi a ni a. Chuvang chuan, Horticulture-ah hian tan kan lak nasat hle a ngai a.

Tin, fisheries chungchangah khan kan ngaihtla a. Kan RKVY te leh NLUP leh FFDA leh NSWF leh NFDB atanga kan sum hmuh zawng zawngte han ngaihtuah khan in kan tharchhuah, kan production hi a tlem a ni, tan kan lak a ngai khawp mai. Tin, chubakah chuan kan Minister zahawm tak kha kan ngen duh leh hriattir duh chu Lengpuiah khuan Laldenga Fish Seed Farm kha Pu Speaker, kan Governor zahawm tak khan a hawng tawh a. Kan official record-ah hian tunah hian kan titha duh reng reng lo mai a Laldenga Fish Seed Farm. Sorkarna chu inthlak thei ngai a ni e, vawiina tute emaw hmingchawia eng eng emaw hming kan phuah te hi sorkar thar lokal hian an vaw thla mai ang, an tihthat duh loh chuan. Chuvang chuan, lo tidanglam ve se ka ngen duh a, tute pawh kan sorkar thei.

Tin, Demand No.41-na Sericulture-ah khan pangang khawi family 5044 kan awm a, quintal 523 kan thar thu kha kan hria a. Kan income erawh kha chu nuai 66 chauh mai kha a ni a, tan kan lak leh zual a ngai a. India ramah silk industry a lian em em a. Chutiangte chuan thahnem kan ngaih tlan kha a ngai a ni. Chung ang te chu demand hrang hrang kan sawi tlangpuite chu a ni a.

Tin, Social Welfare Department, Demand No.29 na kha point khat chiah Pu Speaker, min lo hrethiam lawk la, kan kir leh lawk ang e. Nutrition supply kha sawi neuh neuh a tam a. Chuvang chuan, tunhnaia Nutrition supply-ah khan kan sawitel duh chu, 23 March, 2015 Nutrition supply-ah hian a approve tur kan Finance Minister zahawm tak hian Chief Minister-ah a thawn a, a approve tu chu Chief Minister signature chu a ni chiah lo a. Chulaiah chuan, OM kan chhuah a Finance Department lam pawn. Chutiang chuan, Constitution of Purchase Advisory Board & Guidelines for Regulating Supply and Purchase of Materials kan ti a ni 14 March, 2013 khan. Heng ang OM hi zawmtu tur chu midang an ni chuang lo a ni, keimahni hi a zawmtu tur kan ni a. Hengah hian thil kan lei dawn reng rengin a man a zirin approve tu tura kha an awm a ni a. Chuvang chuan, thil chiang tak lang chu Pu Speaker, a khaikhawm nan sentence khat chiah ka'n sawiduh chu, Nutrition supply-ah khan thil fel tawk lo awm thei a nih avangin kan Minister zahawm tak pawhin min lo enchian sak zel se, a tha a nge tih kha kan ngen duh a.

He Demand hrang hrangte tihlawhtling tur hian mipuite kan tan tlan a ngai a. Amaherawhchu, mipuite tel lo chuan, sorkar hnathawk tel lo chuan, sorkar tel lo chuan engmah hi a hlawhtling thei lo a ni. Pu Speaker, hun min pek avangin ka lawm e.

\*Speech not corrected

**S P E A K E R** : Awle, sawi tur dang kan awm tawh loh chuan Finance Minister zahawm tak sawm ila. Sawihona kha han khaikhawm se, sawifiah ngaite sawifiah sela, a Demand kha pass rawn dil nghal mai se.

**Pu LALSAWTA, MINISTER** : Pu Speaker, thingpui kan in bawk si lo a, haw hma kan duh ngei ngei dawn in ka hria a. Chuvang chuan, a tawi thei ang berin han sum-up kan tum ang a. Nimin piah lamah te pawh kan lo sawi nual tawh avangin sawi nawn tullo te pawh a awm teuhin ka hria a. A hrim hrimin Pu Speaker, kan dinhmun hi tlem a zawng chu han sawi hi tha ka ti tho va. Kum 1972 U.T. kan nih tira kan pawisa neih zawng zawng kan budget kha nuai 1792 a ni a, tunah hi chuan nuai 7,75,682 a let 422 velin a lo tam ve tawh a ni. Tin, kumina kan budget hemi nuai 7,75,682 chuang hret hi nuai hlir nuai 7 chuang tihna anih chu. Heta tang hian PWD leh Printing & Stationery-ah hian nuai 100 ve ve hmuh let beisei kan nei a. Tin, Food & Civil Supplies –ah crore 178 vel hi Buhfai leina leh thil dang dang atanga lo kir leh tur awm kha kan han paih khanin kan budget chiah, wawiina kan budget chiah nuai 7,57,655/- kha kha kan nei tih kha kan sawi hmasa a. Pawisa lamah kan thang viau a amaherawhchu, development lamah kan thang vak lo ti te pawh an awm a. A mal te te hian mimal sawi kha rawn tih chian ngai ka ti lova. A sawitu hi mi 19 niin ka hria a. Chuvangchuanin, a pawimawh zual nia ka hriat kan sawi zung zung mai ang a.

Planning te kan enkawl a, a mipui lam te nen pawh hian Mizoram thatna tur tak tak hi Pu Lalrinliana Sailo in a rawn sawi ang khan kan ngaihtuah a ngai ta hle maiin ka hria. A chhan chu, thil tak tak tih dawn hian a lawmtu aiin lawmlotu kan tam dawn tih hi kei chuan ka hrechiang sa tlat mai a. Chuvangin, thil tak tak kan tih dawn chuan mipui lam pawh hi lam tangah Sorkar hian kan sawm thiam hle a ngai dawn a ni.

Kum tam tak liam ta khanin Lungleiah Planning Adviser Vaipa a kal a, chu chuan “Lungleia Planning Commission-in an ngaihtuah tur an en khan Civil Hospital an en pui ta, tul a ti em em a, ‘hei hi chu in mamawh a ni, mipui in tam si, in hrisel bawk si lo, in mamawh hle a ni’ a ti a. Chumi zawhah chuan Saikuti Hall en tura an hruai khan, “Hei hi in mamawh lo, ka kal dawn lo”, a ti a. Circuit House-ah a haw chho daih mai a ni. Kan mamawh nia kan hriat leh kan tana tha tur tak tak hi kan hriat ngam a tul tawhin ka hria a. Thil tam tak vawiinah hian kan ti dem dum a, kan House Leader, kan Chief Minister ber pawhin a sawi a, ‘Kal pangngaia kal tleng tleng hi kan tlin tawhlo a ni’ a ti a. Chuvang chuan, Real Planning kan neih dawn hi chuan tam tak te hi chu an lunghnur dawn tih hi ka

ngaihdan a ni a. Department then khat te pheih hi chu kan pheh a ngai dawn a ni. An awm zel ngai lova private-in an tih theih tur tam tak te pawh hi a awm a ni. Chung chu kan sawi phawng phawng duh a.

Entirnan- khawvel indopui hmasa 1914-1918 hun laia kan Mizo Labour Corps kan tih, French ram kalte khan France ram atangin Antam an rawn hawn a, chu an Antam hawn chu an kal nawn leh hi kan hre miah lo. Mahse, 1917 vela antam an rawn hawn hi wawiin thleng hian French antam hi Mizoram-ah hian tam tak kan la nei a, kan la ching pung reng a ni. Chu chu department tam takte hian entawn pawh a hun tawhin ka hria a, kum tina supply reng chung si, tam chuang si lo te pawh hi inngaihtuah deuh hi chu a ngai ve tawh chuanin ka hria a. Tan lak pawh hi a hun tawh a ni. Tih dem dum hi a tam lutuk a, Ka pu, kum 50/60 chhoh velah kha chuan kan hmingah te khan Zakhuma tih te, Zaneihchhungi tih te, Zathanga tih te an tam mai. Chungah chuanin, cheng za lam a ni lova, buh phur za a ni, phur za ang zawng kha an chhuang ve em em a. Wawiinniah hian kan hming hi phuah dawn ta ila ‘Sawmthumpelhreta’ tihte emaw ‘Sawmhnihpangaa’ tih velah hian kan tlahniam daih tawh a ni. Kan production hi a hniam tawlh tawlh emaw tih tur hian Planning atang hi chuan kan hmu tlat a ni. ‘Technology a sang kan’ ti a a, lawmawm, mahse production technology hi kan avail miah lo. Kan milian te leh kan mihausate pawh hi hetah hi chuan kan sawm deuh pawh a ngai a. ‘Pu R. Sangkhuma’n vawk 7000 a nei’ tih te pawh hi sawi a chakawm tawh a ni. Kan mihausa te pawh chutiang chu lo ni se, khatiing kha thu hma ang deuhvin kan sawi ang a.

Kan Estate Officer chungchang kha hmanniah khan ka sawi nual tawh a. Harsatna an neih chuan a solution zawng zawng kan hre kher lo mai thei a, mahse khawngaih takin lo kal se, Law Department-ah, Mizoram Rules kan lo siam ve pawh a ngai mai thei a, tin anmahni pawh empower tura Notification chhuah te pawh a ngai mai thei a tih kha kan sawi nawn leh duh bawk a.

Tin, Taxation chungchang, online trading chungchang kan tih kan sawi kha kan beisei ruk dan chuan Entry Tax Act, hmanni lawka he House zahawm taka kan ‘pass’ te hianin a ‘tackle’ zo ang em, kan hre lova. Mahsengin, hei hi Empower Committee kan thutkhawm tumin ka ‘raise’ mai mai a, Pu Arun Jaitley-a chuanin ‘engmah kan ti thei lo vang , hei hi chu thil tih theih chi a nih ka ring lo. It is the blessing of a twenty first century’ a ti ve tawp mai a. Mahse, hei hian kan sumdawng tam tak te wawiinah hian an dawr a khar tir tlat a ni. Hei hi sumdawng rinawm taka chhiah pe chak em em te ti hnual zawng-a a kalna ah leh sorkar lam a lut lo a nih bawklawi si na hi chu kan hria a, kan theih tawkin kan lo enfel ang a.

Tin, GSDP chungchang hi, kan sawi tak ang kha a ni mai a. Ministry of Finance-in, ‘hei hi in GSDP a ni, in pawisa che vel, a lut a chhuak zawng zawng te

ngaihtuah in hei hi in GSDP a ni,' an rawn tih khan chuan, keini tan a aia tha argument kan nei chuang bawk si lova, kan pawm mai loh chuan. Keini chauh lo Maharashtra, Karnataka te, Bihar te pawhin an tih ve dan tho a nia, chu chu tuna kan dinhmun chu a nia.

Tin, Economy Measures chungchanga kan ngaihthlak fo thin, opposition lam te pawhin, 'hengah hi chuan kan tanrual a ngai a ni' ti a mi an puih hreh miah lohna lai hi a lawmawm ka ti a. Anni hi tih takzet a he House zahawmna min vawn pui tu leh kan ram tana thawk duh tu an ni tih kan hriat avangin hetiang an hnen atanga kan han ngaihthla thin hi lawmawm kan ti a ni.

Tin, Lok Ayukta chungchang kha, kan lo tisual palh a ni mai awm mange aw ka ti a, kan lo ennawn a tulin ka hria. Tunah hi chuan eng eng emaw, a thawk tur han lakna tur provision tlem tlem chu kan han dah ngei a, kan thlir in tunah hian October thla tawp lampang a lo ni chho ta mai a, a hun taka hi 2015 - 2016 ah hi chuan kan implement hman chuang lovang a, 2016-2017 ah te chuan kan thlir deuh chu a ngai ang a. Tuna Budget-a han dah ting tang te pawh hi ti te hian kan sawi kan sawi ve a. Engpawhnise, ennawn ngaiin ka hria a.

Kan Chief Minister min hruaina ah hianin, a laimu lai fova hi chu, keini aia vanduai zawk deuh, keini aia chan chhe zawk deuh, mirethei te mamawh phuhruk hi a ni char char reng a. Hetah hi chuan kan neih zawk vang nilovin sorkar hian, kan ngah um vang pawh nilovin, theih ang tawka a tih zel hi chu kan tum tih kha kan sawi nghal duh bawk a.

District tin a Judicial District anga tih theih a, Session Judge han dah hi kan chak a. Vawinah hian member zahawm tak ten in hriat angin Lunglei leh Aizawl chauh hi a ni mai a Judicial Judge, District a kan neih chu, District pariat lai nei ve si khan. Mahsengin, hei hi kan tlin lova, zep thu a cheng lova. Witness te koh a ngai thin a, Law Department chuan theih ang tawka tih chhoh zel kan tum a.

Tin, Plan atang hian capital assets buatsaih thiam nise tih hi an rawn sawi a, hei hi thil pawimawh tak a ni. Tun tuma Zodin Cinema Hall hlui sorkar in kan lei tum pawh hi kan ngaihtuahna ah chuan kan tum ang vut vut in develop thei lo mah ilangin kum nga a vei chuanin a man hi a lo to leh ang a, kum sawm ah phei chuan a lo to lehzual ang a, tih ang te a nih avangin Lunglei Electric Veng a an ram YMA te'n, 'Sorkarin assets min siamsak dawn phawt chuan kan phal a ni' an rawn tih kha ngaihthlak a nuam a, a lawmawm a.

Tin, Pu Speaker, ram hi a hlu a, ram hmangaih tawh phawt chuan ram hlut zia an sawi uar em em a. Nia, Abrahama'n a awmna khua a tlansan laia a lei rah ang tho kha helai Tuikual kan tih te, Mission Veng kan tih te ah hian kan lei rah hi a la ngai reng a, a thang miah lova, a pung miah lo bawk a, chuvang chuan lei (land) hi chu a hlu thlawt a, chuvang chuanin vai hnena han hralh te phei chu kan phal lo khawp mai. Khalai kha kan member zahawm tak ten min tawm in ka hria a.

Tin, NEC-a kan han tih that kha kan chhuang a ni. Kan Planning Department pawh hi a hminga enkawltu ka nihna angin ka chhuang khawp mai, an ti tha ka ti a. Project 21 zet mai kan lo tipuitling a. Tin, helai NEC, North East Region-a a khawih ho zawng zawng State a ti tha ber kan han ni thei te kha an thawh that vang a ni a. Chuvang chuan NEC chauh nilovin DoNER ah pawh hian ti tha ber ni turin hma kan lak a ngaiin ka hria, a lawmawm takzet a.

Tin, tax chungchangah, 'Chhiah pek dan awlsam' tih an sawi kha thil pawimawh a ni. Officer hnena ka sawi fo thin chu, 'Department dang anga mi pek tur engmah nei kan ni lova. Keini hi mi ta chhuhsak Department kan nia, kan Department hmel te hi a chhia a. Chuvang chuanin mi hian min ngaina lo a nih pawhin a awm ngawih ngawih mai a. Mi va pek ve a hnek a chhuhsak tu ringawt mai nih kha chu. Chuvang hlei hlei chuan kan hawihhawm te a ngai a, biak nuam kan nih te a ngai a, tin, kan hnathawhna kawngah pawh an tana awlsam tur zawnga kan tih tam hi a ngai a kan inti a, kan lo ti leh sauh sauh ang a, member ten finchhuahna tha tak tak min pek avangin a lawmawm a.

Tin, GP Fund withdrawal chungchang hi ni e, an pawisa a ni a, mahse chutih rual chuan dan te hi a awm ve a, GP Fund withdraw chungchangah hian. 'Kum chuti zat a thawk tur a ni' tih ang te a awm ve neuh neuh avang khan hetiang lo deuh hian ti i langin, mangan a pawisa na na an lak chhuah theih dan tur chu ti in Finance Department in kan thiam ang tawkin kan han duang chhuak ve a. Tun tuma kan han pek thar department 48 awm ah hian a hranpa thliah thliaha pek ngai 69 kan nei a ni Head of Department hmang te in. Khang 69 kan sem ah khan tunhma a mihring tlem lutuk, thla thum chhunga nuaikhat leh singhnih nei ang chi te kha minimum ah nuai 5 kan pe a, a lian pui pui ang chi atang khan kan han pawt thla ve hlek hlek a, chuvangin an mangan laia an hman theih ang tur chuan hetiang a kan tih a ni. Tin, Finance ah hian lo kal tawh lo se kan duh a, a chhan chu kan pek chhuah vek tawh avangin. Kan Minister zahawm tak takte, kan Parliamentary Secretary leh kan MLA te thlengin mamawh hnenah an mamawh tam deuh a nih pawhin sem rual ai chuan mamawh tam te hnena pek a, mamawh lovin a inzat diat diata lo neih ve ringawt ai kha chuan an lawm zawk te pawh hi kan ring a. Chuvang chuan khatieng khan remruatna kan nei a. Harsa kan tih rualin tha zawk in kan hria a, tin, kan sem hi kan sum neih tlin tawk ni a kan hriat, kan sum tlingkhawm atang a kan tlin tawk ni a kan hriat kan han sem ve a ni.

Kum khat hi hmun li (quarter li) ah kan then a, thlathum zelin. Chutiang chuan kan ti zel a, thuneitu deuh te pawh in tun tuma an pek theih loh pawh in, 'Quarter leh ( thlaleh ) ah hi chuan lo pe tawh rawh u' tih kha lo tang ve deuh hlek thei sela kan duh a. Tin, 'Finance a pawisa tam deuh mai te hi engtizia nge mawnle? Finance chauh hi in pension bik a maw ni le?' tih kha kha chu Finance thawkte pension ni loin Pension hi chu kan Centralised a ni. Department tin a pension turte, a hrang hrang an pension zat inang lo thluah mai site hnena sem chhuah nen ai chuan hei hi chu Accounts & Treasuries lam hian an hre chiang ber ang a, a mimal te te pawh hre thei khawpin an ni hian lo centralised se, lo hre bik se kan tih avangin a tlingkhawm hnuk a, Finance tan bik chuan a tlem khawp mai, a mihring thawk kan tam bik loh avangin. Tin, other charges-ah pawh khan a va tam ve maw le tih kha a awm a, heng hi buhfai lei nana kan hman tur te, Electricity lei nan te, Tui pump nan te a kan hman turte an lo dahkhawm ve, a tul ang hun te te a pek chhuah tur kha a ni a, min hriatthiampui ka beisei a.

Legal awareness Rural areas ah tih kha a pawimawh khawp a, kan tih ngei ngei tur a ni a. Amaherawhchu, Legal awareness chungchang hi, Legal hrim hrim hi a saptawng te hi a har a, a zir lo mi tan chuan thil harsa a ni a, mahse an hriat ang tawk te a bo lutuk lo a an hriat theihna tur a lo tih chu kan tum ang a. Tin, registration of Births & Death chungchangah, 'A rei tawh si a , a man a to em mai' tih lai kha hetiang hian min hriatthiam pui turin memberte ka sawm duh a. A thawk a te hi hman atangin an thawk reng a, an chhinchhiah reng a, kum hnih kum thum an lo chhinchhiah loh hi chuan engemaw awm ah kan ring a ni, thup tur neiah kan ring tlat a ni. Chuvang chuan Magistrate te, Judicial Officers te pawh pun ila kan tia, a man te pawh hi ti to vin keini ang, ramri a awm tan hi chuan hetiang a discourage hi ngai in kan hria a.

Tun atanga kum 5 kum 6 ah te phei chuan late registration hi awm miah lo turah kan beisei a ni. A chhan chu han pian a, han thih emaw a han in register nghal hi thil harsa a kan ngaih loh avangin. Tunah hi chuan ngaihdamna period ang deuh hlek in kan la kalpui zawk a, amaherawhchu, a lutuka misualin remchanga an lak loh nan a fee tal hi chu tisang ve ang khai kan han ti a. Ram awpna ah hianin, keimahni chhul chhuak nilo, heng mite hi hnawk kan ti a. Ram fing apiangin anmahni citizen lo hi hnawk an ti a, keini pawhin chu lamah chuan kan pen sau ve viau a ni. Chuvang chuan helaia kan tih hi chu rinhlel hi kan nei a, Dan bu ah kan ziak lo mai a ni, kan ringhlel a ni, chung avang chuan heng hi i ti harsa ang kan tia ni Pu Speaker. Kha deuh zawng kha a nia, a tam viau nangin. Ka hnungah Minister zahawm tak tak pahnih an la awm bawk a, kha zawng kha ni mai teh se. Tichuan pass kan dil nghal mai ang e.

Pu Speaker, Governor in a min recommend ang leh i phalna leh House remtihna in heng a hnuai department pali te hi hetiang hian he House zahawm taka member te min pass pui turin ka dil e.

Demand No. 4 - Law & Judicial ₹ 29,87,72,000 Demand No.8 Taxation ₹ 14,64,53,000 Demand No. 9 Finance Department ₹ 10,19,86,00,000

Demand No. 14 Planning & Programme Implementation ₹ 4,04,47,20,000 a vaia belhkhawm ₹ 14,68,85,45,000 hi he House in a min pass pui turin ka ngen e, ka lawm e.

**S P E A K E R** : Awle, kan Minister zahawm takin a department chan Demand No.4-na, 8-na, 9-na, 14-na avaiia belhkhawm te demand hrang hrang chan kha aman a chhiar tawh a, ka chhiar nawn lo mai ang a. A vaia belhkhawm ₹ 14,68,85,45,000 crore he House in pass sak turin a dil a. Pass remti zawng ‘remti’ ti ru le...remti lo kan awm em? Awle, Finance minister zahawm tak department chan Demand No.4,8,9,14 –a pawisa a zavaia belhkhawm ₹14,68,85,45,000 crore hi he House hian lungrual takin a pass a ni.

**Pu LALSAWTA, MINISTER** : Pu Speaker, ka lawm e.

**S P E A K E R** : Tunah hian Demand No.19,29,32 na neitu Pu P.C.Lalthanliana kan sawm ang a, amahin lo wind-up in clarification ngai te a clarify ang a, pass rawn dil nghal mai sela wawi khat ah.

**Pu P.C. LALTHANLIANA, MINISTER** : Pu Speaker, ka lawm e. Kan Finance minister zahawm tak khan hun a hmang tlem hle mai a. Nimin lamah te general discussion ah te an sawi nasa tawh a ani kha chu a hman tawi deuh pawhin a awm viau a. Ka inbuatsaih dan ah phei chuan darkar 2 vel chu wawiinah chuan sawi turah ka inngai a. Kan department ten hna an thawk tam a, an thawk nasa a. I veilama thu te khan hnathawh neilo emaw min ti ang tih chu ka hlau khawp mai a, riltam chung a sawi hrep kha chu dikin ka hre bawk si lova. Chuvang chuanin, kan sawi kim lovang a, kan hnathawh ang te pawh. Ama’rawhchu, an theih ang tawkin hna an thawk ani tih kha kan sawi duh a.

Le, Pu Speaker, member zahawm tak tak member 18-laiin kan demand-ah te an duhthawh na te, an ngaihawh te, department tan pawh a fuihna tha tak tak te an rawn sawi lang a, lawmawm ka ti a. He House chhungah kher lo pawh House pawn ah pawh office lamah pawh engtik lai pawhin kan department chanah hian kan MLA ten ngaihdan duh dan kan nei a, kan sawi duh anih chuan kan inhawng reng a ni tih kha ka sawi duh a. House-ah kan duh leh kan ngaimawh zawng zawng member ten kan sawi vek seng lova, hun kan nei tlem a. Chung chu waviin nia kan member zahawm takte hnenah kan sawi duh a ni.

A tlangpuiin member hrang hrangte sawi kha inang tlangpui tam tak a awm a. Chuvang in, a then han react awm kha react chauh ila tha in ka hria a.

1-na ah Social Welfare department ah Pu Speaker, kan kal ang a. Tar pension hi member engemaw zatin kan sawi a. Hei, thla 10 lai mai an la tawh lova, tar pension te hi a la tute hian an nghakhlel thin a ni. An thlahlel em em thin a ni tih keipawh a taka hretu ka ni a. Tunah hian thla 3 chu draw a ni tawh a, tin, thla 7 pawh hi min rawn sanction a, Finance department lamah kal



tir mek a ni a. Tichuan, tun September thla kalta thleng kha sanction engkim hmu in tunah tihfel tum a ni a; reiloteah kan sem thuai theih ka beisei a. Tin, helaiah hian MLA ten kan bialah engemaw te pawh a awm thei a kan hriat kan duh chu central sorkarin nikum ah khan thla 3 nikum hmasaah khan thla 3 min rawn sanction kim lo a. A hnu feah min rawn sanction kim a, tiang a pek leh te chu a awm a. Tun ah hian thla1 min rawn sanction kimlo tlat mai a ni, nikum ami kha. Chuvang chuan, kha kha engemaw kimlo han tih leh engemaw palhah pawh thil awmthei a nih avangin kan member te min hriatpui kha kan duh a ni.

Tin, kan han sawi leh duh NGO lam leh khatiang ang tanpui na disable te tan pawh aniang chu khatiang chi ah khan Social Welfare Department hi tun hma kan lo hriat dan pawh ani a, khang ang kha. Kha aia ropui kha thil tam tak hi kan ti nasa a, Social Welfare Department hian tuna kan han sawi ang khan hearing aid tihte leh eng eng emaw kha keiniah hi chuan kan pe mai thei tawh rih lova. A bik takin wheel-chair tihte zakdawh tiang kan tih ang chi kha ALIMCO hianin department kaltlang lovin NGO ah a pe a, out source a ni a. Zoram entu pawl kan tih te leh hemi Spastic society kan tih ah te keini department chu an requirement leh engkim ah chuan an rawn through si in, a rawn pek na lamah chuan min through tawh lova. Chung ah te chuan a mamawh tute tan khan lak theih in a awm thin a ni tih kha member ten kan hriat ka duh a.

Tin, NGO te tanpui na ang chi Dekchi kan han tih leh engemaw neuh neuh ang chi te kha nia a tangkai khawp a. A mamawh tu tam tak kan awm a, tunah hian kan sem hlei thei lova. Ama'rawhchu NGO, a bik takin NGO kan tih ah Home ang chi, te leh khatiang chi mangang leh harsa te tlukluhna leh tanpui tu lamte hi chu kan theih ang ang a tanpui kan tum a. Tin, a bik takin wheel-chair hi mamawhna a sang a, hengte pawh hi lei hram dan kan department hotuten an ngaihtuah a ni. Khatiang lamah khan kan theih ang ang chuan kan la kal ve zel tih kha kan sawi duh a.

Tin, member ten stipend leh scholarship a pawisa lokal lang tam tih kha hei VTC (Vacational Training Centre) kan nei a. Tin, Educated Unemployment stipend te pawh disable tan te kan pe ve a, chung ang chu vawiinah khang tan khan khang pawisa kha kan dah ve a ni tih kha kan sawi duh a. A tlangpuiin kan sawi tam tak a kha chu kan officer fel tak takte lo chhinchhiahtu tur te an awm a, vawiinah hian hun a ren zawnga kalpui a, han react vek kha a tul berah ka ngai lem lo a. Chutihlai chuan Social Welfare Department hian tun kum chho a kan hmalakna tur tlem a zawng tal hi thil thar te han tarlan ve ka duh hrim hrim a, 2014 – 2015 ah khan Article – 275 atang hian ₹ 11.34 vaibelchhe pawisa kan hmu a, hemi ah hian kan EMRS residential school kan neih Serchhip leh Lunglei, hman ni lawkah Serchhip chu kan hawng thar a, ₹ 12 vaibelchhe laia sak a ni a. Hemi enkawlina tur te min rawn pe a, naupang enkawlina tur te, a thar tur hi Saiha, i bial Tuipang atan te, Lawngtlai atan te, Chawngte atan te a bul tan nan ₹ 2 vaibelchhe theuh nikum ah khan min rawn pe bawk a. Tin, a panna kawng laihna turin khami atan khan ₹ 143 lakhs pawh min rawn pe fel tawh a, hei hi kan norms kalphungah hetiang school hi ₹ 12 vaibelchhe laia din leh kalpui thin a

nih avang erawh chuan engtin nge tunah hian kan kalpui ang tih erawh chu kan la chiang hleitheh lo a, a dang hi kan hmu ngei dawn em tih te kan ngaihtuah mek a ni tih kha kan sawi duh a.

Tin, tunah hian girls hostel tur Mamit College behchhanin kan sa dawn a, Saiha-ah kan sa dawn bawk a, Lunglei-ah girls hostel kan sa ang a, pathum a thar sak tur kan nei a, heta tan hian ₹ 574 lakhs sanction engkim hmuh fel tawh a ni tih kha kan sawi duh a. Tin, nikum tho pawisa kan hmuhah hian sangha dil tanpuina tur hi ₹ 125 lakhs Social Welfare Department Article atang hian kan hmu bawk a. Tin, ar vulh ho khatiang ang economic weaker section ho han dawm chhoh na tur, ₹ 125 lakhs kan hmu bawk a hei erawh hi chu LADC leh CADC leh Lunglei bik district atana hman tur a ni a.

Tin, 2015 – 2016 ah hian Pu Speaker, nichin ah kha kan MLA member zahawm tak tak te pawhin an han sawi a, Fishery lam ah te pawh duhthawhna an han sawia, Social Welfare Department lam atangin khatiang lam kha enge maw chen Department kan tanpui thei dawn a, ₹ 11.198 crore hi tun kumah Central sawrkar in Article hnuaiah min rawn sanction tawh a, hetah hian sangha chi siamna fish hatchery siamna tur in ₹ 175 lakhs min pe a, hei hi Lawngtlai leh Lunglei leh Serchhip bik atana district a hman tur a ni. Tin, Horticulture link road te pawh Social Welfare atang hian laihsak na turin ₹ 100 lakhs min rawn pe bawk a, tin, ar note tih keuna tur siamna turin Chhim lampangah Mampui hmuna din na turin ₹ 125 lakhs min rawn pe a, tin, bawng vulh lampanga bawng vulhtute tih hmasawna turin ₹ 125 lakhs min rawn pe a. Lawngtlai leh Saiha hospital ah hmanrua tih changtlun nan ₹ 62 lakhs hi min rawn pe bawk a. Tin, Serchhipa kan Eklavya School panna kawng chhe lutuk siam nan ₹ 100 lakhs min pe tel bawk a ni. Chutiang chuan Social Welfare hian tun a hmatar kan lakna mai tur pawh kan han nei a. Pu Speaker kan hriat ang khan department hrang hrang tan pawh tangkai tak tak tur, an hmalakna tur a ni a, heng hi sanction tih fel a nih hunah department concern ah kan hlan dawn a ni.

Social Welfare Department hi Pu Speaker, Social Welfare Department mai hi kan ni lo a, Department Welfare Department pawh hi kan ni tel a ni, tih theih khawpin Department dang tan hian kan tangkai in ka hria a. Tunah hian new scheme, Tribal Welfare Ministry atangin AVY an ti a, chu chu Gujarat ah te an hmanga, hemi ah hian a ministry lam zawkin project rawn siam rawh u, an ti a. Hemi atan hian State level meeting pawh neih a ni a, PWD te, PHE te, LAD, Education, Sports, Art & Culture te, Social Welfare te, khang ang zawng zawng kha ko khawmin heng department hrang hrang hian kan kum 5 perspective plan atan ₹ 200 vaibelchhe siamin tun kum annual atan ₹ 30 an siama, hei hi kan hotuten naktuk velah an keng thla anga, dt 16<sup>th</sup>, naktuk tuk leh ah hian PAC, Project Appraisal Committee kha Delhi ah an thu dawn a, enge kan dinhmun tur kan hre lo a, amaherawhchu an mahni pawhin min rawn kawh hmuh a ni a. Heng ang te hi min approve sak a nih chuan , Zoram tan Social Welfare Department kaltlang hian hmasawna tur tam tak kan hmuh theih ka beisei a ni.

Tin, Pu Speaker, Horticulture Department-ah han kal leh ta ila, Horticulture Department ah hian member tam takin kan han sawi ang khan thlai chi supply velah duhthu a sam lo, thlai chi tha kan hmu tawk lo, an ti tha tawk lo, tih te eng eng emaw sawi a tam a. Hei hi House chhungah mai pawh a nilo a, House pawnah pawh hian sawi a tam a, tin, mipui pawh hian thlai chi supply hrim hrim khawi emaw project hnuaia kal hi Horti vek emaw hi chu min ti deuh emaw chu aw tih te pawh ka ngaihtuah a. Vawi khat chu Lawngtlaiah complain an rawn siam a, mahse a nodal department kha kan lo ni mai a. IWMP project hnuaia thil kal a ni a, department angin kan hriat pui lem lo a, mahse complain kha chu Horticulture lamah khan an rawn ti daih mai a, khatiang te khan project tam tak ah hian thil chi hi supply te pawh a awm ve tho a, enge maw deuhah hi chuan Horti hi min rawn kaw k ve deuh hian ka hria a, engpawh nise a chi tha hi kan farmer ten an hmuh hi kan duh ber a ni. Tin, supplier pawhin a ti tha lo a nih pawhin reject ngam tur pawhin kan in hrih thin a, Pu Speaker, helaiyah hian kan sawi duh chu tuna NLUP bik atana Horticulture in serchi te, kuhva chi te heng supply ang chi kan tih zawng zawng ah hian a chi tha farmer ten an hmuh theihna turin a strict pawh kan strict a, serthlum ah bik ngat phei chuan, mi in nursery a nei ang a, chutah chuan amah ngeiin a root stalk te ala ang a, tikhan a ti tur a ni. Chuvangin kan en dik tur a ni. NLUP Monitoring Committee nen vawi thum thla khat danah te kan endik a ni. Thlai chi supply tur quotation chhuah veleh a, Phai lama Nursery behchhan a, eng emaw rawn chhang ringawt ten eng ang root stock nge khalai kha a pack tih kha kan hre si lo va, an supply hi Zoramah a awm thei a, fimkhur takin kan ti a. Chutianga endik thlap chuan he nursery hian chuti zat chu amahin a ti ngei a, heti zat hi an ti na in, singkhat an tina in sangnga hi lak tlak a ni tih nen lam Monitoring Committee hian a ti a. MNF, ZNP a ni emaw, Congress a ni emaw, party thliarna nei miah loin chutianga nei tha zawng zawng chu kan laksak a ni. Engmah induhsakna a awm lo reng reng, NLUP thlai chi te hi he House-ah hian ka sawi duh a. Ka bial ngei V.C.P. thin Pukpui nursery nei ve awm chhun Lunglei a ni. Tlawng bulah sawn a nei a ni tih House ka hrih duh a ni. Sing khat neiin a in report a, a supply order tur a lokal a, sangruk tih a ni a. Ani pawhin ka hnenah a rawn complaint a, singkhatin ka in report a, tiin ka hnenah a rawn vui a. Ka zawt a, kan Department Officer pakhat ka hnenah a rawn kal ngei a, “Ka pu, kan verify khan singkhat hi chu farmer a pek tlak a ni lova, sangruk hi kan pe a ni” a rawn ti a, O.K. ka ti mai a ni, ka bial ami a ni. Chutianga khawp chuan Pu Speaker, kan theih chinah hi chuan NLUP thil tiak supply te hi kan ti ve a ni.

Tin, Department lamah te pawh hian, nursery nei an awm. Amaherawhchu, Mizoram nursery hrim hrim hian kan mamawh NLUP hi a tam avangin kan indaih lova, Phai lama lakluh te a ngai a. Chutianga khawpa anih lai chuan, miin tha taka an lo nei ve a a nih kha chuan kan mamawha avanga laka te pawh a awm ve tho ang tih chu ka ring a. Amaherawhchu, sing hnih khat chauh mamawh a, induh sak a Department lak erawh chu a dik lova. Chutianga chu thlai chin chungchanga kan kal dan a ni a.

Tin, Horticulture hmasawn zelna atan Pu Speaker he House ah hian sawi pawh a nuamin ka hria a. Horticulture College hi kan nei thei dawn ta a, Sharad Pawar Horticulture Minister a nih laiin UPA Sorkarah Mizoramah a lo zin a, kan House Leader, tuna kan Chief

Minister nen hian thian tha an nihna ah helaia Mizoram a hmun ngei ah Horticulture College din a nih theih nan theihtawp chhuah a inhuam thu leh kawng dap a in huam thu a sawi a. Chumi kal zelah vawiinniah chuan Horticulture College hi kan nei theih dawn ta a. Rei tak a hmun thua kan buai a. Khilalah anni chu awlsam thei ang berin khawilalah emaw Vety College ah in bengbel a in bengkai a ho lam deuh te min sawipui thin a. Amaherawhchu, chutih laiin kan Sorkarin Thenzawl hmunah ram zau tak V/C te khawtlangin an pe thei tih kan hria a, kan rawt thin a, mahse a hla lutuk a ni, tia tanna an nei a. Amaherawhchu chutiang a nih reng lai chuan, Thenzawl hmun Sorkarin hectre 120 kan pek pheih ram kha minrawn pawmpui a, minrawn pawmpui mai ni lovin tunah pheih chuan Pu Speaker, alawmawm khawp a. A infra-structure satu tur te pawh Agriculture University, Imphal hianin an tifel tawh a.

Kan Chief Minister hmalakna a tak kan thleng thei ta hi a lawmawm em em mai a. Zoram thalaite kal zelna turah, Horticulture nichina kan sawi ang khan kan ram farmer za a sawmsarih deuh thaw hi Horticulture a inngat kan ni a. Vawiinah hian kan nei theih dawn a, Class pawh nakum atanga tan theih turin ruahmanna kan hotuten an ti dawn a ni. A infrastructure tih bik tur pawh tunah hian Agriculture University in tunah pawh hian agreement a tihpui tawh a. State-in in tih ve tur National Highway atanga a panna kawng chu lo ti ula, chu chu kan Chief Minister zahawm takin tunah hian a buaipui nghal a. Tunah hian an Vice Chancellor leh an Registrar an lokal a. Naktukah hian ka Office ah engtiangin nge pass kan inhlan ang, engtik ni nge khatiang ang programme kha kan neih tih te kan Chief Minister kaihhraina hnuaiah kan tih hun tur te sawiho turin Formal Meeting dar sawm ah hian naktukah kan nei nghe nghe dawn a ni.

Chutiang chu vawiinah kan ramah kan han nei thei tur hi a lawmawm a, he House-ah hian sawi loh theih loh niin ka hria a ni. Heng zawng zawng a hlawhtlinna chu kan House Leader zahawm tak hmehriat a neihna leh thawhrinna, a inpekna kan ti lo theih lo a ni.

Tin, Pu Speaker, Horticulture kan kalpuinaah hian, nia, a tha ber kan tih te hi a in ang mawh a, tiang zawng hian kal ila a tha zawk ang a, tih te hi ngaihndan tam tak a awm thei a. Vawiinah hian Department ang pawhin kan hotuten an ngaihtuah thin a. Engtiang zawngin nge kal ila tihte hi ngaihtuah thiam a har a. A chhan chu Horticulture Department hlawhtlinna hi a farmer leh a Department ah hian intiat chiah maiin a hlawhtlinna hi a inngat tlat mai si a. Departmentin kan ti that viau lai hian a farmer lamah hlawhchhamna tam tak a awm ve baw si a. Amaherawhchu, vawiinniah hian, kan ram atangin kan thawh chhuah hi han en ila, Horticulture item, entirnan, Serthlum State dangah kan thawh chhuak a, Anthurium te pawh khawvel hmun dangah thawhchhuak theih khawpin Amsterdam atangin a chi tha kan la a. Sawhthing te pawh kan thawhchhuah hi a lo ni a. Chutiang chuan Iskut te pawh State dangah kan thawhchhuak a. Horticulture Item ah hian item li hi chu State dangah thawhchhuakin tunah hian kan awm tawh a ni.

Vawiinah hian Pu Speaker, kan ngaihtuahna pakhatat chuan, kan ram a mi a tha duh si, engatinge mi ram a mi lakluh kan neih ? tih hi kan inzawt a. Lehlamah chuan thil han ti dawn

tak tak ila, a pawimawh hmasak chu a market a nileh bawk si a. Chung laiah chuanin ngaihtuahna te pawh hman thiam hi a har a. Tuna kan ngaihtuah ah hi chuan purun te hi entir nan, purun sen hi a tha duh em em a, kan ramah. Engatinge Silchar purunsen hi lakluh kher hi kan tum, tihte pawh hi kan ngaihtuah a. Chuvangin kuminah hian farmer hi uar zawkin farmer 700 dawn hnenah a chi a thlawnin kan pe ang a, tichuan, kan thar chhuak ang, kan ti a. Doordarshan-ah kuthnathawktu huangah hmanni deuh khan ka en a. An kharchhawanna rate te, an hralhna rate te an rawn tarlang thin a. Chuta ka en ah chuan January-June ah khan Silchar atangin purun quintal 7000 leh tih kan la lut tih kha an rawn tarlang a. Chumi a nih chuan kum khatah quitat 15000 vel hi Silchar Purun kan lalut tihna a ni. Chuvang chuan kan ram a tha duh si, engatinge Silchar atangin kan lakluh. Chuvang chuan tunah hian ram a tha duh, kan mamawh a nih si chuan, chin han uar ila, tun kumah hian ka beisei dan chuan farmer te an hlawhtlin chuan, quintal 10,000 vel hi chu kan thar chhuak awm mang e, a chi kan sem tur atang hi chuan tih te pawh kan ngaihtuah a ni. Tiang chuan Silchar atanga lalut lovin zawi zawiin keimahni tharchhuahah, keimahni te pawh induhsakin hetiang a kan kal chho chuan, nakin lawkah chuan purunsen te pawh hi lalut lovin, State dang zawkah, vairamah pheii chuan a to ani. Purun hi a nep tak tak theilo ani. Engtik niah emaw chuan Mizoram hi purunsen thawnchhuak tu State zawk hi kan nih theih dan awm hian kan hotu ten an hre ve a, chutiang te chuan item mal bik anga kan ngaihtuahna hmanga kan uar te pawh hi tul kan ti a, chutiang chuan kan kal ani tih kha Horticulture lamah khan ka'n sawi duh a.

Tin, han let leh lawk ila nichina Social Welfare Department a kan Member zahawm tak Pu Ruatkima'n nutrition chungchang a rawn sawiah khan a document rawn ken kha engnge ni kan hre lova, an ti thuk thuk a, hei Finance Minister in a sign a hei C.M. a signature chiah chu ani lova a ti a. Financial Rule khatiang engkim a awm a a ti a. Pu Speaker, nia, nutrition hi hei vaibelchhia kum tin vaibelchhe 30 chuang te, vaibelchhe 20 chuang te heng atan hian kan hmu thin a. A dawngtu pawh mi nuai 2 dawn hemi ringtute kan awm a Mizoramah. Hemi nutrition supply quotation koh a, a thlan chungchangah hian thil diklo emaw fello taka tih hi a awmlo a ni tih hi he House ah hian sawi nawn ka duh a. Pathian khawngaihna azarah kan hotute duhsakna in kum 7 ka lo enkawl tawh a, Social Welfare Department hi Nutrition supply ah SPAB hi a thlangtu an ni. Tichuan a amount a zirin Minister, Finance Minister, Chief Minister approval ngai ani. Kum 7 ka enkawl chhung hian chengkhat man mah hi ka duhsak zawng SPAB over rule in ka la pe lo tih hi ka sawi duh a. Chumi awmzia chu SPAB ten uluk taka an thlan a tling a te, a chhangtu a te kha pek mai an ni thin a ni tih hi khawngaihni hre leh thar ila a tha in ka hria.

**Pu LALRUATKIMA** : Pu Speaker, khawngaihni clarification a kha tun hma a an thlanah khanin OM kha a awmsa reng a, tah khan Finance Minister te approval loh kha a awmfo ta a ni. Tun a hnunung berah kha chuan lak a ni a, ka rawn sawi tak kha chu Chief Minister hnenah khanin kan Finance Minister zahawm tak khanin file kha a kal tir a ni. A kal kawng kha chu a dik thlap kan han ti mai a ni. Amaherawh chu approved tu kha Chief Minister signature kha a nih loh hmel lai tak kha ka rawn sawi mai a ni. Chulai chu a dik tawlo mang e aw ka'n ti mai a ni a, chulai zawk chu a ni.

\*Speech not corrected.

**Pu P.C. LALTHANLIANA, MINISTER** : Chief Minister hi an awm loh chuan a charge latu khanin a sign mai tur kha a ni mai a. Pu Speaker, Party-ah te pawh Headquarter ah G.S. kan ni a. Unit an rawn inthlang a, an lo kal zel a, an lo kal a kan lo approved a. A thlangtu kan ni hleinem Unit a tualchhung mi kha a inthlang an nia, a approved tu mai kan nia, khatiang deuh kha a ni mai a SPAB ina a tih tawh kha chu approval lak ngai nachina an sawi ang khan a awm ve a. Engpawh nisela induhsakna thil avang emaw a in pek ngawt theih pawh ani lo. SPAB tan pawh khatiang a nuai tel a crore tel ang kha miin diklo in ti sela, mi court ah an kal mai tur ani. Chuvangin he thil hi kan sawi fo thin a, chutiang ang chu a kal dan a ni tih te kha kan sawi nawn ve leh duh hrim hrim a. Tin Pu Speaker, LAD Department hi department upa leh pawimawh tak mai ani a, lehlamah chuan LAD hi tun hma in thingtlang lama kan development ve a kan ngaih step te te te, tuikhur siam leh thildang dang hi a khawhtu ber Mizoramah a ni a. Tunah hian a dik tak chuan eng department mah hi thingtlang khua step emaw tuikhur emaw siamthei tur department provision nei pakhat mah kan awmlo a ni. Mahse LAD in khatiang kan neih thin a te kha tunah chuan kan nei ta lova, member te sawi ang khan a khawhar thlak deuh na lai chu a tam dawn a ni tih kha min hriatsak kan duh a. Hei tum kumah pawh minor works ah nuai 30 kan nei a, chungte pawh chu kan park lo neih leh lo siam ve tawhte enkawl nan te leh tin, park kha kan member zahawm tak a bik takin Dr. Beichhua in a Mizo tena kan mamawh zia a rawn sawi kha a dik a. Chuvang chuan Aizawl khawpui hnaiah pawh neih theih dan kan hotuten an ngaihtuah a, Hlimen ah ram zau tak mai an Local Council ten min pe a. Saw mi piah lama ram zau tha em em Synod ram kha a awm a. Chungte pawh chu Synod te leh LAD Department in kan ram neih ang ang te han inthleng kualin kan nei fel leh ta bawk a.

Sawlaiah sawn ram zau tak ngaw tha tak awm bawk thengthaw nuam tak a khaw thlir pawh tha tak tur Park hmun tha tak mai chu kan nei phawt mai a. Chu chu kan Finance Department lamah Planning-ah te pawh hei hi tihhlawhtlin ni se tiin kan DPR te pawh kan theh lut a, an ni'n remchang min la siamsak turah kan ngai a, sawilai hmun saw Lalsavunga raldan kawn awmna lai te a ni a, a lungden kawn awmna lai te a ni a. Lalsavunga chu Aizawl khawpui dintu hi a ni. Chuvangin min petu ram neitu Council te pawhin Lalsavunga Park tih nise an ti ve nghe nghe a. Chutiang chuan park lam te pawh Aizawl khawpui hnaiah hmun lian deuh kan mamawh hle ani, chutiang nei tur chuan vawiin niah hian hma kan la a ni tih kha kan sawi duh a. Tin, V/C te hlawh hi kan Budget ah khan other administrative head tih ah khan 211.93 lakhs dah ani tih kha kan sawi duh a.

Tin Village Council inthlang theilo 31, Kolasib District-ah 6, Aizawl District-ah 25, Khawzawl Kanan inthlang ta lo nen 32 ang kan ni a.

Pu Speaker, Village Council inthlan hi State Election Commission thu neihna a ni a, Sorkar ang pawhin inthlan thei lohna tur a awm love, kan in peih e tih hi chu Election Commission hi kan hriat tir tawh a. Tin, all party te pawh in heng hi inthlang thei tawh lawm ni an ti a, lehkha an theh luh te pawh kan theh phei a, an ni pawhin law and order ah engge harsatna a awm ang em

inthlan ti ila tiin department lamah an rawn theh pheih a, keini pawhin a district ah te khatiang khan kan ti tawh a, a hun leh ni te hi chu tu sawi ngawt theih a ni tawh si lova, State Election Commission thuneihna a ni a. Engpawhnise, kan inthlang har dawn em ni a sorkar berin objection kan neih tawh loh chuan tih kha keini pawh kan ngaihnan a ni tawp mai tih kha kan member-te han sawi atang khan kan sawi duh a. Pu Speaker, engpawh nise vawiinah hian sawi sen a ni lova, kan chhang seng bawk lo mai thei a hun tam zawk House pawnah pawh kan nei thei tho a, vawiin atan chuan kha kha ka wind up na atan kan duhtawk mai ang a. Tichuan Pu Speaker, ka Demand No. 19-na Local Administration Department atana ₹ 28,85,08,000 leh ka Demand No. 29-na Social Welfare Department ₹ 1,28,06,03,000 leh Demand No. 32 Horticulture Department ₹ 94,70,51,000 a total ₹ 2,51,61,62,000 hi he House zahawm tak hian min pass pui turin ka rawn ngen e. Ka lawm e.

**SPEAKER** : Kan Minister zahawm tak khan a Department chan pathum Demand No. 19-na Local Administration Department. Demand No.29-na Social Welfare Department leh Demand No. 32-na Horticulture Department a pawisa hman tur a vaia belhkhawm ₹ 2,51,61,62,000 hi he House pass pui turin a dil a, pass remti zawngin 'remti' ti rawh ule. Remtilo kan awm em ? Pu P.C. Lalthanliana, Minister zahawm tak chan Department pathum Local Administration Department, Social Welfare Department leh Horticulture Department-a pawisa hman tur a vai belhkhawm ₹ 2,51,61,62,000 chu he House hian lungual takin a pass a ni tih ka puang e.

**Pu P.C. LALTHANLIANA, MINISTER** : Pu Speaker, ka lawm e.

**SPEAKER** : Tunah chuan Demand dangah kan kal ang a, kan Minister zahawm tak Pu B.D. Chakma-in sawifiah ngaite sawifiah sela, pass rawn dil nghal mai se.

**Pu B.D. CHAKMA, MINISTER** : Pu Speaker, ka hnuaiyah Department pahnih Sericulture leh Fisheries Department a awm a. Tin, Minister ka nih hma khan a hming hi a la lar vak lova, department pahnih belhkhawm pawh crore 30 a tling lova. Department te hi a te a, chubakah mipui rilruah negativity hi a tam bawk si a. Vawiina wind up na speech-ah hian ka department profile sawi rualin MLA zahawm takte sawihona pawh chiang deuhin a sawi theih ka ring a. A hmasain Sericulture hi ka han sawi ang a.

Er. Lalrinawma khan Sericulture lampang kha engmah a sawi lova, MLA zahawm tak 18 zingah 5 in Sericulture lampang engmah an sawi lova, 13 chuan an sawi a. Tin, Pu T. Sangkunga, MLA zahawm tak pawh khan Sericulture lam hi engmah a sawi lova, an lungawi a nih ka ring. Tin, Pu K.Sangthuama hian MNF hunlai khan Sericulture Department hnuaiyah hmalakna tam tak a awmin a sawi a, amah hi tunah a awm lova, ka hriat danin District Council hnuaiyah 2003 emaw 2002 ah, 2002-ah chuan MBBS ka pass hnu in Mizoramah ka rawn lut a. Chutih hunlai chuan CADC, LADC leh MADC hnuaiyah

Autonomous District Council pathum tan, central sorkar hnenah Textile Ministry atangin crore 10 vel theuh project pathum a awm tawhin ka hria a. Mahse, Mara chungchang chu ka hre vak lova CADC lam ka hmuh dan chuan project pumpui za a za a failed a ni, chu chu corruption vang niin a lang. Chuvangin hei hi corruption a ni lova, destruction a ni ka ti a ni. Tun thlengin central Textile Ministry-ah Autonomous District Council atan Sericulture lampang project hi Department pawhin a kalpui ngamlo a ni. Department Director hnenah ka zawt a, Pu Rin Autonomous Council 3 tan project thar siam theih dan hi a awm lo em ni ka ti a. Ama sawi dan in 2003 velah hian corruption an tih nasat avangin black list angin an awm tawh a, tun thlengin side effect chu a awm zel a ni. Engpawhnise, November/December lamah chuan kan Director te nen Delhi-ah kal kan tum a. Project thar Autonomous District Council tan siamin central ministry dawr kan tum a ni.

Tin, Minister leh MLA zawng zawngte ngenna kha tha ka ti a, hei aia hma chak zawka lak kan tum a ni. Sericulture Department hi tlem sawi ka duh chu partly life science, partly engineering a ni a. Life science leh engineer belhkhawm hi Sericulture a ni. Cocoon pangang khawi hi Life Science thil a ni a, Cocoon siam hnulam chu engineering thil a ni a. Railing te, engkim dying te, khang zawng zawng kha chu Engineering thil a ni a, technology based a ni. Technology a nih avangin Sericulture hi tun thlengin a hming a lar vaklo a ni.

Engpawhnise, Pu Speaker, STI, Zemabawkah hian Sericulture Technical Institute tha tak kan nei a, hetah hian kan farmer ho tan leh kan department mite tan training buatsaih thin a ni a, hei hi kan sericulture farmer te pawh hian chhawr tangkai se, time to time upto date training hi nei thei se tha kan ti a.

Life Science anih avangin Lo-ah kal a enkawl ringawt kha a ni lova, highly technical life science anih avangin kan farmer ho hian an zir ve a ngai a ni.

Sericulture hi tun thlengin chanchinbu leh media hrang hrangah te a chhuah tam loh avangin a hming hi a lar vak lova, engpawhnise, central sorkar lam atangin all India level-ah hian Mizoram atangin prize dawngtu Lady 2 kan nei a, an hming kan sawichhuak nghe nghe ang a, 1-na Pi Laltanpuui, Tlangnuam leh 2-na chu Pi F. Lawmsiami, Phaileng South te hian Mizoram atangin National Award an dawng a ni. An hming hi Delhi lamah chuan a lar ve viau a, Mizoramah erawh tun thlengin an la lar vak lo a. Chanchinbu lamah te an chhuah tam loh avangin under current in an awm a ni. Engpawh nise, Sericulture-ah hian hma kan la zel a, hma pawh kan sawn zel a ni.

Mugha lampangah pawh hian Kan Chief Minister zahawmtak pawh hian min tuipei em em a, special interest a nei a ni. Sericulture-ah hian mulberry ah hma kan la nasa ber a, Eri hian a dawt a, Mugha hi tunhnai atangin kan uar leh ta a ni.



Tin, Champhai District hnuai ah Muga species pali kan nei a, tunlai global warming khawvelah issues lian tak a nih laiin Muga hi chu evergreen anih avangin Muga culture hi a tha a, a dai nuam a, boruak thianghlim a pek avangin Mizoram tan a tha a ni.

Assam-ah pawh hian Muga hi a lar thin a. Amaherawhchu, khawvel lum zel avangin a tha thei tawh lova, Mizoram te, Nagaland te, Meghalaya-ah te Muga -ah hmalak thar a hun a ni. Chung zingah chuan Mizoram pawh hi kan tel ve a ni. Muga lampah hian kei pawhin special interest ka nei a, evergreen a nih avang hian ka hobby nen pawh hian a inrem em em a. Global warming-ah hian special interest ka nei a ni. Chuvangin Muga culture hi Mizoram-ah hian uar sauh sauh ila, farmer hote pawh he kan House zahawm tak kaltlangin ka ngen duh a hun takah training te hi nei thin se a tha ka ti.

Tin, Pu Lalhimpua, Parliamentary Secretary zahawm tak khan electricity a awm loh avangin Sericulture lam hian hma a sawn theilo tih kha a rawn sawi a, hei hi ama bial chhungah ringawt a ni lova. Power & Electricity Department hotute hnena ka sawi duh chu ama biala MLA model village chiah hi a ni lova. Thenzawla kan Seri farm pawh hi main town atangin 4 km, 3 km vel a hla a ni a, tun thlengin electricity connection kan nei lo a ni. Chuvangin, Power & Electricity Department hotute hnena ka ngenna chu heng kan farm hrang hrangah te hian electricity connection min pe thei se tih a ni. Pu Joseph Lalhimpua rawn sawi ang khan heng khaw establishment pahnihah electricity min pek theih chuan a lawmawm hle ang. Sericulture lampang duhtawh tawh mai ila, hun a rei toh si a, ka sawi tam lo ang a.

Tin, keini kha chu State Plan Fund atangin hnathawhna tur sum hi kan nei miah lova. Central sorkar atangin project base pawisa kan dawn loh chuan engmah hnathawhna tur kan nei lova. Mahse, Central Silk Board, Integrated Sericulture Development Project, North-East Textile Promotion Scheme Project atangte hian kan Department Official te thiamna zarah project lian pui pui kan nei mek a, chung zingah chuan Lunglei tan family 600 chuan benefit an nei dawn a ni. Mi pakhatin cheng nuai 1.5 either cash or in kind in an dawng thei dawn a ni.

Tin, Project pakhat leh chu Intensive Bivoltine Sericulture Development Project, hei pawh NERTPS hnuai ah a ni a, hei erawh chu Champhai leh Aizawl tan a ni a. Hetah hian family 1000 vel chuan hlawkna an tel dawn a ni. Area erawh chu acre chanve bawr vel an develop a ngai dawn a ni. Family beneficiary pakhatin cheng nuai 1.5 either cash or in kind in an dawng dawn a ni.

**Pu JOSEPH LALHIMPUA** : Pu Speaker, khawngaih takin, kha, Central scheme Lunglei District-a mi tur kan Minster zahawm takin a sawi kha ka hriatsual loh chuan term hmasa Lunglei High Powered Committee, kan Chief Minister hova Prime Minister package kan dilna kal zel kha niin ka ring a. An rawn sanction tur thu kha term hmasa tawp lamah chuan lehkha kan hmu hman nual tawh a. Khalai kha nakinah ruahmanna kha siamsa kan nei teuh a, official te kha min lo hriattir ve se la, an tih dawnah tih kha ka'n ngen a ni.

(**SPEAKER** : Office-a tih chi a nih chu)

**Dr. B.D.CHAKMA** : Pu Speaker, kan member zahawm tak Pu Mahima sawi chu tih kan lo tum dawn nia. Hei hi chu project base a ni a, tihdanglam theih chi a ni lova. report chu written in office-ah pawh kan pe thei a ni.

Tin, Fisheries hnuaiyah pawh kan House member zahawm tak tak tena an lo sawi kha a inang tlang vek a, supply lam hi sawi a tam a. Sawiselna leh suggestion kan ti ang chi tun thlengin a la tam a ni. Ka rilruah thil pakhat a awm a, India ram mi zawng zawng keini Mizoram ami te ringawt ni lo India ram pumah free hi engmah a tha lo emaw ni chu aw ka ti a, ka ngaihtuah ve reng thin a ni. Free awm a tha lo. Doctor ka nih lai Medical Officer-a ka awmlai pawhin, Sub- centre-ah hian iron folic acid tablet kan sem thin a, a quality pawh a tha a ni. Mahse, raipuar ho chuan vaccine lak hunah anmahni thuin an ei ngailo reng reng, inah an dah tawp zel a ni. Mahse, kha damdawi kha bazaar a kan hmuh aiin a quality a tha zawk daih a ni, a mum pawh ei a awlsam zawk a, te tak te a ni a, bazar-a mi chu FF12 capsule a ni a, a lian zawk daih a ni.

Tin, Muga lam pawh hi tunlai hming lar viau a nia. Project pakhat chu kan submit tawh a, Central sorkarin a approve tawhin ka hria , DPR engkim kan theh lut vek tawh a. Chu project chu 13.893 crore man a ni a, a chhuak lek lek tawh a ni. Heng project lian deuh deuh pathum hi kan tihlawhtling a nih chuan Sericulture lamah chuan hma kan sawn theih deuh kan ring a ni.

Tin, a tawp bera Sericulture lampanga ka ngen leh duh pakhat chu revolving fund hi kan mamawh hle mai. Tun thlengin marketing lamah kan chak loh avangin Sericulture-ah hian hma kan sawn thei lo a ni.

Tun thlengin pawisa hi kan neih loh vangin Seri farm ho pawh an demoralised vek a ni. An cocoon tharchhuah te chu marketing a an buai loh nan an tharchhuah ang ang kan leisak theih a ngai a ni. An tharchhuah englai pawha kan leisak theih chuan beneficiaries-te pawh kan encourage thei a ni. Chuvangin, kan RKVY Nodal Department Minister Pu Zira pawh hetah a awm a, Planning-ah pawh kan Finance Minister bawh Pu Lalsawta pawh a awm bawh a. He House zahawm tak kaltlanga ka ngen duh chu, one time revolving fund min pek theih chuan nakum lam atang chuan revolving atangin farmer hnen atangin cocoon kan lei thei ang a. Chumi revolving fund atang chuan revenue lak theih dan a awm dawn a, Chuvangin revolving fund hi kan mamawh hle a ni. Two crore vel min pek theih chuan Seri Department-ah chuan marketing pawh a chak dawnin ka hria , marketing Department in kan buaipui loh chuan farmer ho tan a buaithlak a, hmun danga tiral tur chuan farmer tan harsa a. Marketing tak hi keimahni hnuai ni lo mahse department hian kan leisak theih chuan nasa takin farmer te kan chhawk zangkhai thei a. Chuvang chuan marketing hi kan buaipui lo thei lo a ni.

Kan member zahawm tak Pu Beichhua pawn a hre lutuk a ni, FF12 Capsule hi a lian tak tak a ni. Mahse sub-centre a awm Iron folic Acid tablet chu te tak te a ni a, ei pawh a awlsam a ni. Amaherawhchu raipuar khan ei lovin an dah tawp thin a, free a nih a vangin a that an ring lo a ni. Chuvangin, hei Fisheries Department-ah pawh sangha chi te, feeds te subsidy te pawh ngaihtuah a tha ka ti a. Tun thlengin fish seeds hi 100% subsidy in kan pe thin a, sawiselna a tam si a. engpawh nise sangha chi chu living things a ni a, rannung a ni a, tuiah engtin nge kan chhiar theih ang? A size a in ang hlawm si lo. Batch khatah size hran hran a awm thei si a. Engpawh nise, hei pawh hi 100% subsidy, free of cost hi chu Iron folic acid tablet ang deuh kha a ni a. Chuvangin subsidy chungchang hi kan ngaihtuah mek a ni. Hei, revenue lam pawh hi, Year of consolidation, revenue atan fish seed-ah hian subsidy rate chu a awm sa a ni a, tunah hian 75% ani mek a, fish seed hi ngaihtuah that a ngai a ni, 100% free nilovin hei pawh hian subsidized rate in kan pe mai dawn em ni (speaker : policy maker i ni a lawm le, kha kha chu siam i tum ve ang chu) Pu Speaker, fisheries-ah hmasawn nan hma kan lak chu a ngai a ni.

Infrastructure pawh hi Fish seed Mill plant, Saitual-ah pawh a awm a, Champhai-ah pawh tih mek a ni, Kolasib-ah pawh vuah sa a ni a, Lengpui-ah hawn a ni tawh bawk a. kan Chief Minister zahawm takin thla hmasa khan min hawnsak a, a lawmawm hle mai. Khawlte pawh nuai engemaw zah senga vuah a ni a, a function loh chuan engtingge ni ang aw ka ti a. Chuvangin, PPP mode-a kal tum a ni.

**Pu T.T. ZOTHANSANGA** : Pu Speaker, Champhai a mi Feed plant kha engtikah nge min zawh sak anga min hawn sak ve theih ang aw? RKVY sum a tam ang reng si a, min tih hmasak thei em?

**Dr. B.D.CHAKMA, MINISTER** : Pu Speaker, kha kha chu estimate chauh a ni a, pawisa awmzat kha chu estimate pek sual vangin kumin chhunga hmalak tura tih a ni. Tuna siam kha chu a te deuh a ni, extension ngai anih avangin Champhai district chu Fishery lamah potential tak tak a ni a, fully operate turin hma lak mek a ni.

Tin hmun danga awm chu PPP mode a kal tum a ni a, raw material chungchangah hian a buaithlak hle a, Vitamin te Protein te chu pawnlam atanga chah loh theih loh a ni a. Mahse, raw material Mizoram chhunga awm thei chi hi ngaihtuah a ngai a ni. Entirnan, Vitamin te rice husk te a awm theih chuan sangha feed siam nan a tha hle a. Champhai-ah erawh chuan raw material hmuh a har vaklo a, hmundanga khawl zawng zawng run theih tur leh dik taka production nei turin hmalak tum a ni. Tin, Ice plant lam pawh hi Bilkhawthlir ah khawl vuah sa a ni a, Bawngkawn leh Kolasib ah pawh neih sa a ni. Ice plant atangin revenue engemaw zah lak beisei a ni bawk. Revenue leh mipui tan pawh a tha. Tin, production-ah hian Mizoram hi tlangram anih avangin transportation-ah a har deuh a. Sangha chi Supply-ah pawh kan buaina ber a ni. Technical deuh hlek a ngai a, experiment, kan MLA zahawm tak Pu Thanliana sawi ang khan, ani hian experience a nei tha hle in ka hria. Sangha chi rual hian Oxygen supply kha ngaihtuah tel a ngai a.

Mahse nichin lawka Parliamentary Secretary sawi Lengpui atangin an phur thi vek a tih kha chu transportation technical thiamloh vang pawh a ni mai thei. Vaiho atangin zir a ngai, technical thila ni a. Chuvang chuan kan fish farmers ho pawh uluk taka training pek an ngai a ni. Chuvangin RKVY hnuaihaw pawh training a ngai, Exposure neihna fund pawh dah tel a ni.

Tin, fish seed production lam ah Mizoram hi tun thlengin a la intodelh lova. Phairama chah loh theihloh a ni. Mahse, ka duhdan chuan mahni ramah sangha chi kan siam theih chuan District tinah hatchery leh rearing kan neih theih chuan fresh seedling sangha chi tharlam kan hmu thei dawn a ni. Champhaiah hatchery kan siam theih chuan a tha dawn hle a. Lunglei, Zobawk pawh renovate kan tum a, pawisa pawh dah sa a ni. Chuvang chuan, district tinah sangha chi siamna Hatchery, rearing-te siam kan tum a ni. Chuvangin kan working culture a pawimawh hle a, kan department mite leh Fishery Farmers te thawhona pawh a that a ngai a ni. Vaiho angin, anni chu enkawl dan pawh an thiam a. Tripura a ka kal tumin an enkawl dan te kan entawn a, zir pawh kan zir ve thin a ni. Hman deuh khan Kumarghat-ah pawh wawi 2/3 ka kal tawh a, nichin discussion-a Pu Thanliana sawi angin, Prawn culture hi, Prawn Seedling siam dan hi a hautak khawp mai. An hatchery chu mihring ICU (intensive care unit) pangngai a ni. Water pawh hi condition a ngai a, sea water angin siam a ngai, chi pawh belh a ngai a ni. Hei hi fimkhur ngai tak scientific tak a ni. Chuvang chuan a hautak a ni. Current pawh 24hrs. a awm a ngai a. Oxygen supply 24hrs. a ngai a. Tin feed pawh hi a hautak khawp mai, royal feed a ni. Hman deuha technical meet kan neih khan a siam dan leh kaikuang ei duh chi feed ten an sawi khan ka nuih te pawh a za a ni. Prawn seedling chu a hautak khawp mai. artui pawh pawlh a ngai a, protein pawlh a ngai a, vitamin pawlh a lo ngai leh a. Hei hi royal feed, sap ho ei chi a ni ka ti a. Chutiang chuan Mizoramah kaikuang kan khawi thei dawn em ni aw tih te ka ngaihtuah reng a, a hautak a ni. Mi an taimak a ngai a, current supply 24hrs. a ngai a, oxygen 24hrs. supply a ngai a. Amaherawhchu seed hi siam peih hnuah culture te, capture te chu a har lem lova, tuiah chuan a awlsam a ni. Engpawh nise seed preparation hi a hautak a, a hahthlak a, chuvang chuan prawn culture hi Mizoramah hian engtia tih chi nge tih ka ngaihtuah mek a ni.

A tawp berah chuan, kan production lama harsatna pakhat chu Brood Stock kan ti a, Sangha puitling, Sangha nu leh pa puitling kan dahkhawm a, kan thlah pun tir thin a ni. India Major Carp (IMC) erawh hi chu artificial-in anih loh chuan natural in production a awm thei lova. Tun thlengin Lengpui farm atangin nitin deuh thaw in sangha hi a bo thin a. Farm enkawltu phone in ka be thin a, a bo reng mai a ni, rukru hi an tam si a, engtin nge ni ang aw ka ti thin a. Tin, hman deuha Department hotute nen kan kal tumin policy pakhat chu kan sawi hova, Jail khanna ( Jail bang hungna) angin kan siam dawn em ni te ka ti a. Brood Stock hi a bo theih loh nan strong fencing, a bang sang deuhin, kan siam dawn ami te kan ti a. Tun anga a awm reng chuan zanah misual an lo kal thin a ni. Len emaw thil dang dang hmangin Sangha hi an man zo vek thin a ni. Chuvang chuan Mizoram culture pawh hi engtin nge ni ang aw, Hmuifang lamah nge ni thil pakhat ka fak loh theih loh chu fanghmate, antam zuarte, zawrhna hmunah an awm ngai lovin bawmah an ziak a, fanghma man cheng 10, antam man cheng 10 tiin an ziak a, a leitu in an duhzawng an lei a,

pawisa a bawmah an dah mai thin a ni. Mahse, sangha ah erawh a nilo, ruk ruk a va tam ve ka ti a. Pawn lam, Guwahati leh Tripura-ah ka kal chuan he culture hi ka fak a, ka sawi deuh zel a ni. Mizoramah chuan chutiang culture te kan nei a, dawrah a neitu in an nghak ngai lo, computer pawh an nei ngai lo, natural a ni a, a neitu awm lovin an dawr theih a ni tih ka sawi thin a. Chutih lain Fisheries lamah hetiang thil a awm erawh hi chu mak ka ti thin a ni.

Chutiang chu awm tawh lo turin vawiin hian he House zahawm tak kaltlangin Mizoram mipuite ka ngen duh chu, hetiang thil hi thleng lo sela, tih hi a ni. Mizoramah hian sangha chi kan mamawh avangin kan sem a, amaherawhchu hetiang anga Brood Stoct, Sangha puitling hi a bo zel chuan kum 10 hnuah pawh Fisheries-ah hma kan sawn lo ang a, Sangha ah kan intodelh thei lovang.

Hun a rei tawh a. A tawp bera ka sawi duh chu, Mizo tawng ka hmang a, sawi sual ka nei anih chuan he House zahawm takah hian ngaihdam ka dil a, Mizo tawngin minute 5 lek bak ka sawi thei lovang a, ka Mizo thiamin a daih lovang a ka ti a. Mahse, hei minute 15-20 bawr vel chu thu ka sawi tawh a, a lawmawm ka ti hle.

A tawp berah chuan on the recommendation of the Governor of Mizoram and with your permission, Sir, he House zahawm takah ka Department Demand pahnih, Demand No. 35 Fisheries Department ₹13,34,43,000 leh Demand No. 41 Sericulture Department tan ₹ 16,08,36.000 total ₹ 29,42,79,000/- hi he House in min pass pui turin ka ngen e. Pu Speaker, ka lawm e.

**SPEAKER** : Kan Minister zahawmtak Pu B.D. Chakma'n a department chan pahnih Demand No. 35-na Fisheries Department, Demand No. 41-na Sericulture Department a hman tur avaiia belhkhawm ₹ 29,42,79,000.00 hi pass sak turin he House hi a ngen a, pass remti zawngin 'Remti' ti rawh u, 'Remti lo' kan awm lo.

Tichuan, Fisheries Department leh Sericulture Department a hman tur pawisa ₹ 29,42,79,000.00 chu he House hian lungrual takin a pass ta a ni.

**Dr. B.D. CHAKMA, MINISTER** : Pu Speaker, ka lawm e.

**S P E A K E R** : Awle, thingpui in tur pawh kan pe thei lo che u chung pawhin a tawp thlengin in awm hram hram a, in zavaia chungah lawmthu ka sawi a. Vawiin atan chuan kan chawl rih ang a. Naktuk tahrik ni 15.10.2015 zing 10:30 ah kan kalkhawm leh dawn nia.

The sitting is adjourned.